

CA TITSA' TSE' NU CCA QUI' JESUCRISTUA NU BEDIA SAN MATEO El Santo Evangelio Según SAN MATEO

¹ Lista nu riquixá'a ti'iŷa cca Jesucristua relacionar làni David nna Abraham nna adí ca enne' gutsché'e tiempo antigua nna. ² Abraham, tàta qui' Isaac. Isaac, tàta qui' Jacob. Jacob, tàta qui' Judá lani ca bettsi' bi. ³ Judá nna Tamar nna tàta nàna qui' Fares lani bettsi' bi Zara. Fares, tàta qui' Esrom. Esrom, tàta qui' Aram. ⁴ Aram, tàta qui' Aminadab. Aminadab, tàta qui' Naasón. Naasón, tàta qui' Salmón. ⁵ Salmón nna Rahab nna tàta nàna qui' Booz. Booz nna Ruth nna tàta nàna qui' Obed. Obed, tàta qui' Isai. ⁶ Isai, tàta qui' David enne' uccua rey tiempo lania. David, tàta qui' Salomón lani niula nu uccua ya'la qui' Urías. ⁷ Salomón, tàta qui' Roboam. Roboam, tàta qui' Abías. Abías, tàta qui' Asa. ⁸ Asa, tàta qui' Josafat. Josafat, tàta qui' Joram. Joram, tàta qui' Uzias. ⁹ Uzias, tàta qui' Jotam. Jotam, tàta qui' Acáz. Acáz, tàta qui' Ezequías. ¹⁰ Ezequías, tàta qui' Manasés. Manasés, tàta qui' Amón. Amón, tàta qui' Josías. ¹¹ Josías, tàta qui' Jeconías lani ca bettsi' bi tiempo loti' guche' ca soldadua cą preso hàstaba le' nación Babilonia. ¹² Bitola de chi bette cą cą para Babilonia nna gùlia Salatiel ŷi'ni Jeconías. Salatiel, tàta qui' Zorobabel. ¹³ Zorobabel, tàta qui' Abiud. Abiud, tàta qui'

Eliaquim. Eliaquim, tàta qui' Azar. ¹⁴ Azar, tàta qui' Sadoc. Sadoc, tàta qui' Aquim. Aquim, tàta qui' Eliud. ¹⁵ Eliud, tàta qui' Eleazar. Eleazar, tàta qui' Matán. Matán, tàta qui' Jacob. ¹⁶ Jacob, tàta qui' José nu uccua tsela María. María nna beditsìna' bi Jesús enne' lá huá Cristo. ¹⁷ Asi es qui'ni dèsdèba gùdua Abraham hàstaba bitsina' rey David nna uccua tsità' libixi. Dèsdèba gùdua rey David hàstaba loti' guche' ca soldadua çà Babilonia nna uccua á tsità' libixi. Dèsdèba loti' bette çà çà para país Babilonia hàstaba gùlia Jesucristua nna uccua á tsità' libixi.

¹⁸ Historia qui' Jesucristua loti' gùlie nna uccua íj: María enne' ccá nàna qui' Jesús nna chì' nábabáni José bi. Pero ántesca thi' luetsi cabi nna gutebé'ni María qui'ni por milagro qui' Espiritu Santo nna nùà' bi huatsa to'. ¹⁹ Joséa nna labi uccua latsi' bi guni bi biya cosa mal, nihua labí uccua latsi' bi gudà bi titsa' qui' María, acca belaba latsi' bi qui'ni adila tsa' gútse'e latsi' bi María sin qui'ni adí ca enne' nna ccá çà saber. ²⁰ De chi belaba latsi' bi anía nna, de repente tabá bitsina' ttu ángel enne' guthel·la' Señor Dios lo yèla qui' Joséa nna gunènie bi nna rèe bi: Lu' José descendiente qui' David, bittu gulaba latsi' lu' làa thi' lu' María' para ccá niula qui' lu', porqui'ni por la'huacca qui' Espiritu Santo nna nùà' María' huatsa to'. ²¹ María' nna guditsìna' a nitu' a' nna quixa lu' lée JESUS porqui'ni por medio de lée nna l·lá ca enne' qui'e le' ca tul·la' qui' quj. Anía ra ángelia Joséa. ²² Iyaba ca cosj nna uccua çà para qui'ni ccá cumplir nu ra Señor Dios lo libro nu bedia ttu profeta qui'e enne' gùdua tiempo antigua nna rèe:

23 Ttu niula nu labí chi nabia'niã nubeyu' nna hua' ÿi'nî nna guditsina'ã ttu nubeyu' to'; nitu'î nna gata' lée Emanuel, titsa' qui' ri'u nna ra: DIOS DUE LANI RI'U.

24 De bebani Joséa nna beni bi ti'ba beni ángelia bi mandado nna beni bi María recibir. 25 Pero labi benibia' bi María hàstaba qui'ni bitsina' primero ÿi'ni bi. Gutixa bi lée JESUS.

2

1 Jesucristua nna gùlie le' yetsi Belén estado qui' Judea tiempo loti' rigú'ubia' rey Herodes. Làniana tuchùppa ca enne' yala la' riyeni tsè' te qui' qui, lá çã magos nna bitsina' çã le' ciudad Jerusalén, da' çã idittu' tsè' lado ril·lani bitsa. 2 Ca máguá nna gunaba titsa' çã nna ra çã: Ti'ani uccua enne' chì' gùlia ba rey qui' ca enne' Israel, qui'ni loti' tsè'e tu' látsi tu'a nna bilá'ni tu' bélia nu rulue' qui'ni chi gùlie, acca da' tu' para guni tu' e adorar.

3 De bina rey Herodes nu ra ca máguá nna yala nuyue uccuania'ã ã'hua iyaba canu Jerusalén nna.

4 Acca gutaÿi chiã iyaba ca sacerdote principal tsè'e le' ciudad ã'hua ca maestro nu rulue' nu ra lo Escritura qui' cania' nna gunaba titsa'ã çã nna ra: Gani ná qui'ni galia Cristua. 5 Lacã nna ra çã na: Le' yetsi Belén región qui' Judea, la'a mísmuba estado qui' ri'u, porqui'ni ã' ra lo libro nu bedia attu enne' gunne parte Tata Dios nna rée:

6 Lu' Belén región qui' Judá, yetsi yala xcuichu to' ná lu', pero adírula dacca' lu' de lo iyaba canu rigú'ubia' qui' Judá, porqui'ni nì galia ttu enne' ichi'e iyaba ca enne' Israel nna hui'e çã cuidado porqui'ni ná çã enne' quia'.

⁷ Làniana gutaỹi gattsi' ba Herodes ca máguá nna. Iyá yíabani gunaba titsa'ą cą ą'hua tsáliayá itsá chi uccua gul·lani bélia. ⁸ Guthel·la' tią cą Belén nna rą: Litsia linaba titsa' tsè' taá gaỹa gulia huatsą'; canchu chi etseláni li e nna, equixá'ani le inte' para qui'ni tsa'a huá' guni ye' e adorar. ⁹ De biyénini cą nu ra Herodes nna dia tè cą. La'yani' qui' bélia nu bilá'ni canaá nna denéruą lo quį hàstaba qui'ni bitsina'ą làti te huátsáa. ¹⁰ De bilá'ni cą guleda la'yani' qui' bélia nna yala bedácca'ni cą. ¹¹ Làniana gutà'a cą le' yú'a nna bilá'ni cą Jesús lani nàna qui'e María, acca bèdu yíbi quį nna beni cą Jesús adorar. Làniana guleqquia tè cą ca regalo qui' caniá nna bete cą qui'e oro nna incienso nna mirra nna. ¹² Pero ca máguá nna por medio de lo yèla qui' quį nna uccua cą saber qui'ni bittu eyeqquia cą ru'a lo Herodes. Acca lacą nna deyya cą attu neda huaya' la para látsi quį.

¹³ Bedà' diba cą nna làniana ángel enne' guthel·la' Señor Dios bitsina' bi lo yèla qui' Joséa attu nna gunènie bi nna rèe bi: Huàtha, guỹi' huatsą' lani nàna qui'ą' nna becuitta huía Egiptua la, nía ba tsé'e le hàstaba qui'ni equixá'ania' lu', porqui'ni Herodes nna eyilą huatsą' para gúttią ne. ¹⁴ Làniana la'a yèla taá huatha Joséa nna guche' bi María lani huatsa nna gudà' cabi dia cabi idittu' tsè' hàstaba le' nación Egiptua. ¹⁵ Nía ba gutsé'e cabi hàstaba qui'ni gútti Herodes. Anía modo nna uccua cumplir nu ra Señor Dios lo libro nu bedia attu profeta qui'e nna rèe: Egiptua la beyáỹia' yí'ni ya'a.

¹⁶ De gutelíni Herodes qui'ni uccua bą burla por ca máguá nna yala bitsa'ánią nna benią man-

dado gatti iyaba ca nubeyu' to' nu chì' bitsina' taá hàstaba nu chuppa idani le' yetsi Belén a'hua le' iyaba ca yetsi to' anta' exa taá nía, de acuerdo lani fecha nu chi ra ca máguá na. ¹⁷ Anía modo nna uccua cumplir ca titsa' nu ra Tata Dios lo libro nu bedia Jeremías attu enne' uccua profeta qui'e nna rèe:

¹⁸ Biyéniní le' yetsi Ramá ribetsi ca descendiente qui' Raquel enne' gùdua tiempo antigua; yala dìtsa ribetsi ca nna rehuiní'ni ca, pero labí uccua latsi' qui' etáni ca la'ÿeni, porqui'ni gùtti ca ÿi'ni to' qui' caníá.

A' bedia profétaá. ¹⁹ Gùtti diba Herodes nna gudu ángelia attu lo yèla qui' Joséa loti' tsè'e ru cabi Egip-tua. ²⁰ Gunènie bi nna rèe bi: Huàtha nna beche' huatsa' lani nàna qui'a' para región qui' Israel, porqui'ni chía gùtti canu uccua latsi' qui' gùtti ca huatsa'. ²¹ Làniana huatha taá Joséa nna beche' bi María lani huátsáa nna deyya cabi para región qui' Israel. ²² De bina Joséa qui'ni Arquelao ÿi'ni Herodes rigú'ubi'a' le' región qui' Judea parte ta' tàta qui' nía nna, gùtsibáni bi eya'a bi nía. Pero por medio de lo yèla qui' bi nna uccua bi saber qui'ni adila tsa' tsía bi región qui' Galilea. ²³ Bitsina' bi nía nna gùdua bi le' ttu yetsi lá Nazaret. Anía modo nna uccua cumplir ca titsa' qui' Tata Dios nu gune ca profeta qui'ni a'hua gata' lée Enne' Nazareno.

3

¹ Làniateaá nna gudulo Juan el Bautista hueni predicar fuera ca yetsi canu anta' le' itúbani región qui' Judea. ² Ra bi ca enne': Liguni reconocer qui'ni ná le enne' tul·la', porqui'ni chi' tení duá

il·lani tsá qui'ni Tata Dios nna cu'úbia'nie ca enne'.
³ Qui' Juan nì nuá gutixà'a Tata Dios lo libro nu bedia profeta quì'e Isaías enne' gùdua tiempo antigua nna rée:

Ruyeni ttu enne' fuera yetsi nna ra bi: Litsé'e leda porqui'ni chi da' Señor; liutha' lí ca neda qui' la'labani qui' le para lèe.

Aḡ bedia profétaá. ⁴ Nu guccu' Juan nna uccuḡ de ittsa' ḡo camello, ḡ'hua guthi lè'e bi ttu cincho nu de yeti. Uccuabàni tēni bi tsuḡ' teruba ttu clase de guxaru' ḡ'hua ḡixi qui' i'yatò'. ⁵ Ca enne' ciudad qui' Jerusalén ḡ'hua itúbani Judea nna iyaba adí ca yetsi to' anta' exa taá yò Jordán nna huía cḡ ru'a lo bi. ⁶ Juan nna beni bi cḡ bautizar le' yò Jordán porqui'ni beni cḡ reconocer ca tul·la' qui' quḡ. ⁷ De bilá'ni Juan qui'ni iḡetse' canu lání religiún fariseo nna saduceo nna dia cḡ para gugadia bi cḡ inda, acca ra bi cḡ: Yala mañoso ná le tì'a ca bèl·la. Nuni rḡ le qui'ni huaccani le ucuittani le la' tsialatsi' qui' Tata Dios nu chì' da'la cá. ⁸ Liulue' lani ca hecho tsè' qui' le canchu là hualigani chi beyacca le arrepentir. ⁹ Alàa chì' gutsia la le pretexto nna ina le: Yala enne' tsè' ná tu', porqui'ni ná tu' descendiente qui' ta' enne' gùla qui' tu' Abraham. Pues inte' nna nia' le qui'ni hàstaba ca íyya anta' nì nna huaccani Tata Dios gunie qui'ni eyacca cḡ ḡi'ni Abraham. ¹⁰ Aḡ'hua chi du leda yette para ichuḡ ca yaga dèsdeba l·lú quḡ; ḡ'hua iyaba ca yà nu labí runna fruto tsè' nna chú cḡ tsía cḡ lo yì'. ¹¹ Inte' nna hualigani runia' le bautizar lani inda canu reyacca arrepentir. Pero enne' da' bitola de inte' nna adí la'huacca te quì'e tì'chula inte', acca nìdirubani làa dàcca'a' para cueqquia' ca guarachu

yù'u nì'e. Lèe nna gunie le bautizar lani Espíritu Santo nna la'huacca tì'a yi'. ¹² A'hua dènie pala para guthúe ÿua' nu re' lo tsinà' quì'e. ÿua'xtíla nna gunie na seguro le' yú'u, pero tébáÿua nna gudà'l-èe na lo yi' làti nunca labí eyolá. Anía gunèni Juan ca enni'a.

¹³ Làniana gudà' Jesús Galilea nna díe para yò Jordán làti reqquia Juan, para guni bi e bautizar. ¹⁴ Pero Juan nna ridúdítisi ba bi nna ra bi e: Inte' la riquína' te' ccá' bautizar por cuiã'lu', atsi'íni cuiã'lálu' da' ru'a lua' nna. ¹⁵ Becabi Jesús nna rée bi: Oba gunà guni lu' inte' bautizar porquì'ni a'ba ná tsè' para guni ri'u cumplir iyábani nu rú'ulatsi' Tata Dios. ¹⁶ De beyacca uccua Jesús bautizar nna beria tìe le' inda, làniana biyàlia ÿiabara' nna bilá'ni Juan qui'ni Espíritu Santo nna huadie ti'ba ttu becha to' nna bitsine'e iqqua Jesús. ¹⁷ Làniana biyéniní tsì'i ttu enne' gune de ÿiabara' nna rée: Là enni'ì enni'á' ÿì'nia' yala catsi'ì ti' e, a'hua por lèe nna yala la' redacca'latsi' te quia'.

4

¹ Làniana por medio de Espíritu Santo nna huía Jesús ttu lugar idittu' fuera yetsi para qui'ni numalua nna guniã ne tentar canchu xiaba irialàniã gunie nu calatsi'ì. ² Nía nna beni Jesús ayunar nna labí gutúe chua' ubitsa nna chua' yèla nna. Bitola nna yala gutùnie. ³ Làniana bitsina' nu huethacca'ÿía nna rã ne: Canchu hualigani ná lu' ÿì'ni Tata Dios nna gùtsi ca íyya anta' qui' qui'ni eyacca cã ettaxtíla. ⁴ Becabi Jesús nna rée na: Escrítuba ga'na qui'ni aláa tsua' teruba lani ettaxtíla

ccabaniní ca enne', sino a'hua lani iyábani ca titsa' riria rú'a Tata Dios. ⁵ Làniana numalua nna guche' tià ne le' Jerusalén ciudad nu ná para Tata Dios nna beduà ne iqquia torre qui' templua nna ⁶ rã ne: Canchu hualigani ná lu' Yï'ni Tata Dios nna bittsía tsanna de nì para loyu nna, porqui'ni escrituba ga'na qui'ni Tata Dios nna ithel·le'e ca ángel qui'e para gudaxu' cã lu' lo ná' qui' para qui'ni làa itsina' nì'a lu' lo íyya nna ccadí' qui' lu'. ⁷ Becabi Jesús nna rèe na: Ga'na huá escrito làti ra qui'ni: Bittu guni lu' tentar Tata Dios qui' lu'. ⁸ Numalua nna guchi'ã ne attu lo ttu i'ya xeni tsè'ni nna belue'niã ne ituba làti bána'niã le' yétsiloyu lani ituba riqueza qui'ì nna, ⁹ ra tià ne: Iyaba ca nui nna gunna ya' cã qui' lu' canchu gudu yïbi lu' nna guni lu' inte' adorar. ¹⁰ Jesús nna ra tie na: Becuitta ru'a lua' Satanás, porqui'ni escrituba ga'na qui'ni guni ri'u adorar ttu teruba Señor Dios qui' ri'ua a'hua la terúbée guni ri'u servir. ¹¹ Betha'na tè numalua ne nna becuittã. Làniana bitsina' ca ángel de yïabara' ru'a lo Jesús nna beni cabi e servir.

¹² Bina ba Jesús qui'ni te Juan litsi' íyya, acca labiru gùdue nía sino beyeqquia lée para Galilea hàstaba látsie Nazaret. ¹³ Làniana bedè'e Nazaret nna hué ru'a indatù'a gùdue le' yetsi Capernaum le' región qui' Zabulón nna Neftalí nna. ¹⁴ Anía modo nna uccua cumplir nu ra Tata Dios lo libro nu bedia profeta qui'e Isaías nna rèe:

¹⁵ Látsi Zabulón nna Neftalí nna, neda ru'a indatò',
 attu ládulá yò Jordán, Galilea región qui'
 canu labí ná raza Israel.

¹⁶ Yetsi nu re' le' chul·la nna chi bilá'niã iÿeni la'yani',

làti tsè'e ca enne' le' ÿula qui' lu'uti nna huàni' rábani la'yani' para laça.

Anía ra lo libro qui' profeta Isaías. ¹⁷ Dèsdèba lania nna gudulo Jesús hueni predicar nna rèe: Leyacca arrepentir por ca tul·la' qui' le porqui'ni annana calatsi' Tata Dios qui'ni ca enne' nna hue'él·la' ca qui'ni quée enne' cu'úbia'nie ca. ¹⁸ De reqquia Jesús ru'a indatò' qui' Galilea nna, bilá'nie chuppa ca enne': Simón enne' lá Pedrua lani bettsi' bi Andrés rudal·la cabi exxa le' inda porqui'ni uccua cabi nu huedaxu' bél·lá. ¹⁹ Rèe cabi: Lità lani inte', inte' nna gunia' qui'ni ca enne' la guni le pescar. ²⁰ Làcabi nna betha'na taá cabi ca exxa nu rudaxu'ní cabi bél·lá nna dia taá cabi lani e. ²¹ Gutte diba Jesús nía nna bilá'nie áchuppa ca enne': Jacóbua lani bettsi'ì Juan yù'u cabi le' ttu barco lani tàta qui' cabi Zebedéua reyuni cabi ca exxa nu rudaxu'ní cabi bél·lá. Jesús nna gutà'ie cabi. ²² Biyeni báni cabi qui'ni rinnie cabi nna betha'na taá cabi bárcuá nna tàta qui' cabía nna dia taá cabi lani e. ²³ Làniana gurèni Jesús ituba Galilea nna gutè'e le' ca sinagoga làti retuppa canaá nna bethète' tènìe ca nna bènie predicar ca titsa' cubi nu cca qui' la' rigú'ubia' qui' Tata Dios. A'hua gùtue iyábani ca itsahue' a'hua iyábani clase de dolor qui' ca enne' le' ca yétsiá. ²⁴ Gudà tè titsa' qui'e itúbani región lã Siria. Acca tahua' ca ru'a lúe iyaba canu ra'ni para eyunie ca: canu rappa ca bi'ya tediba dolor nna canu cca sufrir bí'yaáru itsahue' ni nna, a'hua canu cca padecer por ca espíritu mal nna canu yù'u be', a'hua ca paralítico canu chi gutsáni ra'ni ca nna, tahua' ca iyaba ca ru'a lúe. Lèe nna beyúnìe iyaba ca. ²⁵ Enne' yétse'ní nna gudulo ca

dia ça lani e: ca enne' Galilea nna Decápolis nna, a'hua qui' Jerusalén nna ituba región qui' Judea nna hàstaba ca enne' qui' attu ládulá yò Jordán nna denó huá ça ne.

5

¹ De bilá'ni Jesús ca enne' ÿétse'á nna huàppie lo í'yaá nna gùre' banie nna bebiga' tè ca enne' ruthète'niáa ru'a lúe. ² Gudulo tiè riquixa'ánie cabi ca enseñanza tsè' nna rèe:

³ Ica'rubà canu chi yù qui'ni riquína'ni ça la'ÿeni lo losto' quì; pues quì'ba quì ná iyate nu runna Tata Dios enne' rigú'ubia'nie ça. ⁴ Ica'rubà canu ribetsi; porqui'ni lacà nna huetáni ça la'ÿeni. ⁵ Ica'rubà canu ná ÿénlatsi' losto' quì; porqui'ni huadi' bá ça lóyu nu beni Tata Dios prometer para lacà. ⁶ Ica'rubà canu yala calatsi' quì gata' ttu la'labàni tsè' qui' quì tì'a calatsi' Tata Dios; pues lèe nna gúnie ça cualani para guni ça nu ná tsè'. ⁷ Ica'rubà canu té la' retúalatsi' qui' quì lani adí ca enne'; porqui'ni lacà nna huàl·la' huá ça la' retúalatsi'á. ⁸ Ica'rubà canu labí bèÿia té lo losto' quì delante de Tata Dios; pues lacà nna hualá'ni ça lúe. ⁹ Ica'rubà canu runi qui'ni étse'etsè' ca enne'; porqui'ni huata' lá quì ÿi'ni Tata Dios. ¹⁰ Ica'rubà canu cca padercer por la' ruyudí' qui' ca enne' por causa de qui'ni runi ça nu ná tsè'; porqui'ni qui'ba quì ná iyate nu runna Tata Dios enne' rigú'ubia'nie ça. ¹¹ Ica'rubà le canchu chi inne ca enne' bicca'áÿa titsa' mal ni contra le nna gutsia latsi' quì le porqui'ni denó le inte', a'hua bèyalo bání ná nu ina ça contra le nna runi latsi' quì. ¹² Ledácca' lání le; porqui'ni gudàliani Tata Dios le ÿiabara'. Porqui'ni a'hua ca

enne' nu gutsé'e ttu cuaỹa nuá nna betsiahuá latsi' quĩ ca enne' uccua profeta qui' caniá.

¹³ Lebi'ĩ nna ná le dete' para yétsiloyu. Canchu dèti'á gunittia la' iỹe' qui'ĩ nna, biála lani eyacania iỹe' attu vuelta cá. Labiru biỹa iỹu'á sino para iru'na teruba fuera para gúl·liani ca enne' na.

¹⁴ Lebi'ĩ nna ná le la'yani' para yétsiloyu. Ttu yetsi re' lo ttu i'ya nna labí modo té igàtsi'á. ¹⁵ Nihua labí rugàl·la' ri'u ttu yi' nna rutòthe' tè ri'u ttu cajón lúj, sino qui'ni gudua la ri'u á ttu lugar làti gudàni'á qui' iyábani ca enne' tsè'e le' yú'u. ¹⁶ A' tèhua ná qui'ni hue'él·la' le qui'ni gudàni' la'yani' nu runna Tata Dios qui' le por medio de ca obra tsè' nu guni le, para qui'ni télini ca enne' nna gudàliani cą Tata Dios qui' le enne' dua ÿiabara'.

¹⁷ Bittu gulaba latsi' le qui'ni inte' nna daya' para chu'na' nu ra lo ley nu bedia Moisés enne' gùdua tiempo antigua, nihua nu bedia adí ca enne' uccua profeta qui' Tata Dios; sino qui'ni daya la' para gunia' cumplir iyaỹia tení. ¹⁸ Hualigani te' riquixa'ánia' le qui'ni ántesca l·luỹa latsi' ÿiaba nna yétsiloyu nna, nidi rúbani ttu letra to' nihua ttu acento to' dua lo ley qui' Tata Dios labí ttée qui'ni làa ccą cumplir. ¹⁹ Acca canchu nuỹa diba labí runia obedecer nuỹa ttu ca mandamiento hàstaba ca mandamiento nu ná adiru xcuichu tú'ĩ, á' tèhua ruluè'nią adí ca enne' nna, entonces la nna tito' teruba la'dàliani gata' qui'ĩ le' la' rigú'ubia' qui' Tata Dios. Pero nuỹa diba runia iyaba nu ra lo ca mandamiéntuį á'hua ruluè'nią ca enne' nna, la nna yala enne' ÿeni ccą le' la' rigú'ubia' qui' Tata Dios. ²⁰ Acca nia' le qui'ni canchu labí guni le adí tsè' ru'a

lo Tata Dios ti'chu nu runi ca maestro de la ley nna ca fariséuḡ' nna, entonces ḡ'hua lebi'ḡ nna labí gá'a le le' la' rigú'ubia' qui' Tata Dios.

²¹ Hua yù bá le biḡa ra ca ta' enne' guláa: Bittu gútti lu'. Ḃ'hua: Nuḡa diba gúttiḡ ttu enne' nna cca tehuḡ mererer íriḡ sentencia qui'ḡ gattiḡ. ²² Pero inte' nna nia' le qui'ni nuḡa diba ruyudí'ḡ ttu enne' nna, cca tehuḡ mererer ccḡ castigar; ḡ'hua nuḡa diba ruduadí'ḡ ttu enne' nna, chi ná culpable nna cca tehuḡ mererer tsíḡ ru'a lo uxticia. Ḃ'hua nuḡa diba ínniḡ adiru ca titsa' èl·la ni contra ttu enne' nna, cca tehuḡ mererer tsíḡ lo yi'. ²³ Acca canchu chi tahua' lu' ofrenda qui' lu' lo meḡa nna, pero de repente tabá exalatsi' lu' qui'ni ttu enne' nna té ttu queja qui'ḡ contra lu'; ²⁴ entonces bethà'na ofrenda qui' lu' nía nna, beyya ḡa eyaccatsè' lu' ḡ, làniana eyeqquia lu' gute lu' ofrenda qui' lu'á. ²⁵ Beyaccatsè' contrario qui' lu' miéntraste yù'urù lu' neda lani ḡ antesca guniḡ contra lu' lani juez, juez nna gutiḡ lu' cuenta lani ca policia, lacḡ nna gudàl·la cḡ lu' litsi' ḡyya. ²⁶ Hualigani te' riquixa'ánia' lu' qui'ni labí éria lu' nía hàstaba qui'ni quiḡa lu' ituḡiatè multa nu inàbani cḡ lu'.

²⁷ Chi yù le qui'ni ga'na escrito: Bittu thúalani lu' niula huaya'. ²⁸ Pero inte' nna nia' le: Nuḡa diba rinna'ḡ ttu niula nna ridà latsi'ḡ thúalaniḡ na, pues chi runiḡ adulterar lani ḡ por la' rulabalatsi' qui' terubi'. ²⁹ Acca, canchu ḡyyalo lu' lado bàni runiḡ qui'ni innia lu' le' tul·la' nna, gulèqquia teláḡ, gurù'na ḡ; qui'ni adila tsa' gunitti lu' ttu ḡyyalo lu' ti'ca'lá tsía itute lu' lo yi'bél·laá. ³⁰ Ḃ'hua canchu ná' lu' lado bàni runiḡ qui'ni innia lu' le' tul·la' nna,

guchù telá a, gurù'na a; qui'ni adila tsa' gunitti lu' ttu parte qui' cuerpo qui' lu' ti'ca'lá tsía itute lu' lo yi'bél·laá.

³¹ Ga'na huá escrito: Canchu nuña calatsi'ì ela'á niula qui'ì nna, té qui'ni hué' ÿá niuláa acta de divorcio. ³² Pero inte' nna nia' le: Nu ela'á niula qui'ì pero álahua por causa de qui'ni gùdualani niuláa attu nuhuaya', entonces là nna nâ responsable canchu innia niuláa le' adulterio. A'hua canchu attu nubeyu' guttsaní'ì lani niuláa nna runi huá adulterar.

³³ Hua yù bá le biya ra lo ley nu bete Tata Dios lani ca ta' tàta gùla qui' lía dèsdeba tiempo antigua: Bittu guni lu' jurar cuèntaba, sino guni la lu' cumplir itute nu beni lu' ofrecer lani Señor Dios. ³⁴ Pero inte' nna nia' le: Nú ttú tèhua por nuña ni guni le jurar nihua làa gudu le por testigo ttu cosa tsìa ÿiaba, porqui'ni ÿiabara' nna nâ làti dua Tata Dios enne' rigú'ubia' lo iyate. ³⁵ Nihua bittu guni le jurar nna gudu le por testigo ttu cosa té le' yésiloyu, porqui'ni ná huá parte de la' rigú'ubia' qui'e. Nihua làa gudu le por testigo Jerusalén, porqui'ni nâ ciudad qui' Tata Dios enne' ná Rey ÿeni. ³⁶ Nihua bittu guni lu' jurar nna gudu lu' por testigo la'a iqquia bá lu', porqui'ni nidi rúbani ttu ittisa' iqquia lu' labí ccani lu' guni lu' a tsíttsi o yéthia para siempre. ³⁷ Pero adila tsa' qui'ni la' rinne qui' le nna ccá bá làchu o labí, segúnba nu ná lí. Porqui'ni hua ná malo canchu inaáru le bica'áýáru tì'a canu runi sostener la' beña qui' qui' ru'a lo ca enne' para íria nàrì cã.

³⁸ Chi hua yù le qui'ni ga'na escrito: Bittu gappa

lu' la'ỹeni sino íyyalo lani íyyalo bá ą'hua laya' lani laya' bá. ³⁹ Pero inte' nna nia' le: Bittu edúdítsini le nu runi mal contra le, ántesla nuỹa diba huí'ą xaga' lu' lado bání nna, bedà tèla attu lado. ⁴⁰ Canchu nuỹa ilidą pleito lani lu' nna calatsi'į thí'ą camisa qui' lu', pues be'él·la' telá ą thi' huą mata qui' lu'. ⁴¹ ą'hua nuỹa diba guthítsinią lu' huá' lu' yùà' quì'į por chuppa kilometro nna, pues huía tèla lani ą áchúppa por propio gani voluntad qui' lu'. ⁴² ą'hua nu rinàbanią lu' biỹa nna, bete tènì ą. ą'hua nu inàbasanią lu' biỹa nna, bittu gutsùna'ni lu' ą.

⁴³ Chi hua yù le qui'ni ga'na escrito: Catsi'íni lu' luetsi enne' lu', pero guyudí' la lu' nu ná contrario qui' lu'. ⁴⁴ Pero inte' nna nia' le: Licatsi'i lání ca contrario qui' le. Liuluítsa' tsè'la canu riyé' iqquia le. Liguni tsè' lani canu ruyudí' cą le, ą'hua liguni oración por canu ruduadí' cą le nna rutsia latsi' quį le. ⁴⁵ ą' modo télini ca enne' qui'ni ná le ỹi'ni Tata Dios qui' le enne' dua ỹiabara'. Porqui'ni lèe nna runie qui'ni bitsą' nna rudàni'ą tàntua para ca enne' malo ą'hua para ca enne' tsè' nna. Runi huée qui'ni cca iyya tàntua para canu runi nu ná tsè', ą'hua para canu labí runi nu rèe nna. ⁴⁶ Porqui'ni canchu rappatsi'i le làteruba canu catsi'íni cą le nna, biani cosa tsè'ni nuá runi le para ccá le merecer gudàliani Tata Dios le. Tsí álahua ą'hua runi ca enne' malo canu ruquiỹa xàtta qui' impuesto cá. ⁴⁷ Biárua tsè'ni runi le canchu làteruba canu cca tsè' le runi le saludar cá. Tsí álahua ą'hua runi canu labí ríalatsi' cá. ⁴⁸ Acca lébi'į nna, lícca completamentetaá enne' tsè' tì'a Tata Dios qui' le enne' dua ỹiabara' née enne' tsè' gani.

6

¹ Lihue' cuidado qui'ni làa guni le ca obra tsè' ru'a lo ca enne' de tantua calatsi' le qui'ni gudàliani cã le. Porqui'ni canchu ą' runi le, entonces Tata Dios qui' le enne' dua ŷiabara' nna labí gudàlianie le. ² Canchu chi rute lu' biŷa lani ca enne' pobre, bittu guni lu' qui'ni cuetsi trompeta para qui'ni ca enne' nna ccá cã saber, tì'a runi canu yala enne' tsè' rulue' cã pero álahua anía ná cã. Porqui'ni lacã nna de yù'u cã le' ca sinagoga qui' qui' nna ą'hua lo ca néda nna siempre runi cã qui'ni cuetsi trompeta para qui'ni gappa' ná' ca enne' qui' qui' por ca limosna nu runi cã lani ca enne' pobre. ³ Acca canchu chi calatsi' lu' gute lu' biŷa ofrenda nna bittu cueda lu' para ccá saber ca enne' tsè'e lado ná' yatti lu' nu runi ná' bãnì lu'. ⁴ Anía modo nna lanú enne' ccá saber tsáliaŷa rute lu'. Tata Dios qui' lu' enne' rinna' gattsi' bée lu' nna, lèe nna gudàlianie lu' lo enne' ŷetse'.

⁵ ą'hua canchu chi runi lu' oración nna bittu guni lu' tì'a runi canu yala enne' tsè' rulue' cã pero álahua anía ná cã. Lacã nna ridàni cã de runi cã oración le' ca sinagoga qui' qui' ą'hua lo ca neda làti tsè'e ca enne', porqui'ni calatsi' qui' qui'ni gudàliani cã cã. Hualigani te' nia' le qui'ni lacã nna chìa ridi' cã la'dàliani qui' ca enne'. ⁶ Pero lu' nna canchu chi guni lu' oración nna beyà'a le' litsi' lu' nna bethàya puerta nna, bel·luítsa' Tata Dios qui' lu' enne' du gattsi' bée lani lu' ą'hua rinna' gattsi' bée lu' nna. Lèe nna gudàlianie lu' lo enne' ŷetse'. ⁷ De runi le oración nna bittu iqquiabete bá inne le ca titsa' tì'a canu rul·luítsa' cã ca idolo, porqui'ni rulaba latsi' qui' qui'ni de tantua repetir runi cã

nna huayénini nu rena çà. ⁸ Bittu ccá le tulappa lani çà. Porqui'ni Tata Dios qui' lía nna hua yù bée biya cosa riquína'ni le ántescala inàbani li e. ⁹ Lebi'ì nna guni le oración íj:

Tata Dios qui' tu' enne' dua ÿiabara', rinàba tu':

Qui'ni nombre qui' cuià'lu' nna ccá nombre sagrado lo losto' ca enne',

¹⁰ A'hua qui'ni ìta la' rigú'ubia' qui' cuià'lu' le' yétsiloyu nna,

Ccá bá nu rú'ulatsi' cuià'lu' tì'ba ÿiabara' a'hua le' yétsiloyu.

¹¹ A'hua qui'ni gunna cuià'lu' nu go tu' ttu ttu tsá.

¹² Beyuniyén latsi' cuià'lu' ca falta qui' tu', tì'a intu' nna reyuniyén latsi' tu' qui' ca luetsi enne' tu' biya ruthacca' çà intu'.

¹³ Bittu guthàna ná' cuià'lu' intu' ccá tu' tentar, sino gudilà la cuià'lu' intu' le' iyaba canu ná mal. Porqui'ni làteruba cuià'lu' nna té itute la' rigú'ubia' nna la'huacca nna la'dàliani nna para siémpreni. Amén.

¹⁴ Porqui'ni canchu chi reyuniyén latsi' le lani itute latsi' le qui' ca enne' rigú'u biya falta lani le nna, entonces a'hua Dios Padre qui' le enne' dua ÿiabara' nna hueyuniyén latsi'e qui' le. ¹⁵ Pero canchu labí reyuniyén latsi' le qui' ca enne' biya ruthacca' çà le nna, entonces nihua Dios Padre qui' lía nna labí eyuniyén latsi'e biya falta nu rigú'u le.

¹⁶ Canchu chi guni le ayunar de tantua calatsi' le guni le adí oración nna, bittu guni le qui'ni inna' le triste tì'a ca enne' canu rinna' çà qui'ni chi rigutsi latsi' qui' para qui'ni ilá'ni ca enne' qui'ni rigua çà labí ro çà. Hualigani te' nía' le qui'ni lacà nna chía

ridi' cã la'dàliani qui' qui. ¹⁷ Pero lu' nna canchu chi guni lu' ayunar nna, gùl·liba ittisa' iqquia lu' nna qui' lo lu' nna, ¹⁸ para qui'ni làa tébe'ní qui'ni runi lu' ayunar. Porqui'ni Tata Dios qui' lu' enne' du gattsì' bée lani lu' làterubée yù nna gudàlianìe lu' lo enne' yetsi.

¹⁹ Bittu gudua iqquia le gata' riqueza qui' le le' yétsiloyùj, porqui'ni tsè'e taá ca bèl·la dîl·la', a'hua biÿaáru interés ni nna rel·lani taá cã ìyya, a'hua ca ubàna nna rithàlia taá cã nna ribana cã. ²⁰ Sino liúdua la iqquia le gata' riqueza qui' le ÿiabara', porqui'ni nía nna lanuru ca bèl·la dîl·la' té, nihua labiru biÿa rel·lani ìyya, nihua ubàna nna lanuru té. ²¹ Pues làti té ca cosa nu dacca' qui' lía nna nía huá du la' rulábalatsì' qui' le.

²² Iyyalo ri'u nna nã tì'a ttu lámpara para ri'u. Acca canchu íyyalo lu' tsè'ba nã nna, entonces labiru biÿa la'yani' reyàtsani lu'. ²³ Canchu iyyalo lu' labí yùã biÿa nuã' la'yani', entonces táliã qui'ni reqquia bá lu' le' chul·la. Canchu la' ritelini qui' lu' re' bã le' chul·la nna, entonces la' chul·lì nna áchúppa tanto yethia nã le' la'labani qui' lu'.

²⁴ Lanú ccani thuã bajo la' rigú'ubia' qui' chuppa ca patrón, porqui'ni miéntraste guyudí'ã ttuã nna catsi'í laniã attuã. A'hua miéntraste nã cumplido lani ttuã nna riníyú lã attuã. A'hua lebi'ì nna labí ccani ccá le huenitsìna qui' Tata Dios nna tse'e huá le bajo la' rigú'ubia' qui' Bel·liu nna.

²⁵ Acca inte' nna nia' le qui'ni bittu nùyuegá ccáni le por tì'ÿa ccá le nu í'ya go le para qui'ni ccabàni le, nihua tì'ÿa ccá le nu gaccu' le. Tsí álahua adila dacca' la'labani qui' ri'u tì'chula nu ri'ya ro ri'u

cá. A'hua cuerpo qui' ri'u nna, tsí álahua adila
 dacca'ą ti'chula nu raccu' ri'u cá. ²⁶ Linna'áruhua
 ca binni to' nu tsè'e lo be'. Bihua rada ą nihua
 labí rutùppa ą lèna' nihua labí redi' ą le' yú'u.
 Pero Tata Dios qui' le enne' dua ŷiabara' nna rui'e
 ą ro ą. Tsí álahua adírula dacca' le tì'chula laą cá.
²⁷ Nuni le ccani itùni á tsatsitta de tantua gulaba
 latsi'į cá. ²⁸ Acca por nu gaccu' le nna, biánicca
 rulaba thùti latsi' le. Liuyuúruhua ca ìyya nu anta'
 i'yatò' ti'įya latsitte riŷeni ą, pues labí biŷa tsina
 ni runi ą nihua labí rul·la ą tùu. ²⁹ Pero inte'
 nna riquixa'ánia' le qui'ni nìhuani rey Salomón lani
 itúbani riqueza qui'į nna labí bilá' bi adí latsitte
 lani ca ŷo tsè'ni qui' bi ti'chu nuŷa ttu ca ìyya tú'ą'.
³⁰ Yala tsè'ni rugaccu' Tata Dios ca ixxi' to' canu
 anta' ttu tiempo to' teruba le' yétsiloyu pero guxtila
 taá chi bihuèthiā nna dia chīā lo yi' le' horno. Acca
 lebi'į nna, tsí álahua adila dispuesto ná Tata Dios
 para gunnee adí nu riquína'ni le. Pero lebi'į nna
 labí confianza té qui' le lani e. ³¹ Acca bittu gulaba
 thùti latsi' le nihua bittu ina le: Ti'ani ccábaníní
 ri'u attu ida, o, ti'agani ccá ri'u nu gaccu' ri'u.
³² Porqui'ni canu labí ríalatsi' nna, pues puro qui'
 canuá huadua iqquia qui'. Pero Tata Dios qui' le
 enne' dua ŷiabara' nna hua yù bée qui'ni riquína'ni
 le iyaba ca cosį. ³³ Acca liudua la iqquia le ya'la
 tè nu cca qui' la' rigú'ubia' qui' Tata Dios, ą'hua
 qui'ni guni le nu rú'ulatsi'e; lániana iyábani ca cosa
 nu rulaba latsi' líį nna, ni nada ba gunnee ą qui'
 le. ³⁴ Acca bittu gulaba xàttaga latsi' le anna nu ccá
 qui' guxtila, porqui'ni uxé nna yètsi' bá ná nùyue
 da' lani ą. Basta lani ca problema qui' ttu ttu tsá
 bá.

7

¹ Bittu guyu le la'ditsi qui' ca enne', para qui'ni làa guni Tata Dios le juzgar. ² Porqui'ni ti'iyábá runi le ca enne' juzgar, entonces aníahua ccá le juzgar. Lani la'a mísmuba medida nu rurixibiá'ni le ca enne' nna, nuá huá ebixibiá' huáni le. ³ Biécca rinna' lu' yiŷi to' nu yù'u lo attu enne', atsi'íni labí runi lu' duel·la' ebèqquia lu' nicùà' nu yù'u íyyalo lu' ni'i. ⁴ Miénttraste yù'u ttu nicùà' íyyalo lu' nna, ti'ani modo eyáŷani lu' gá lu' attu enne': Gulèda qui'ni ebèqquia' yíŷi nu yù'u íyyalo lu' cá. ⁵ Yala enne' tsè' rulue' lu' pero álahua ą' ná lu'. Ná qui'ni ebèqquia ŷá lu' nicùà' nu yù'u íyyalo lu' ą', làniana ilá' tsè'ni lu' ebèqquia lu' yíŷi to' nu yù'u íyyalo attu luetsi enne' lu'. ⁶ Ca cosa nu beni le'ya Tata Dios nna, bittu gute le çą lani ca beccu', no sea qui'ni eyeqquia çą nna pedázoni guni çą le. Nihua ca cuttsi nna bittu hué' le çą ca perla tsè'ni, porqui'ni nìca'chu labí guni çą çą recibir nna sino gul·lia la çą çą.

⁷ Línaba nna huadi' bá le. Leyìla nna huetselá báni le. Linne ru'a puerta nna hua yàlia bá. ⁸ Porqui'ni nuŷa tediba rinàba nna huadi' bá. Nu reyìla nna huetsèla bánía. Nu rinne ru'a ttu puerta nna huayàlia bá. ⁹ Nuni ttu nubeyu' ni entre lebi'ì canchu ttu ŷi'nì nna inàbanią na ttu ettaxtíla gúą, tsí hué' lą na ttu íyya cá. ¹⁰ Canchu inàbą ttu bəl·la to' gúą nna, pues aŷa labí capaz ná le gute le ttu bəl·là la qui'ì álá. ¹¹ Lebi'ì màsqui'ba ná le enne' tul·la', pero hua yù bá le gute le ca cosa tsè' qui' ca ŷi'ni le. Tsí álahua adí telá lani gusto gunna Tata Dios qui' le ca cosa tsè' nu inàbani li e cá. ¹² Iyábani ca cosa nu rú'ulatsi' le qui'ni guni ca enne' lani le nna,

ą'hua liguni lani laça; porqui'ni nui ná nu rulue' nu ra lo ley qui' Moisés ą'hua lo ca libro nu bedia adí ca profeta qui' Tata Dios.

¹³ Liguni duel·la' gá'a le ru'a puerta xcuichu to'; porqui'ni belaga ná ru'a puerta para lù'uti, ą'hua fácil ná neda nu chì'ą ca enne' para nitti çą; nuỹé çą nna dia çą lo neda'. ¹⁴ Porqui'ni tabi ná ru'a puerta para la'labàni, ą'hua lathì to' ná neda què'į; tuchùppa rúbá çą nna runi çą duel·la' thá' çą lúj.

¹⁵ Lihue' cuidado lani canu rena çą qui'ni rinne çą parte Tata Dios, porqui'ni álahua iyá çą rinne çą nu ná lí; yala humilde rulue' çą ti'átsi ttu carnero to' ril·lani çą ru'a lo le; pero liú'u losto' qui' nna ná çą tì'a ttu lobo túxu nu dá'ą para gul·lùỹą latsi' iyábani.

¹⁶ Por ca hecho qui' qui' nna edácca'ni le çą nuỹa clase de enne' ni ná çą. Tsí ína ri'u hua redi' ri'u betsuli' nna exxuhuí nna lo ca yettse' cá. ¹⁷ Iyaba ca yà canù ribia fruto tsè' lo qui' nna es porqui'ni ná çą yà tsè'. A'hua iyaba ca yà canu labí runna fruto tsè' nna es porqui'ni ná çą yà nu labí riỹu'.

¹⁸ Labí ccani ttu yà tsè' gunna fruto nu labí ná tsè'. Nihua labí ccani ttu yà nu labí riỹu' gunna ttu fruto tsè'. ¹⁹ Iyaba ca yà nu labí runna fruto tsè' nna chúu bá çą nna tsía çą lo yi'. ²⁰ Acca por ca hecho qui' qui' nna edácca'ni le canchu hualigani ná lí nu rena çą.

²¹ Nuỹetse' ca enne' reya çą inte': Señor, Señor: pero aláa iyá çą té permiso qui' qui' para gá'a çą le' ŷiabara', sino làteruba canu runi nu rú'ulatsi' Tata quia' enne' rigú'ubia' le' ŷiabara'. ²² Canchu chi gal·la' tsá juicio nna, nuỹetse' çą nna gá çą inte': Señor, Señor, ti'átsi yala titsa' rappa çą inte'.

Laniana ína çà: Tsí álahua gutixà'a huá tu' lani nombre qui' cuià'lu' ca cosa nu chì ccálá, à'hua lani nombre qui' cuià'lu' nna bedàl·la tu' fuera iyaba ca espíritu malo de lo losto' ca enne', à'hua beni tu' iÿetse' ca milagro. ²³ Làniana gudea' lo qui nna epa'ya' çà: Labí nabia' te' le, acca liucùtta ru'a lua' lebi'ì canu hueni tul·la'. ²⁴ Nuÿa diba riyéninià ca titsa' quíyi'ì nna runià çà nna, entonces inte' nna guni ya' à comparar tì'a ttu enne'yù' nu té la' riyeni tsè' qui'ì nna beduà yú'u qui'ì lo cimientu tsè' nu púruani íyyaá. ²⁵ Bedà iyya nna biria yò nna uccua be' nna gutsé'e çà yú'a. Pero labí gubixià porqui'ni duà tsittsì lo íyyaá. ²⁶ Pero nuÿa diba riyéninià ca titsa' quíyi'ì pero labí runià çà nna, entonces inte' nna guni ya' à comparar tì'a ttu nubeyu' necio nu beduà yú'u qui'ì lo yúyi. ²⁷ Bedà iyya nna biria yò nna gutte be' nna gutàtsa' çà yú'a lani itute fuerza qui' qui; yú'a nna gubixi chìa nna guche' inda itutià. ²⁸ De beyacca gunne Jesús ca titsi'ì nna yala biquila' latsi' ca enni'a de tantua ca enseñanza tsè' gutixa'ánie çà; ²⁹ porqui'ni gutixa'ánie çà ti'íÿa ná nu guni çà, aláa tì'a ca maestro qui' qui rul·la çà nu ra lo ìttsì qui' ley religioso qui' caniá, sino beluè'nie çà lani la'huacca de ÿiabara'.

8

¹ Beyàdi bá Jesús lo í'yaá nna nuÿetse' ca enne' denó çà ne. ² Làniana bitsina' ttu nu ra'ni lepra rutsu' látì nna bedu ÿibi ru'a lúe nna rà ne: Señor, canchu calatsi' cuià'lu' nna huaccani cuià'lu' eyuni cuià'lu' inte'. ³ Jesús nna becàa tè né'e nna beláppe'e na nna ra tìe na: Huacca látsa'a', beyàcca nàri. Cuanto taání rèe anía nna benítilo chì itsahue' qui'

niá. ⁴ Làniana ra tè Jesús na: Bè' cuidado qui'ni nú ttu tehuá nuỹa quixá'ani lu', sino qui'ni huía talue' lo lu' lani sacerdotéa, bete tè ofrenda qui' lu' tì'a nu beni Moisés mandado para qui'ni ccaỹén latsi' quị.

⁵ De gutà'a Jesús le' yetsi Capernaum nna bitsina' tè ttu capitán ru'a lúe nna gutta'yúnią ne, ⁶ rą ne: Señor, mozo quiya'a nna rà'nią parálisis nna nìdirúbani labí cca ttą, yàl·la'ni dolor rappą. ⁷ Jesús nna rée na: Anna tháya' eyuni ya' ą. ⁸ Becàbi capitáan nna rą ne: Señor, labí ná' nu dacca' para qui'ni gá'a cuią'lu' le' litsá'a', sino canchu ína teruba cuią'lu' titsa' nna, entonces mozo quiya'a nna eyacca latsi'į. ⁹ Porqui'ni inte' nna, tsè'e canu runi cą inte' mandado, ą'hua tsè'e ca soldado làtsi' nàya' rúni ya' cą mandado; ą'hua canchu gáỹia' ttuą nna huitą. A'hua mozo qui'a nna canchu épa'a ya' ą: Bèni nui nna, lą nna guni bą na. ¹⁰ De biyénini Jesús ca titsa' qui' niá nna yala biquila' latsi'e nna rée canu denó cą néa: Hualigani te' nia' le qui'ni nihua entre ca enne' Israel nna lanú enne' té iỹeni fe quì'į tì'a nu té qui' nubéyu'į. ¹¹ A'hua riquixa'ánia' le qui'ni iỹetse' ca enne' da' lado ril·lani bitsa ą'hua lado renia bitsa nna il·lani cą xúaní cą lani ca ta' tàta qui' le Abraham nna Isaac nna Jacob nna lugar de la' rigú'ubia' qui' Tata Dios. ¹² Pero ca enne' becué' Tata Dios primérute nna labí tsé'e cą lani e le' la' rigú'ubia' quì'e, sino tsía la cą le' chul·la; nía nna ccá cą sufrir nna cuetsi cą nna góya'a tsùni laya' quị. ¹³ Làniana Jesús nna rée capitáan: Beyya bá, porqui'ni chía ríalatsi' lu' nna, acca ccá bá tì' calatsi' lu' ą'. La'a mísmuba hóraá nna beyacca latsi' mozo qui' niá.

14 Bitsina' Jesús litsi' Pedrua nna bilá'nie suegra qui' niá tíą yi'bél·laníą ŷil·lá. 15 Jesús nna bedàxu'e ní'į nna beria chią ŷil·láa. Lą nna huatha tíą nna bènią cabí servir.

16 Gùl·la diba lanía nna tahua' cą ru'a lúe iŷetse' canu cca padecer por ca espíritu malo; lèe nna lani titsa' qui' terúbée nna bebèqqiue fuera ca espíritu malua. A'hua iyaba canu ra'ni nna beyúnie cą.

17 Anía modo nna uccua cumplir nu bedia Isaías enne' uccua profeta tiempo antigua nna ra bi qui'ni:

La'a mísmuba Señor nna beyúnie ca itsahue' qui' ri'u nna gütue iyábani ca dolor qui' ri'u.

18 Beyù bá Jesús qui'ni iŷetse' ca enne' tsè'e itá'lubanie nna, acca benie ca enne' ruthète'niáa mandado qui'ni tté cabí lani e attuladola indatù'a.

19 Làniana bitsina' ttu maestro nu rulue' ley qui' caniá nna rą ne: Maestro, hua tånua' cuią'lu' gaŷa tediba tsía cuią'lu'. 20 Jesús nna rèe na: Ca beda' nna hua tsía bèlia qui' qui, a'hua ca bìnni to' ridà lo be' nna hua tsía huá xcu'ni to' qui' qui. Pero Nubeyu' de ŷiabara' nna labí té gaŷa quixa íqqié.

21 Attu enne' ruthète'niáa nna ra tíą ne: Señor, tanó huá' cuią'lu', pero bènna cuią'lu' permiso quia' qui'ni priméruŷa éya'a' ugáttsi'a' tàta qui'a. 22 Jesús nna rèe na: Gutà tè lani inte', be'él·la' canu yattia' qui'ni ucáttsi' luetsi nu yatti qui.

23 Laníala nna gutà'a Jesús le' bárcaú. Ca enne' ruthète'niáa nna dia tè cabi lani e. 24 De repente taání nna huatha ttu iyyabe' fuerte lo indatù'a hàstaá qui'ni chi rurixia bárcaú nna chi calatsi'į inétsia le ìndaá, Jesús nna ti'áthi bée. 25 Làniana

ca enne' ruthète'niáa nna bedibàni chì cabi e nna ra cabi e: Señor, bèni xìa cuiq'lu' qui'ni l·lá rí'u porqui'ni chi rinetsi ri'u le' indì. ²⁶ Lèe nna rèe cabi: Biáni cca rátsini le ni'i, hualigani labí ríalatsi' le qui'ni inte' nna té la'huacca quia'. Làniana huàthèe nna gutitse'e bè'a a'hua indatù'a. Luego taá indatù'a nna beyàtta' chìa tsi. ²⁷ Acca uccuaỹí ya'ání latsi' cabí nna ra cabi: Núgani enní'ì acca hàstaba be' nna indatù'ì nna riyénini cã quì'e.

²⁸ Bitsina' diba Jesús attu ládula indatù'a ru'a loyu qui' ca enne' gadarenos, làniana chuppa canu cca padecer por ca espíritu malo nna beria cã le' bèlia làti bigátsi' canu yatti nna tattsa' cã Jesús. Laca nna yala túxu runi cã hàstaá qui'ni lanú nuỹa reyáỹani tté neda nía. ²⁹ Gunne cã iditsa na ra cã: Jesús Ÿi'ni Tata Dios, biáni té qui' lu' nì. Tsí da' chì lu' para guni lu' intu' castigar ántesca gál·la' tiempo cá. ³⁰ Idittu' tì'ba de nía nna tsè'e ttu montón ní ca cuttsi huìla go. ³¹ Ca espíritu malua nna gutta'yúni cã Jesús nna ra cã: Canchu ebèqquia lu' intu' fuera nna, bènna permiso qui'ni tsá' tu' gá'a tu' lani ca cuttsiã'. ³² Lèe nna rèe cã: Líttσία. Laca nna betsè'e latsi' quí chuppa ca nubéyu'á nna huía cã gutà'a tè cã lani ca cuttsia. Luégutaá nna uccua litsiani ca cuttsia nna gutù·lu cã lo ttu i'yatò' nn binnia cã le' indatù'a nn gùtti cã. ³³ Canu rappa ca cuttsia nna bigàa chì cã nna betsina' cã le' yetsia nna gutixà'a cã iyaba ti'ĩya ná nu uccua a'hua nu uccua lani chuppa ca nubeyu'a. ³⁴ Làniana biria chì itúbani yetsi para tattsa' cã Jesús. De bitsina' cã ru'a lúe nna gutta'yúni cã ne qui'ni erie látsi caniá.

9

1 Làniana beyappi Jesús le' bárcaá nna huíe attu lado indatù'a nna betsine'e le' yetsi qui'áa. 2 Tuchùppa ca enne' nna tahua' cã ttu nu rà'ni parálisis ru'a lúe, nìdirúbani làa cca ttã, yu'ã lè'e camilla. De gutelíni Jesús qui'ni yala fe té qui' ca nubeyu'a lani e nna ra tìe nu rà'nia: Gùppa confianza yì'nia', chĩa beyuniyén látsa'a' ca tul'la' qui' lu'. 3 Làniana tuchùppa ca maestro de la ley nna liú'u losto' bá qui' ra cã: Rinne nui ca titsa' nu ná qui'ni làteruba Tata Dios ínnié á'. 4 De gutelíni Jesús qui'ni anía rulaba latsi' qui', acca rée cã: Biánicca rulaba latsi' le nu labí ná tsè' ni'i. 5 Biála adí yánaba, tsí inia': Chì beyuniyén látsa'a' ca tul'la' qui' lu', o, tsí inia': Beyátha nna gùda', acca. 6 Pues annana gulué'nia' le qui'ni inte' Nubeyu' de Yíabara' nna té la'huacca quia' le' yétsiloyuì para eyuniyén látsa'a' ca tul'la'. Làniana rée paralíticuá: Beyátha nna bedi' camilla qui' lu'ã' nna beyya litsi' lu'. 7 Nu rà'niá nna beyátha chĩa nna deyyã litsi'ì. 8 De bilá'ni ca enní'a na yala biquila' latsi' qui', bedàliani cã Tata Dios qui'ni betìe luetsi la'huaqquì qui' ca enne'.

9 Gutte diba Jesús nía nna bilá'nie ttu nubeyu' láã Mateo ri'ã lo meÿa làti ría ca enne' huiÿa impuesto nu ruquiÿa gobierno. Lèe nna rée na: Gutà, tanó inte'. Matéuá nna gudulí tabã nna díã tiã lani Jesús. 10 Loti' re' Jesús lo meÿa le' yú'u nna bitsina' huá iyetse' canu ruquiÿa qui' impuestua nna ã'hua canu dãa tìtsa' qui' qui' labí rigua cã ca costumbre religiosa qui' ca judíua. Iyába ca nuá nna guÿua cã junto bá lo meÿa lani Jesús nna ca enne' ruthète'niáa nna. 11 Ca fariséua, de bilá'ni

ca qui'ni re' Jesús lani ca enni'a nna ra tè ca ca enne' ruthète'niáa: Biani cca ro Maestro qui' lía' lani canu ruquiya qui' impuesto a'hua lani adí canu tul·la' ni'i. ¹² Biyeni tēni Jesús nui nna rēe ca: Canu bihua rà'ni nna pues bihua riquína'ni ca nuya eyúniā ca, sino làteruba canu rà'ni riquína'ni ca médico. ¹³ Acca ligùl·la nna liuthète' biya nuā calatsi' Tata Dios làti rēe:

La' retúalatsi' calátsa'a',
alāa biya sacrificio ní.

Acca labí daya' para gaỹia' canu rulaba latsi' qui' qui'ni chi ná ca enne' tsè', sino daya la' para gaỹia' ca enne' tul·la' para qui'ni eyacca ca arrepentir.

¹⁴ Làniana ca enne' ruthète'ni Juan el Bautista nna bitsina' cabi ru'a lo Jesús nna ra cabi e: Intu' lani ca fariséua' teruba nna dàatiba runi tu' ayunar. Biani cca ca enne' ruthète' qui' cuiā'lu'ā' nna bihua rigua tí' ca làa ro ca. ¹⁵ Jesús nna becābinie cabi nna rēe: Tsí ina ri'u canu tsè'e thá'a nna yala triste tse'e ca miéntraste ènne'yu' ruttsaná'a du bá bi lani ca cá. Labí, pero huì'yu tsá qui'ni itua ènne'yu'a lani ca, laníalá nna guthà'na ca labí go ca por la' rehuiní'latsi'. ¹⁶ Lanú nuya regú'u remiendo ttu vestido viejo lani ttu pedazo lari' cubi, porqui'ni la'a mísmuba remiendo cúbía nna ichèda'ā lari' viéjua, anía nna adila iyàl·la' làti chi birèda'a. ¹⁷ Nihua labí rigá'a ca enne' vino cubi le' bolsa vieja nu de yeti; porqui'ni cáalá a' runi ca nna, entonces por fuerza qui' vino cúbía nna itsu' la ca bolsa yétiá nna ilàlia vínua, a'hua ca bolsa yétiá nna labiru iỹu' ca. Sino rigá'a la ca vino cubi le' ca bolsa yeti cubi, a' modo nna júntuba guchia bolsa yétiá lani vino cúbía.

18 Hua rinne cannabée ca tìtsa'a nna bitsina' ttu ènne'yu' rigú'ubia' le' yétsiá, beduŷibì ru'a lo Jesús nna ra ne: Chi' gùtti tegani ŷi'ni niula to' ya'a. Tsí huacca qui' cuià'lu' ita cuià'lu' guláppa' cuià'lu' cuerpo to' qui' niá nna eyaccabàni tabá. 19 Gudulí tè Jesús nna díe lani a, dia huá ca enne' ruthète'niáa. 20 Neda bá yu'ée nna taŷeni ttu niula ne. Chi uccua tsì'nu ida rà'niá réni. Lạ nna gubíga'a cuè'e lée beláppa'a ru'a ŷuéa. 21 Anía beniá porqui'ni liú'u losto' bíj nna ra: Canchu guláppa'a' màsqui'di ŷúe nna eyacca taá látsa'a'. 22 Bedeqquia tè lo Jesús nna gùnne'e na ra tìe na: Gùppa confianza ŷi'nia', chi rialatsi' lu' qui'ni té la'huacca quia', acca chi ná lu' salvo. Dèsideba lanía nna beyacca latsi' niuláa. 23 Làniana bitsina' Jesús litsi' nubeyu' principal qui' yétsiá nna bilá'nie ca músico a'hua alboroto nu runi ca enne'. 24 Lèe nna rèe ca: Líria càna tsàstìto' qui'ni niula cuiti'ì nna labí chi gùttiá sino ti'éthi bá. Pero laça nna burla la beni ca ne. 25 De chi benie mandado qui'ni éria ca enni'a nna gutè'e làti té niula cuití'a nna gutèl·lé'e ní'ì nna beyátha chà. 26 Gudà tè titsa' itúbani nía ti'ìŷa ná milagro nu beni Jesús.

27 Gutte diba Jesús nía, làniana chuppa ca enne' ciego nna tanó ca ne, ditsa tsè' rinne ca nna ra ca: Cuià'lu' ŷi'ni David, betúa latsi' cuià'lu' intu'. 28 Làniana Jesús nna de chi rì'e le' yú'u nna bitsina' ca enne' ciéguá ru'a lúe. Lèe nna rèe ca: Tsí hua ríalatsi' le qui'ni huacca te' gunia' nu rinàbani le inte' cá. Becàbi ca nna ra ca: Hua ríalatsi' tu' Señor. 29 Làniana beláppe'e íyyalo qui' nna rèe ca: Porqui'ni chi ríalatsi' le nna ccá bá tí' calatsi' le. 30 Luégutaá

nna bilá'ni çà. Làniana Jesús nna yala idí' gunènie çà rèe çà: Lihue' cuidado qui'ni nú ttu nuÿa ccá saber nui. ³¹ Pero lacà nna de beria çà nía nna bedà chì çà titsa' itúbani nía ti'iÿa tsè' ná milagro nu beniáa. ³² Merua reria çà fuera nna bitsina' tè attu te ca enne' ru'a lo Jesús tahua' çà ttu enne' ÿû nna ccà padecer por ttu espíritu malo. ³³ Benie mandado qui'ni éria espíritu malua lo losto' enne' múduá nna luégutaá guduluá gùnniã. Ca enne' nna uccuaÿí ya'ání latsi' qui' nna ra çà: Nunca labí chi bilá'ni ri'u guni ttu enne' luetsi ca milagruj le' nación qui' ri'u Israel. ³⁴ Pero ca fariséua nna ra la çà: Porqui'ni rul·luítsa'a nu ná huexana' qui' ca espíritu malo, acca rudàl·lã çà fuera.

³⁵ Jesús nna gurènie le' iyaba ca yetsi a'hua ca rancho to' nna gutixa'ánie ca enne' le' ca sinagógaá ca enseñanza cubi nna beni huée predicar evangelio nu rulue' ti'iÿa tsè' ná la' rigú'ubia' qui' Tata Dios. A'hua beyunie iyábani itsahue' nna gütue iyábani clase de ca dolor qui' ca enne' qui' ca yétsiá. ³⁶ De bilá'ni Jesús qui'ni yiÿi berèe' ni re' ca enne' nna, yala betúa latsi'e çà porqui'ni tsi'irúbani cani latsi' qui' nna gàtti' tsè'e bá çà tì'a ca carnero to' lanú pastor qui' qui' té. ³⁷ Acca rèe ca enne' ruthète'niáa: Hualigani iÿèniní lena' chi té para éÿu', átsi'ini tuchùppa rúbani ca obrero tsè'e. ³⁸ Acca linàbani Tata Dios enne' ná Xana' loyuj qui'ni ithèl·le'e adí ca obrero gutùppa çà lena' qui'e.

10

¹ Làniana gutàÿi Jesús tsì'nu ca enne' ruthète'niáa nna betie la'huacca qui' cabi sobre ca espíritu malo para qui'ni ebèqquia cabi çà fuera, a'hua para

qui'ni eyuni cabi iyábani itsahue' nna cúa cabi iyábani clase de dolor. ² Tsì'nu ca apóstol nna lá cabí íj: Primérute Simón lá huá bi Pedro, a'hua Andrés bettsi' bía, a'hua Jacobo ÿi'ni Zebedeo, lani Juan bettsi' bía nna, ³ Felípea nna, Bartoloméa nna, Tomas nna, Mateo enne' bequiÿa qui' impuesto nna, Jacobo ÿi'ni Alfeo nna, a'hua Lebeo enne' guta' huá lá bi Tadeo, ⁴ a'hua Simón enne' gulátsi' partido lq cananistas nna, a'hua Judas Iscariote nu betiã ne cuenta para gattie.

⁵ Loti' guthel·la' Jesús ca enne' tsì'nua nna betie consejo qui' cabi nna rè: Bittu tsía le lado qui' adí ca nación, nihua le' ca yetsi anta' le' distritu lq Samaria nna bittu gá'a le. ⁶ Sino tsía la le lani ca enne' Israel porqui'ni ná cã tì'a ca carnero to' nu chi gunitti. ⁷ De dia le nna guni le predicar ína le: Annana calatsi' Tata Dios qui'ni ca enne' nna hue'él·la' cã qui'ni quée enne' cu'úbia'nie cã. ⁸ A'hua ná qui'ni eyuni le canu ra'ni, a'hua canu rùtsu' láti qui' para eyacca cã nàri nna, guni le qui'ni eyátha canu yatti, a'hua ebèqquia le fuera ca espíritu malo. Chi ÿa guÿi' bá le la'huacca para guni le ca cosa', acca ná qui'ni ÿa guni bá le cã. ⁹ Bittu hua' le oro nihua bel·liu nu de plata, nihua nu de cobre, ¹⁰ nihua morral nu cu'u le biÿa go le. Nihua bittu cueda le guni le prevenido para hua' le chuppa cue' ÿo le nihua chuppa cue' guarachu, porqui'ni ttu obrero nna dacca' bã guni cã na sostener. Nihua làa theni le ttu yà para ccani le defender. ¹¹ Gaÿa tediba yetsi o rancho to' làti gá'a le, inàba titsa' le canchu hua dua ttu enne' ga'nã dispuesto guniã le atender; entonces níabá

ccá lugar qui' le hàsta'na gal·la' tsá eda' le le' yétsiá.
 12 Canchu chi gá'a le le' yú'u nna guni le çà saludar
 qui'ni gáta'ni çà la'ỹeni lo losto' qui'. 13 Canu tsè'e le'
 yú'u nna canchu gudà naga' qui' qui' le, làniana la'
 redacca'latsi' qui' le nna gata' huá qui' qui'. Pero
 canchu gutsìbi çà le nna, entonces egà'na çà sin
 bendición. 14 Nuỹa diba labí guniã le recibir le'
 litsi'ĩ nihua labí gudà nagui'ĩ ca titsa' qui' le nna,
 entonces ná qui'ni eria le le' yú'a o le' yétsiá, pero
 gucuibi tè bestè nì'a le, seña para télini çà qui'ni
 labí tsè' beni çà. 15 Hualigani te' riquixa'ánia' le
 qui'ni adila fuerte ccá la' tsialatsi' qui' Tata Dios nu
 chì da'la lani yétsiá tì'chula juicio nu uccua lani ca
 yetsi Sodoma nna Gomorra nna.

16 Ca lugar làti rithél·la'a' le nna té peligro, tì'a
 ca carnero to' tsè'e lahui' ca lobo. Acca ccá le listo
 tì'a ca bèl·là, à'hua ccá le humilde tì'a ca becha to'.
 17 Lihue' cuidado lani ca enne' porqui'ni tahua'
 çà le ru'a lo ca juez para guni çà contra le, à'hua
 hué' çà le lani cuarta le' ca sinagoga làti retuppa
 çà. 18 À'hua tahua' çà le hàstaá ru'a lo ca gober-
 nador à'hua ca presidente nna por causa de qui'ni
 riquixá'a le nu cca quia'. Anía modo nna gute le
 testimonio nu cca quia' ru'a lo qui' à'hua ru'a lo
 canu idittu'. 19 Canchu chi gudaxu' çà le preso
 nna bittu nùyue cani le ti'iyã ecàbi le, porqui'ni la'a
 mísmuba hora nna innia le' la' riyeni qui' le ca titsa'
 nu ná qui'ni inne le. 20 Porqui'ni álahua lebi'ĩ nuá
 inne, sino Espíritu Santo enne' ithel·la' Tata Dios
 qui' lía, lèe nna ínnié por medio de lebi'ĩ. 21 Ttu
 bettsi' nna gutiã cuenta la'a bettsi' bíj para gattiã,
 à'hua ttu tàta nna gutiã cuenta la'a ýi'ni bíj. Ca
 ýí'niá nna eyeqquia çà contra ca tàta nàna qui' qui'.

22 Iyaba cã nna guyudí' cã le porqui'ni riquixá'a le nu cca quia', pero canu guchia bá hàstaá fin de cca cã sufrir por inte' nna, làcanuá nna l·lá cã. 23 Canchu chi gutsia latsi' quí le le' ttu yetsi nna, lítsía telá attu yetsi huaya'. Hualigani te' nia' le qui'ni labí chi beyáni le tsía le iyaba ca yetsi qui' ca enne' Israel canchu chi gal·la' tsá il·lani Nubeyu' de Ýiabara' attu. 24 Nu ruthète' nna labí dacca'ã adiru tí'chu maestro qui' niá. Nihua ttu mozo nna labí dacca'ã adiru tí'chu xana' niá. 25 Basta qui'ni ttu discípulo nna ccã tí' ná maestro qui' niá. A'hua nu runi servir nna ccã tí' ná xana' niá. Ttu tãta nna, canchu téni cã lá bí: enne' malo nna, pues adí teerulá mal inne cã qui' ca familia qui' bi cá.

26 Acca bittu gátsini le cã, porqui'ni labí ttu cosa nu gattsí' té sin qui'ni làa ilá'niã, nihua biãa ttu secrétuni té sin qui'ni làa guni ri'u ã saber. 27 Nu riquixa'ánia' tsuã' teruba lebi'í le' chul·la nna, liguni ã declarar laní iyaba ca enne'. A'hua nu riyeni gattsí' bání le nna, lítsappi iqquia yú'u nna guyèni li ã. 28 Bittu gátsini le canu rutti cã cuerpo, pues bittu ccani cã gul·lùã cã latsi' le. Sino lígãtsi lání enne' té la'huacca qui'e gudál·lèe ca enne' lo yi'bél·laá, ã'hua cuerpo qui' quí. 29 Tsí álahua ritò'o chuppa ca bìnni to' por ttu moneda to' rúbá ca. Pero nidí ttuã labí inniã loyu sino por voluntad qui' Tata Dios qui' lía. 30 Hàstaá ittsa' iqquia le nna chi babànie iyáãiani cã. 31 Acca bittu gátsini le, porqui'ni adí telá dacca' le ru'a lo Tata Dios tí'chula iãetse' ca bìnni to'.

32 Nuãa diba gudàlianiã inte' ru'a lo ca enne' nna, ã'hua inte' nna gudàliani huá ya' ã ru'a lo Tata

quia' enne' dua ÿiabara'. ³³ Pero nuÿa diba ettú'niã quixá'ã nu cca quia' ru'a lo ca enne' nna, a'hua inte' nna ettú' huá te' guni ya' a' presentar ru'a lo Tata quia' enne' dua ÿiabara'.

³⁴ Bittu cani le qui'ni inte' nna daya' para qui'ni bíttuúru ccá chuppa la' rulábalatsi' le' yétsiloyu. Labí daya' para qui'ni bíttuúru til·la ca enne' sino ccá la cã dividir por causa de inte'. ³⁵ Acca por causa de inte' nna til·la ca enne' entre familia: ttu ÿi'ni contra tàta qui'ì, ttu ÿi'ni niula contra nàna qui'ì, ttu ÿòlitsi' contra suegra qui'ì. ³⁶ Pues ca contrario qui' ttu nubeyu' nna ccá cã la'a mísmuba canu le' yú'u qui'ì. ³⁷ Nu catsi'íniã tàta nàna qui'ì adiru ti'chu catsi'íniã inte' nna, entonces labí ccã merecer thá'ã lani inte'. A'hua nu catsi'íniã ca ÿi'ni adiru ti'chu catsi'íniã inte', entonces a'hua labí ccã merecer thá'ã lani inte'. ³⁸ Nu labí ga'nã dispuesto ccã padecer hàstaba canchu gútti ca enne' na porqui'ni denúã inte', entonces labí dacca'ã para ccã enne' quia'. ³⁹ Nuÿa tediba dua iqquì etúa latsi'ì la'labàni qui'ì nì nna, pues lã nna gunittã la'labàni nu adiru dacca' para despuéslá. Pero nu iria latsi' la'labàni qui'ì hàstaá canchu gattã porqui'ni denúã inte' nna, lã nna ccabàni láã.

⁴⁰ Nu guniã le recibir le' litsi'ì nna, entonces ti'atsi inte' bá nuá runiã recibir. A'hua nu runiã inte' recibir nna, runi huá recibir Tata Dios enne' guthel·le'e inte'. ⁴¹ Nu runiã recibir ttu profeta porqui'ni nã enne' rinne parte Tata Dios nna, entonces tulappa bá ná la'dàliani thí'ã lani nu gute Tata Dios qui' profétaá. A'hua nu runiã recibir ttu enne' quia' porqui'ni runiã nu ná tse', entonces lã nna luetsi premio qui' enni'a huá thí'ã. ⁴² A'hua

nuña diba gutiã biña tediba cosa màsqui'di ttu vaso inda dil·la' qui' nuña ttu canu xcuichu tú'ï porqui'ni ná cã huenitsina quia', pero inte' nna nia' le qui'ni hualigani labí iỹul·lani Tata Dios na.

11

¹ Beyacca diba gutixa'áni Jesús tsì'nu ca discípulo qui'áa ti'ïya ná nu guni cabi, bede'e nía nna huíe huequixà'a le' ca yetsi anta' nía nna benie predicar. ² Litsi' iyyà bá té Juan el Bautista nna bina bi iyábani nu beni Cristua, acca guthel·la' bi chuppa ca enne' ruthète' qui' bía làti rènie. ³ Gunaba titsa' cabi e nna ra cabi: Tsí cuiã'lu' Cristo enne' ná qui'ni ìta, o tsí cueda tu' attu enne' huaya' áccá. ⁴ Becàbi Jesús nna rèe ca enne' dia mandado qui' Juáan: Leyya liute razón lani Juáan ca cosa nu riyénini le nna ca milagro nu rilá'ni le nna. ⁵ Gá le bi qui'ni ca ciego nna rilá'ni cã; ca cojo nna rida' cã; canu rùtsu' láti quí nna reyacca cã nàrì; canu cuètsu nna riyénini cã; canu yatti nna reyacca bàni cã; ca enne' humilde nna chi runa cã ca titsa' nu runna salvación qui' quí. ⁶ Ica'rubà canu bittu redúl·la'a latsi' quí lani inte'. ⁷ Bedà' diba cã nna làniana gudulo Jesús riquixé'e nu cca qui' Juáan lani ca enne' nna rèe: Biani nua' calatsi' le úhuia' le acca biria le fuera yetsi cá. Tsí huia' le tanna' le ttu nubeyu' variable nu rudu chùppaniã latsi'ï cá. Labí. ⁸ Biani biria le tanna' le. Tsí ttu enne' nu yala tsè' de ÿúj áccá. Canu raccu' ÿo fino quí nna, pues le' palacio qui' ca enne' dacca' tsè'e cã. ⁹ Acca, biani biria le tanna' le áccá. Tsí ttu enne' ná profeta áccá. Hualigani qui'ni biria le iyénini le qui' ttu mensajero nu adírula enne' ÿeni ti'chu

ttu profeta. ¹⁰ Porqui'ni qui' bi nuą' riquixá'a Tata Dios làti ga'na escrito:

Ni rithél·la'a' mensajero quia', deneru bi lo lu',

Para ithàlia bi neda para guni ca enne' lu' recibir.

¹¹ Hualigani nia' le qui'ni de lo iyábani ca enne' nna, lanú chi gùdua ccą adiru enne' ýeni ti'chu Juan el Bautista. Pero canu bitote le' reino qui' ýiabara' nna, pues adila enne' ýeni ná cą tì'chula Juáan. ¹² Dèsideba loti' gudulo Juan el Bautista hueni predicar hàstaba anna, iyáyiani ca enne' nna

yala rue' latsi' quį gá'a cą le' la' rigú'ubia' qui' Tata Dios; canu violento nna runi cą duel·la' thí' cą na. ¹³ Porqui'ni iyaba ca profeta nna ą'hua ca

enne' bedia ley qui' Tata Dios nna gutixá'a cabi nu chì' ccálá, ą' beni cą hàstaá qui'ni gul·lani Juáan.

¹⁴ Canchu calatsi' le gudà naga' le qui' bi nna, làbi nuá Elías enne' ná qui'ni ìta. ¹⁵ Nu calatsi' télinią nna gudà nagui'į adí. ¹⁶ Acca, núní tì'na gunia' comparar ca enne' tsè'e anna cá. Ná cą tì'a ná

ca huatsa cuíti' nu rucuetsi cą flauta qui' quį lo neda nna rul·luítsa' cą iditsa ca luetsi huatsa quį,

¹⁷ rena cą: Chi becuétsi tu' pieza alegre nna, pero labí bedácca'ni le. Chi hua bìl·la tu' qui' enne' yatti, pero ñihua làa gurètsi le. ¹⁸ Anía nia' le, porqui'ni

bìta Juáan nna gurèni bi rigua bi labí gu'ya gutó bi bicca'áyá, pero rena la ca enne' qui'ni espíritu malo nna duą lani bi. ¹⁹ Gul·lani tehuá Nubeyu' de

Ýiabara' ri'ya ro bée lani iyaba ca enne' nna redena la cą: Nui nna puro go bá nna gu'ya bá nna runią ą'hua yala catsi'ą canu ruquiýa qui' impuesto nna ą'hua adí canu hueni tul·la' nna. Pero nia' le qui'ni canu runi obedecer la' riyeni tsè' nu da' de ýiabara'

nna, laçá nna rulue' rábani çá por ca hecho tsè' qui' qui.

²⁰ Làniana Jesús gunnie idí'ni contra ca yetsi làti chi benie adí iýé ca milagro, porqui'ni labí beni çá reconocer qui'ni ná çá enne' tul·la' delante de Dios, acca rèe çá: ²¹ Airu lu' yetsi Corazín nna Betsaida nna, porqui'ni cáalá le' ca yetsi Tiro nna Sidón nna uccua ca milagro canu chi uccua lani lebi'ì, pues cuando lání chi gùccu' çá lari' corriente nna bedua tte iqquia qui' seña de qui'ni reyacca çá arrepentir por ca tul·la' qui' qui. ²² Acca nia' le qui'ni de gal·la' tsá juíciua nna huaýia' la castigo tsía canu yetsi Tiro nna Sidón nna tì'chula lebi'ì. ²³ A'hua lu' nna yetsi Capernaum, màsqui'ba hàsta rúbani ýiaba rulaba latsi' lu' ri'yu la' dàliani qui' lu', pero hàsta rúbani ýàrèe' èxxá lu'. Porqui'ni cáalá le' yetsi Sodoma uccua ca milagro canu chi uccua lani lu' nna hualigani hàstaba anna àtsaba rì'a. ²⁴ Acca riquixa'ánia' le qui'ni de gal·la' tsá juíciua nna huaýia' la castigo tsía canu yetsi Sodomò tì'chula lebi'ì.

²⁵ Laniataá nna beni Jesús oración nna rèe: Cuiá'lu' Tàta quia' enne' té làtsi' né'e itute la'huacca qui' ýiabara' a'hua qui' yétsiloyu, quiýarú cuiá'lu' porqui'ni canu yala la' riyeni té qui' qui' nna labí rue'el·la' cuiá'lu' qui'ni gunibia' çá ca enseñanza tsì'ì nihua lani canu rulaba latsi' qui' qui'ni yala ritelíni çá. Pero lani ca huatsa to' la nna chi beni cuiá'lu' çá declarar. ²⁶ A'ba beni cuiá'lu', porqui'ni anía guyú'u latsi' cuiá'lu'. ²⁷ Làniana ra Jesús canu tsé'e nía: Iyába ca cosa nna chi benna Tàta qui'a làtsi' nàya'. Lanú nuýa nabiá'niá Ýi'ni Tata Dios sino làteruba Tàtáa nna nabiá'nie bi. Lanú nuýa

nabiá'niá Tàtáa sino Yí'niáa, a'hua iyaba canu calatsi' Yí'niáa gunie declarar Tàtáa lani ca. ²⁸ Iyaba le canu rue' la' dí'latsi' le de nùà'ni le yua' ìdi'i nna, lità lani inte' porqui'ni inte' nna gunia' qui'ni èdi' latsi' le. ²⁹ Liguni la aceptar yugu' nu té quia' para lebi'ì, a'hua lícca canu ruthète' quia' porqui'ni ná maestro yénlatsi' nna labí ititsi te' le. A' modo nna gatà'ni le la'yeni nu riquína'ni le. ³⁰ Porqui'ni fácil taá ná yugu' nu té quia' para lebi'ì, a'hua yiyi dèbá ná yua' nu gunna' huá'ni le.

12

¹ Tiempo làniana gutte Jesús làti té yua'. Tsá lanía nna uccua tsá redi' latsi' ca enne' judíua. Ca discípulo qui'áa nna gutuni cabí, acca guchèccu' cabi tuchüppa yua'xtíla, beni tsè' tè cabí ca nna gutò cabí. ² De bilá'ni ca fariséua nna ra chì ca ne: Gunna' tsáruhua ca discípulo qui' lu'a' qui'ni runi ca ttu tsina nu labí ná qui'ni guni ri'u natsa. ³ Lèe nna rèe ca: Tsí bíhuani' gul·la le làti riquixá'a biyá beni rey David loti' gutuni bi lani ca enne' tsè'e lani bía. ⁴ Gutà'a bi le' templo qui' Tata Dios nna gutò bi ca ettaxtíla nu ná ofrenda para Tata Dios màsqui'ba labí ná qui'ni go bi ca nihua canu tsè'e lani bía nna. Làteruba ca sacerdotéa ná qui'ni go ca ettaxtílaá pero bíhua beni Tata Dios bi juzgar qui'ni nà tul·la'. ⁵ Tsí bíhuani' gul·la le lo ley qui' ri'u làti ra qui'ni ca sacerdotéa màsqui'ba runi ca tsina le' templua tsá yeni nna, pero bihua ra qui'ni rigú'u ca falta por nuá. ⁶ Inte' nna nia' le qui'ni nì du ttu enne' adírula dacca' tì'chula templua. ⁷ Liudà naga' le nu ra Tata Dios:
La' retúalatsi' calátsa'a' para ca enne',

Alàa biŷa animal nu guni le ofrecer por inte'. Cáalá rennia le cuenta biŷa nuá', entonces labí la juzgar runi le canu làhuabi mal runi ca. ⁸⁻⁹ Porqui'ni Nubeyu' de Ŷiabara' nna téla' rigú'ubia' qui'e lo iyábani ca tsá màsqui'ba labí ná tsá para guni ri'u tsina. Gutte bá Jesús nía nna bitsine'e le' sinagoga qui' caniá. ¹⁰ Nía nna re' ttu nubeyu' gubitsi ya'abá ná' bànj. Gunàba titsa' tè ca Jesús para qui'ni gappa ca neda biŷa caúsani gutsia ca qui'e, acca nna ra ca: Tsí hua ná tsè' eyuni ri'u ttu enne' rà'ni tsá labí ná qui'ni guni ri'u tsina cá. ¹¹ Becabínie ca nna rèe: Canchu nuŷa ttu le du ttu carnero to' qui'j nna inniá le' yeru, tsí bihua ucàa ná' le nna ebèqquia li a màsqui'ba labí ná tsá qui'ni guni ri'u biŷa tsina. ¹² Tsí álahua adírula ðacca' ttu enne' ru'a lo Tata Dios ti'chu ttu carnero cá. Acca hua ná bá qui'ni guni ri'u tsè' qui' ttu enne' màsqui'ba labí ná tsá tsina. ¹³ Làniana ra tìe nubeyu' rà'nia: Bèl·líí ná' lu'. Lạ nna bèl·líí taá ní'j. Làniana beyacca chì ná' niá tsè' tì'ba ná attu lado. ¹⁴ Beria bá ca fariséua nna gunne lettia ca ti'iyala modo gútti ca Jesús.

¹⁵ De gutelíni Jesús nui nna bede'e nía. Ca enne' ŷetse' nna tanó ca ne. Lèe nna beyunie iyaba canu rà'nia. ¹⁶ Làniana yala recomendar benie ca qui'ni nú ttu tehuá nuŷa quixá'ani ca qui'ni benie ca milagrua. ¹⁷ Anía modo nna uccua cumplir nu ra Tata Dios lo libro nu bedia enne' uccua profeta loti' rèe:

¹⁸ Nìba du enne' chi becuí'a' para quée huenitsina quia' nna yala catsi'í ti' e, a'hua yala agradar cani latsi' lóstu'a' por lèe.

Ithél·la'a' Espíritu quia' sobre lèe para qui'ni equixá'anie iyaba ca nación ca títisa lí.

19 Labí ilidèe pleito lani ca enne', nihua labí ínnie iditsani para qui'ni gudàliani ca enne' ne, nihua labí tá'béba cuenie lo ca néda.

20 Ttu yà to' nu chía rirèccu' tè nna labí quitta telée na;

à'hua ttu lámpara nu átito' rúbá cani latsi'ì nna labí guthola telée na, sino runi lée iyaba canu débil cualani.

Anía gúnié hàstaá qui'ni itute nu ná lí nna cça vencer le' itute yétsiloyu.

21 A'hua ca enne' qui' adí ca nación nna gappa cça confianza lani lèe.

22 Làniana tahua' cça ru'a lo Jesús ttu nu cca padecer por ttu espíritu malo, nà ciego nna mudo nna. Lèe nna beyunie na, lą nna bilá' chinią nna gunne chía nna. 23 Iyaba ca enne' tsè'e nía nna biquila' latsi' qui' nna ra luetsi qui: Tsí enni'ì yā nuá Yī'ni David enne' ná qui'ni ita cá. 24 De biyeni báni ca fariséua qui'ni ra ca enne' anía, acca ra tè cça: Nui nna runiā qui'ni eria ca espíritu malo, pero runiā na lani la'huacca qui' Beelzebú la nu ną nu rigú'ubia' entre adí ca espíritu malua.

25 Pero Jesús nna gutelí taánié la' rulábalatsi' qui' qui' nna rèe cça: Canchu nuỹa ttu gobierno lá'aní la' rigú'ubia' qui'ì nna til·la tìą contra la'a labíj nna, entonces l·luỹa tabá latsi'ì. A'hua ca enne' qui' ttu yetsi o ttu familia, canchu lá'aní luetsi qui' nna, entonces huaỹia' gáarúbá itsá tsé'e cça. 26 A'hua Satanás nna cáalá rudal·lą fuera ca huenitsina qui'ì nna entonces contra la'a labíj rital·lą. Canchu à' runiā nna, ti'ala modo cue' tsittsì la' rigú'ubia'

quì'ì cá. ²⁷ Cáalá por medio de Beelzebú runia' mandado ca espíritu malo qui'ni eria ca, entonces canu ruthète'ni lía nna, núlá por la'huacca qui'ní rudal·la ca fuera ca espíritu malo cá. Acca por nu runi la'a mísmuba canu ruthète' qui' le nna rulue'ní qui'ni yala enne' equivocado ná le. ²⁸ Pero por la'huacca qui' Espíritu Santo runia' mandado qui'ni eria ca espíritu maluá', acca hualigani qui'ni chi gul·lani la' rigú'ubia' qui' Tata Dios lani le. ²⁹ Porqui'ni ti'ani modo cueqquia ttu enne' biŷa té le' yú'u qui' attu enne' sin qui'ni làa gudaxu' ŷá xana' yú'a nna guxiqquia bi cá. Laníala nna hualaniá cueqquia iyate nu té le' yú'u qui' bi. ³⁰ Nu labí du lani inte' nna, contra la inte' duá. A'hua nu labí rutuppá lani inte' nna, runittilo lá. ³¹ Acca nia' le qui'ni iyábani tul·la' nu runi ca enne' nna a'hua iyábani ca titsa' mal nu rinne ca nna té bá perdón qui' qui. Pero canu rinne biŷa titsa' mal ni contra Espíritu Santo nna, entonces labí perdón té qui' qui, nihua tiempo tsè'e ri'uì nihua tiempo nu chì' da'la nna. ³² A'hua nuŷa diba inne biŷa titsa' mal ni contra Nubeyu' de ŷiabara' nna, hua té bá perdón qui'ì. Pero nu inne biŷa titsa' mal ni contra Espíritu Santo nna, entonces labí gata' perdón qui'ì, nihua tiempo tsè'e ri'uì nihua tiempo nu chì' da'la nna.

³³ Canchu rena le qui'ni ttu yà fruta ná tsè', pues ná qui'ni gunná fruto tsè' canchu hualigani ná ttu yaga nu riŷu'. A'hua canchu rena le qui'ni ttu yà fruta ná malo nna, entonces nihua fruto nu runná labí riŷu'á. Porqui'ni ttu yà nna redacca' rabánia por ca fruto nu runná. ³⁴ Yala mañoso ná le tì'a ca bèl·là. Ti'ani modo inne le ca titsa' nu ná ca tsè'

canchu puro taá mal bá ná la' rulábalatsi' qui' le cá. Porqui'ni ti'ba cani latsi' losto' ttu enne' nna, á' bá ná nu rinnia. ³⁵ Por ejemplo, ttu enne' tsè' nna, cani latsi' lostu'ì nu ná tsè', acca rinnia ca titsa' nu ná tsè'. Pero ttu enne' mal nna, cca báni latsi' lostu'ì nu ná mal, acca rinnia ca titsa' mal. ³⁶ Inte' nna nia' le qui'ni iyábani ca titsa' nu labí riŷu' nu rinne ca enne' nna, pues té qui'ni gute çà cuenta canchu chi gal·la' tsá juíciua. ³⁷ Porqui'ni por la'a mísmuba ca titsa' qui' lu' nna iria nàri lu', á'hua por la'a mísmuba ca titsa' qui' lu' nna ccá lu' condenar. ³⁸ Làniana tuchùppa canu yala tsè' nabia'ni çà nu ra lo ley, á'hua tuchùppa ca fariséua nna ra çà ne: Maestro, calatsi' tu' ilá'ni tu' ttu señal nu gulue' qui'ni té la'huacca qui' cuiá'lu' nu dá'á de ŷiabara'. ³⁹ Lèe nna becàbie nna rèe çà: Canu tul·la' tsè'e anna pues chi biŷul·lani çà enne' cats'ínie çà, acca chì' rinàba la çà ttu milagro ŷeni para cáŷelatsi' qui'. Pero labí biŷa señal ni ilá'ni çà sino làteruba nu chì uccua lani Jonás enne' uccua profeta tiempo antigua. ⁴⁰ Porqui'ni ti'a Jonás nna guyú'u bi por tsunna ubitsa nna tsunna yèla nna lè'e bél·la ŷéniá porqui'ni gutàbiá bi enteru taá, á'hua Nubeyu' de ŷiabara' nna tsu'u huée lè'e guna' por tsunna ubitsa nna tsunna yèla nna. ⁴¹ Ca enne' qui' ciudad Níniveá nna eyátha çà lani le canchu chi gal·la' tsá juíciua nna cueqquia huá çà sentencia qui' le; porqui'ni laçà nna beyacca çà arrepentir por ca tul·la' qui' qui' de biyénini çà predicación qui' Jonás. Pero entre lebi'ì nna du ttu enne' adila dacca' ti'chu Jonás, pero labí rudà naga' le qui'e. ⁴² Á'hua niula gulú'ubia' itute lado sur ttu cuaŷa nuá nna,

eyátha huá lani le canchu chi gal·la' tsá juíciua nna gutsiá causa qui' le para thi' le castigo; porqui'ni idittu' tsè'ni huíá para iyéniniá ituba la' riyeni tsè' qui' rey Salomón. Pero entre lebi'í nna du ttu enne' adila sabio tí'chula Salomón, pero labí rudà naga' le qui'e.

⁴³ Ttu espíritu malo canchu chi betsè'e latsi'í ttu enne' nna, làniana ribèni lo be' bą ca lugar bitsi hueyila gaỹa edi' latsi'í pero labí ritaxácca'ą.

⁴⁴ Acca caniá: Eyèqquia ca'á' litsá'a' làti gudáyá ya'a. Canchu chi etsina'ą nna ilá'niá qui'ni enni'a nna ná tí'a ttu yú'u nu nettia bą pero chi lúba rabą nna yala tsè' chi ná arreglado. ⁴⁵ Làniana tsiá taxi'ą agàtsi ca demonio adila mal tí'chu lą nna gá'a tè iyaba cą lo losto' enni'a nna xúa cą nía. Làniana adí teérula peor ccá la' tté qui' enni'a tí'chula néruá.

⁴⁶ Hua rinne canna báni Jesús ca enni'a nna bitsina' tè nàna qui'áa nna ca bettsi'áa nna ribèda cabi e fuera, calatsi' cabi inne cabi lani e. ⁴⁷ Gutixà'a tènì ttuą ne nna rą: Nàna qui' cuią'lu'a lani ca bettsi' cuią'lu'a nna tsè'e cabi fuera calatsi' cabi inne cabi lani cuią'lu'. ⁴⁸ Becàbi Jesús nna rèe na: Nuni nuą' ná nàna quia' nna ca bettsi'à' nna cá. ⁴⁹ Làniana gulitha tè né'e belui'e ca enne' ruthète'niáa nna rèe: Ca nui ná ca bettsi'à' nna nàna quia' nna. ⁵⁰ Porqui'ni nuỹa tediba runi nu rú'ulatsi' Tata quia' enne' dua ÿiabara', pues lanuá ná bettsi'à' nna dána'a' nna nàna quia' nna.

13

¹ Tsá lanía nna biria Jesús le' yú'u nna huíe gùri'e ru'a indatù'a. ² Bitùppa tè iỹetse' ca enne' ru'a indatù'a làti ri'áa. Lèe nna gutè'e le' ttu barco

nna guduánie nna gunne'e cą nna, ³ gutixa'ánie cą iŷetse' ca comparaci3n nu cca qui' y3tsiloyuŷ nna ŷiabara' nna r3e: Ttu campesino nna dŷa huedal·la ŷua'. ⁴ De chi yu'ą huedal·la ŷu'a nna binnia tŷ' ŷua' qui' niá cuitta' neda. Huadi t3 ca binni to' nna bediga' cą ŷu'a. ⁵ Atŷ' ŷu'a nna binnŷ le' ŷyyarru3e lāti labŷ tegá guna' re'. ŷu'a nna gul·lani tabá porqui'ni labŷ itettia ga re' guna'. ⁶ Làniana gul·lani bitsa nna beqqu3xu' taą ŷu'a nna gubitsi taą, porqui'ni labŷ itettia ga dŷa l·lú. ⁷ Atŷ' ŷu'a nna binnŷ lāti yu'u huá l·lú ca yettse'. Pero ca yettsi'a nna gul·lani tehuá cą nna bedibàga' taá cą lo ŷu'a. ⁸ Pero átŷ' ŷu'a nna binnŷ le' loyu bèbe lāti benna tŷa l3nà' ts3: ttuą gayua' nna, áttuą gayu'na' nna, attuą tsŷi 3rua' nna. ⁹ Nu calatsi' t3lini nna gudà naguŷ'ŷ adŷ.

¹⁰ Làniana gubiga' ca discŷpulo qui'áa nna gunaba titsa' cabi e nna ra cabi: Biecca rin3ni cuią'lu' ca enne' puro taá lani ejemplo cá. ¹¹ Becàbie nna r3e cabi: Porqui'ni lebi'ŷ teruba ná qui'ni t3lini le ca cosa nu cca qui' la' rigú'ubia' qui' Tata Dios nu labŷ chi bina ca enne' antes. Pero lacą nna labŷ ná qui'ni t3lini cą ca cosŷ. ¹² Porqui'ni nuŷa diba t3 iŷeni qui'ŷ nna, entonces lą nna gunŷa recibir adila iŷeni. Pero nu labŷ t3 qui'ŷ nna, pues hàstaba tito' nu t3 qui'ŷ nna ítua telá. ¹³ Por nui nna acca rin3ni ya' cą puro lani ejemplo bá; porqui'ni hua rinna' bá cą pero labŷ rilá'ni cą, ą'hua hua rudà naga' qui' nna pero labŷ riy3nini cą nihua labŷ ritelŷni cą. ¹⁴ Nŷ nna cca cumplir lani lacą nu riquixá'a Tata Dios lo libro nu bedŷa Isaiás enne' uccua profeta nna r3e: Màsqui'ba gudà naga' le pero labŷ t3lini le.

Màsqui'ba tetsùni inna' le pero nihua labí ilá'ni le.

¹⁵ Porqui'ni ca enne' tsè'e le' yetsj nna chi bitechuní cą tul·la'.

Riyénini cą pero yala tàbi cani cą.

Chi bethàya lo quj para qui'ni làa ilá'ni cą.

Chi bethàya naga' quj para qui'ni làa iyénini cą.

Anía runi cą para qui'ni làa tsíalatsi' quj, nihua làa eyeqquia cą lani inte', para qui'ni gudilá ya' cą de ca tul·la' qui' quj.

¹⁶ Jesús nna beni bée seguir nna rèe: Ica'rubà le por nu rilá'ni le nna riyénini le nna. ¹⁷ Hualigani te' nia' le qui'ni iyetse' ca profétaá ą'hua adí ca enne' canu beni nu rú'ulatsi' Tata Dios nna, yala gudà latsi' cabi ilá'ni cabi nu rilá'ni le, pero labí bilá'ni cabi ą. Uccua huá latsi' cabi iyénini cabi ca titsa' nu riyénini le, pero labí biyénini cabi cą.

¹⁸ Liudaáruhuá naga' le enseñanza acerca de enne' rudal·la yú'a. ¹⁹ Yua' nu binnia cuitta' nédaá nna ccą comparar nu riyénini titsa' nu cca qui' la' rigú'ubia' qui' Tata Dios, pero labí ritelínią na, entonces ril·lani tè numalua nna riguą ca titsa' nu biyada lo lòstu'j. ²⁰ ą'hua yua' nu binnia le' iyarruéa nna ccą comparar nu riyénini ca tìtsi'j nna luego taá ríalatsi'j nna yala redácca'nią. ²¹ Pero labí re' tsittsì ga latsi'j, acca tito' rúbá bechią, porqui'ni de gul·lani ca prueba lani ą nna rutsia latsi' ca enne' na porqui'ni ríalatsi'j quia', entonces luego taá redúl·la'a latsi'j. ²² Yua' nu binnia le' yèttsi'a nna, ccą comparar nu rudà naga' ca tìtsi'j pero yala nùyue canią por nu cca qui' bíj, ą'hua la' dàlatsi' qui' yétsiloyuj nna ruthàga' tabą ca tìtsi'j lo lòstu'j, acca labí lènà' tsè' runna cą para Tata Dios. ²³ Pero

ỹua' nu binnia le' loyu bèbèa nna, cça comparar nu riyénini nna ritelí huániã ca tìtsi'ĩ nna runnã ttu lènà' tsè', tì'a ca ỹua' nu guyú'u lè'e quĩ gayua' nna gayùna' nna tsìi érua' nna.

²⁴ Gutixà'a tènie cabí attu ejemplo nna rèe: Reino qui' Tata Dios nna cca huá comparar tì'a ttu enne' nu bedal·la bi semilla tsè' gani le' loyu qui' bi. ²⁵ Pero de lo ti'áthi ca mozo qui' bía nna bítã contrario qui' bía nna bedal·lã ỹubànaba' le' loyu làti chi té ỹua'xtílaá, làniana bedà' tiã. ²⁶ De chi té ỹú'a nna da' tehuá riduã ettse', pero bilá' huání qui'ni gul·lani ỹubànaba' le' lóyúa. ²⁷ Làniana ca mozua nna betsina' cã ru'a lo xana' caniá nna ra cã: Señor, tsí álahua semilla tsè' bedal·la cuiã'lu' le' loyu qui' cuiã'lu'a cá. Tì'ala modo acca té huá ỹubànaba' cá. ²⁸ Becàbi xana' ỹú'a nna ra bi: Ttu contrario benia na. Làniana ca mozua nna ra cã bi: Tsí hua calatsi' cuiã'lu' tsá' tu' nna tál·latsu' tu' ỹubànabá'ã' áccá. ²⁹ Enni'a nna becàbini bi cã nna ra bi: Bittua chì, porqui'ni nicà'chu tiempo de ril·latsu' le ỹubànaba'a nna íl·latsu' huá le ỹua'xtíla. ³⁰ Adila tsa' cueda ri'u iỹeni cã júntuba hàsta'na gal·la' tsá éyu' lènà', lànialá nna épa'a' canu echu ỹú'a: Lechù ỹá ỹubànabá'ã' nna liuỹiga' ã nna, liguni ã manajo para tsayaã, làniana edi' le ỹua'xtíla' nna cúa li ã le' yú'u quíya'a.

³¹ Gune huánie cabí attu ejemplo nna rèe: Reino qui' Tata Dios nna nã tì'ná bétsi' to' qui' ttu clase de cuàna nu guỹi' ttu enne' nna gudã na le' loyu qui'ĩ. ³² Bétsi' tú'a nna adí telá xcuichu to' nã de lo iyaba ca semilla. Pero de chi gul·laniã nna biỹeniã nna ritè láã lo iyaba ca planta hàstaá qui'ni ca binni to' tsè'e lo be' nna rutsia xcu'ni quĩ lúĩ.

³³ Gutixà'a tehuánie cabi nna rèe íj: Reino qui' Tata Dios nna ná tì' ná levadura nu guŷi' ttu ni-ula nna gulù'ua na le' tsunna yà almudo yedia. Luégutaá nna beyaŷilo ituba cúaa.

³⁴ Gutixa'áni Jesús ca enni'a iyaba ca enseñanzaá puro lani ejemplos. De ruthète'nie ca enne' nna beni bée comparación de ttu cosa qui' yétsiloyu lani ttu cosa de ŷiabara'. ³⁵ Anía modo nna uccua cumplir nu gune ttu enne' uccua profeta tiempo lania nna ra bi: Quíxa'a' lani comparación para ethátsila'nà' ca enseñanza nu gattsì' bá dèsdeba loti' uccua yétsiloyu.

³⁶ Làniana bechu titsa' Jesús ca enni'a nna bet-sine'e le' yú'u. Gubiga' tè ca discípulo qui'áa nna ra cabi e: Bethàtsilà'na bálani cuiã'lu' intu' comparación qui' ŷubànaba'a nu gul·lani le' lóyúa. ³⁷ Becàbie nna rèe cabi: Nu rudal·la semilla tsè'a nna née Nubeyu' de ŷiabara'. ³⁸ Loyu làti huía ŷú'a nna ccã comparar itúbani yétsiloyu. Pero ŷua' tsè'a nna ccã comparar ca ŷi'ni Tata Dios. ŷubànaba'a nna ccã comparar ca ŷi'ni numalua. ³⁹ Contrario nu bedal·la ŷubànaba'a le' lóyúa nna ná la'a mísmuba numalua. Tiempo lènà'a nna ná fin qui' yétsiloyu. Canù rutuppa lènà'a nna ná cabi ca ángel. ⁴⁰ Acca, ti'ba ril·latsu' ŷubànaba'a nna ríã lo yi' para tsaya, a' bá ccá canchu chi il·lani fin qui' tiempo tsè'e ri'uì. ⁴¹ Nubeyu' de ŷiabara' nna ithel·le'e ca ángel qui'e para gutuppa cabi de le' reino qui'e iyaba canu runi qui'ni innia ca enne' le' tul·la', a'hua iyaba canu runi bíŷaáru mal nna. ⁴² Làcabi nna gudal·la tè cabi cã le' horno yi'; nía nna ccá cã sufrir nna cuetsi cã nna góya'atsùni laya' qui'. ⁴³ Pero ca enne'

beni tsè' nna, pues yala enne' dacca' ccá cạ le' la' rigú'ubia' qui' Tàta qui' quị nna ccá titti cạ tì'a rudàni' bitsa. Nu calatsi' télini nna gudà nagui'ị adí.

⁴⁴ A'hua reino qui' Tata Dios nna nạ tì' ná ttu tesoro gattsì' le' ttu loyu. Betseláni ttu enne' na, pero begattsì' bạ na attu vuelta. De tantua redácca'niạ nna beyyạ nna bètti'ạ iyate nu té quì'ị nna huì'ịạ lóyúa.

⁴⁵ A'hua reino qui' Tata Dios nna nạ tì' ná ttu enne' runi negocio reyilạ ca perla tsè'ni. ⁴⁶ De bilá'niạ ttu perla latsitte ni nna beyyạ nna bètti'ạ iyate nu té quì'ị nna huì'ịạ pérlaá.

⁴⁷ A'hua reino qui' Tata Dios nna nạ tì' ná ttu exxa nu rudaxu'ni cạ bél'lá. Rudal'la cạ na le' indatò' nna rudaxu'ạ iyábani clase de bél'lá. ⁴⁸ De chi bitsa' èxxaá nna reyèl'la' cạ na rú'alá. De chi ÿuani cạ nna redi' cạ nu ná tsè', pero canu labí ná tsè' nna riru'na bá cạ cạ fuera. ⁴⁹ A'hua ccá canchu chi l'luỹa latsi' yétsiloyuị: íl'lani ca ángel nna gútse'e cabi ttu lado ca enne' beni mal, pero attu lado nna ca enne' beni tsè'. ⁵⁰ Ca ángeliá nna gudal'la tề cabi le' horno yí'a iyaba canu beni mal; nía nna ccá cạ sufrir nna cuetsi cạ nna góya'atsùni laya' quị.

⁵¹ Bitola nna ra tề Jesús cabi: Tsí hua ritelíni le iyaba nu níy'ị. Becàbi cabi nna ra cabi e: Hua ritelí báni tu' Señor. ⁵² Làniana rề cabi: Acca canchu ttu maestro de la ley déte'tsì'ạ ca enseñanza qui' la' rigú'ubia' qui' Tata Dios, pues lạ nna nạ tì'a ttu tàta ribèqquiạ ca cosa latsitte ní tuàniạ, tàntua canu cubi nna ạ'hua canu viejo nna ruluè'niạ ca ÿi'nị.

⁵³ Beyacca diba gutixà'a Jesús ca ejémluị nna bede'e nía. ⁵⁴ Betsina' tề látsiáa nna gudu-

lue gutixa'ánie ca enne' tsè'e le' sinagoga qui' caniá nna biquila' ya'ání latsi' qui' de tantua tsè' gutixa'ánie ça, acca ra tè ça: Gala da' la' ritelíni nna la'huacca nu té qui' nubeyu'ì acca runiá ca milagru'ì cá. ⁵⁵ Tsí álahua ÿi'ni carpintérua bá nuá' cá. Tsí álahua nàna qui' niá nuá' lá María cá. Ca bettsi' niá nna lá ça Jacobo nna José nna Simón nna Judas nna. ⁵⁶ A'hua ca dana niá nna pues le' yetsi qui' ri'u'ì ba tsè'e ça. Gala taxi'á iyaba ca enseñánzì cá. ⁵⁷ Por nui nna labí huíalatsi' qui' qui'e. Accana ra Jesús ça: Ca enne' rinne titsa' qui' Tata Dios nna, pues ga'ya tediba rappa ça cabi titsa', pero canu látsi cabi lani canu tsè'e le' yú'u qui' cabi nna nidí tito' labí rudà naga' qui' qui' cabi. ⁵⁸ Acca labí benie i'ýéegá milagro nía por causa de qui'ni labí huíalatsi' qui'.

14

¹ Tiempo lània nna bina gobernador Herodes iyaba nu runi Jesús. ² Làniana ra tiá canu runi tsina qui' niá: Nuá' nuá Juan el Bautista nu bétti ya'a nna, chi beyathá de lo canu yatti, acca té i'ýeni la'huacca qui'ì para guniá ca milagruá'. ³ Anía ra Herodes porqui'ni bedaxu'á Juáan preso nna be'ýiqquiá bi lani cadena nna gutixá bi litsi' i'yyà, por causa qui' Herodías niula qui' bettsi'ì Felípea. ⁴ Porqui'ni Juáan nna ra bi á: Tsí làa yu hua lu' qui'ni labí dani lu' thualani lu' niulá'. ⁵ Acca uccua latsi' Herodes gúttiá Juáan, pero gutsi báníá yétsiá porqui'ni Juáan nna uccua bi ttu profeta para lacá. ⁶ Pero loti' beni ça celebrar cumpleaños qui' Herodes nna, beyà'a niula cuiti' ÿi'ni Herodías ttubá lahui' iyaba qui'. Herodes nna yala guyú'u

latsi'ì. ⁷ Acca benia ofreker lani juramento qui'ni gutià qui' niula cuiti'a iyate nu inàbanià na. ⁸ Niula cuiti'a nna bitola de chi gulù'u titsa' nàna qui' niá na, acca rã Herodes: Bènnà nì lè' ttu plato iqquia Juan el Bautístã'. ⁹ Làniana yala behuiní'ni Herodes. Pero por causa de qui'ni chila benia jurar, a'hua labí uccua latsi'ì itiniyúa lani canu yuàni lo meya lani a, acca benia mandado qui'ni gute ca bega' iqquia Juán qui'ì. ¹⁰ Guthel·la' tiã mandado le' litsi' ìyyàa para ichu ca yani Juán. ¹¹ Làniana denua' tè ca iqquia Juán le' ttu plato, bete ca na lani niula cuiti'a, la nna bete tiã na lani nàna qui' niá. ¹² Bitsina' tè ca discípulo qui' Juán nna bedi' cabí cuerpo qui' bí nna becatti' cabi a. Huía tè cabí nna gutixa'áni cabi Jesús.

¹³ De biyénini Jesús razón nì nna bede'e nía nna gutè'e le' ttu barco nna huie para attu ládula indatù'a ttu lugar yà'latsi' làti lanúgá enne' tsè'e. Pero de bina ca enne' qui'ni chi díe, acca biria ca dèsdeba le' ca yetsi qui' qui' nna día tè ca néda yúbitsi lani nì'a qui' para tattsa' ca ne. ¹⁴ De beria Jesús le' bárcuá nna bilá'nie qui'ni enne' yétse'ni tsè'e chi ribeda ca ne nna, yala betúa latsi'e ca nna beyúnie iyaba canu rà'ni tsè'e lani ca enne' ribeda ca néa. ¹⁵ De chi da' ràl·làa nna gubiga' ca discípulo qui'áa ru'a lúe nna ra cabi e: Chi ràl·la nna a'hua làti tsè'e ri'ui' nna nã fuera yetsi. Bechu titsa' dí cuiã'lu' ca enne' para qui'ni eyeqquia ca le' ca yetsi tú'ã' nna gó'o ca nu gó ca. ¹⁶ Jesús nna rée cabi: Labí náduel·la' eyya ca. Lebi'ì bá liúte gó ca. ¹⁷ Làcabi nna ra cabi: Labí té qui' tu' sino làteruba gayu' ettaxtíla nna chuppa bél·la nna. ¹⁸ Jesús

nna rèe cabí: Ligunna tsanna çà nì. ¹⁹ Làniana benie mandado guÿuàni ca enne' lo tácca'a. Guÿi' tiè gayu' ca ettaxtílaá nna chuppa ca bél·laá nna guchìtha lúe ÿiabara' nna gunàbeé bendición lani Tata Dios. Làniana gùl·le'ée ca ettaxtílaá nna betie lani ca discípulua, làcabi nna gutìthia cabi lani ca enne' ÿétsi'a. ²⁰ Iyáÿiate çà nna gutò çà ti'ÿya bá uccuani qui' quì. Betuppa tè cabi atsi'nu ÿa tsummi tsá'ti'ni ca pedazo nu bexa. ²¹ Canu gutúa nna hua ná ttu gayu' mili' ti'ga puro taá ca nubeyu', bittua cuenta re' ca enne' niula nna ca huatsa nna.

²² Luego taá beni Jesús mandado éya'a ca discípulo qui'áa le' bárcuá para eneru tè cabi nna ettè cabi attu lado indatù'a, miéntraste lèe nna rechu titse'e ca enne' ÿétse'a. ²³ Bechu titsa' diba Jesús ca enne' ÿétse'a, làniana huíe yà'latsi' lo ttu i'ya para gunie oración. Nía bá re' turúbée gùl·là. ²⁴ Bárcuá nna chi díq̄ lahui' indatù'a, na' nìni rudàl·la inda bárcuá, porqui'ni còntrala cabi du bè'a. ²⁵ Chì' tegáabá da' rànì'a nna rida' Jesús lo indatù'a para taÿénie cabí. ²⁶ De bilá'ni ca discípulua ne ride'e lo inda nna guretsi ya'ání cabi de tantua tsanì' ùccuani cabi nna ra cabi: Nu tsá'yela cà'a nuq̄'. ²⁷ Pero Jesús nna bel·luítsa' tè cabi nna rèe: Ligappa confianza inte' bá nui, bittu gátsini le. ²⁸ Làniana gunne tè Pedrua nna ra bi e: Señor, canchu cuiq̄'bálu' nuq̄' nna, beni qui'ni thaya' lo indj̄ para íl·lania' ru'a lo cuiq̄'lu'. ²⁹ Lèe nna rèe bi: Gutà. Làniana biria Pedrua le' bárcuá nna guda' bi lo inda día bi ru'a lo Jesús. ³⁰ Pero de beyu Pedrua qui'ni fuérteni du bè' nna yala gutsini bi, gudulo chì rinetsi bi, gunne tè bi iditsa nna ra bi Señor: Bedilàa cuiq̄'lu' inte'. ³¹ Becàa

chì ná' Jesús nna beyel·lé'e Pedrua nna ra tìe bi: Hualigani tito' rúbá fe té qui' lu'. Biecca labí gùppa lu' confianza qui'ni té la'huacca quia'. ³² Huappi bá cabi le' bárcuá nna gudutsi taá bè'a. ³³ Làniana ca discípulo ca enne' yù'u le' bárcuá nna beduỹlbi cabi ru'a lo Jesús nna beni cabi e adorar nna ra cabi: Hualigani qui'ni cuiã'lu' Yĩ'ni Tata Dios.

³⁴ De beyacca guttè cabi lo indatù'a nna bitsina' cabi ru'a loyu qui' ca enne' Genesaret. ³⁵ Benibiá' bá canu nía ne nna bedàa chì cã titsa' le' iyaba ca yetsi to' anta' nía. Làniana tahua' cã iyaba canu rà'ni ru'a lúe. ³⁶ Gutta'yúni cã ne qui'ni hue'èl·le'e cã gulappa' cã màsqui'di ru'a yúe. Iyaba canu belappa' cã ne nna beyacca tabá latsi' qui'.

15

¹ Làniana tuchùppa ca maestro de la ley qui' ca judíua lani tuchùppa canu gulátsi' religiún lã fariseo nna da' cã de Jerusalén nna bitsina' cã ru'a lo Jesús nna ra cã ne: ² Biecca làa rigua ca discípulo qui' lu'ã' costumbre nu rulue' ca enne' gùla qui' ri'u ni'i, porqui'ni ca discípulo qui' lu'ã' nna labí runi cã ná' qui' purificar, tì'a ná qui'ni guni ri'u ántesca go ri'u, acca rappa cã tul·la'. ³ Becàbie nna rée cã: Biala cca lebi'ì nna labí rigua le ca mandamiento qui' Tata Dios porqui'ni runi la le ca costumbre qui' bá le ni'i. ⁴ Ttu mandamiento qui' Tata Dios nna ra íj: Gùppa respeto tàta nàna qui' lu'. Ra huée: Nuỹa diba riyèe' iqquia tàta nàna qui'ì nna té qui'ni gattiã. ⁵ Pero lebi'ì nna rena la le qui'ni hua té bá permiso qui' nuỹa para gã tàta nàna qui'ì: Iyaba nu ná qui'ni gunia' le cualani nna chila beté ya' ã para

Tata Dios, ⁶ acca labiru caduel·la' gunia' cualani tàta nàna quia'. Pero inte' nna nia' le qui'ni a' modo nna riru'na le mandamiento qui' Tata Dios por tantua costumbre qui' le. ⁷ Yala la' beÿia té le' la'riyeni qui' le. Hualibani Tata Dios nu rèe acerca de lebi'ì lo libro nu bedia Isaías enne' uccua profeta nna rèe:

⁸ Yetsi ri'ì nna, pues lani rú'a terúbì rudettià inte', pero lostu'ì nna idittu' tsè' duà lani inte'.

⁹ De balde bá rexa latsi' qui' inte', porqui'ni rulue' cà ca enseñaanza nu guleqquia bá iqquia ca enne' ti'atsi nà ttu mandamiento nu ná ligani.

¹⁰ Làniana gutaÿi tè Jesús ca enne' ÿétsi'a nna rèe cà: Liudà naga' le para télini le. ¹¹ Alahua por nu ro ttu enne' acca chi nà enne' tul·la'; sino nu riria la rú'a ttu enne', lànua nna runia qui'ni nà nu tul·la'. ¹² Bitola nna gubiga' ca discípulo qui'áa ru'a lúe nna ra cabi e: Tsí hua yù cuià'lu' qui'ni biyeni dí'ni ca fariséua' por ca tìtsa'a. ¹³ Becàbi tìe nna rèe cabi: Iyaba ca planta canu labí guda Tata quia' enne' dua ÿiabara' nna, pues té bá qui'ni il·latsu' cà. ¹⁴ Bittu ccani canchu bitsa'áni cà, porqui'ni ná cà tì'a ca ciego canu riyèl·la' cà ná' adí ca ciego. Canchu ttu ciego quel·la'á ná' attu luetsi ciégui nna, entonces chuppa tè cà nna innia cà lo bèl·la'a. ¹⁵ Làniana Pedrua nna ra bi e: Bethàtsi là'nani cuià'lu' intu' ejemplo nu gutixá'a cuià'lu'á'. ¹⁶ Jesús nna rèe: Tsí nihua lebi'ì nna bihua nì' télini le cá. ¹⁷ Tsí bihua yù le qui'ni iyaba nu rà'a rú'a ttu enne' nna día bą lì'ì, làniana iru'na bą cá. ¹⁸ Pero ca tìtsa' nu riria la rú'a ttu enne' nna dá'á de lo lòstu'ì nna a'hua de la' riyeni qui'ì nna, lànua nna

runiã qui'ni nã enne' tul·la'. ¹⁹ Porqui'ni de lo losto' ca enne' nna riria ca la' rulábalatsi' mal para gútti çã enne', a'hua para thúalani çã attu niula huaya' o adí ca cosa nu labí ná qui'ni guni çã, a'hua la' ubàna nna, la' huètti enne' nna, a'hua la' huènilatsi' nna, la' hueqquia bela'na nna. ²⁰ Iyaba ca così nna ná çã nu runi qui'ni ca enne' nna chi ná çã enne' tul·la', pero bíttuhua porqui'ni làa runi çã ná' qui' purificar ántesca go çã. ²¹ Beria Jesús nía nna hué para región qui' ca yetsi Tiro nna Sidón nna. ²² Làniana biria tè ttu niula nía nã enne' Canaán pero duã nía nna gunniã iditsa nna rã ne: Cuiã'lu' Señor Ýi'ni David enne' uccua rey, betúalatsi' cuiã'lu' inte' porqui'ni yál·la'ni chi té ýi'ni ya'a ccã padecer por ttu espíritu malo. ²³ Pero Jesús nna labí becabíne na titsa'. Làniana gubiga' ca discípulo qui'áa ru'a lúe nna gutta'yúni cabi e nna ra cabi e: Becabíni a' porqui'ni tanto iditsa rinniã dá'a cuè'e la ri'u. ²⁴ Jesús nna rèe: Guthel·la' Tata Dios inte', aláa para luetsi niulã' sino làteruba para ca enne' Israel, qui'ni ca enne' Israel nna ná çã tì' ná ca carnero to' nu chi gunitti nna lanú pastor qui' qui' té. ²⁵ Gubiga' niuláa nna beduýibì ru'a lúe nna rã ne: Señor, beni cuiã'lu' inte' cualani. ²⁶ Becàbi Jesús nna rèe na: Labí ná tsè' qui'ni ttu tàta nna cúã ettaxtíla lo ná' ca ýi'nì para gudal·lã na ru'a ca beccu'. ²⁷ Becàbi tè niuláa nna rã: Hualibani cuiã'lu' Señor, pero ca beccu' to' nna ro ba çã ca pedazo nu rinnia ru'a meýa qui' xana' qui'. ²⁸ Làniana becàbi Jesús nna rèe na: Lu' niula, hualigani chi ríalatsi' lu' qui'ni iýeni la'huacca té quia', acca ccá bá lani lu' tì'a ná bá la' rinàba qui'

lu'.

²⁹ Guttè diba Jesús nía nna gutèl·lé'e néda nu día ru'a indatò' qui' Galilea, bi'yu tìe lo ttu i'ya, nía nna gure' tènìe. ³⁰ Nuÿetse' ca enne' nna bitsina' çà ru'a lúe chè' çà ca enne' ná cojo nna ciego nna ca enne' ÿí nna ca enne' manco nna à'hua iÿétse' éru canu rà'ni nna betse'e çà iyaba çà ru'a lúe. Lèe nna beyunie iyaba çà. ³¹ Ca enne' ÿétsi'á nna biquíla' ya'ání latsi' quí de bilá'ni çà qui'ni ca enne' ÿía nna chi rinne çà, à'hua ca enne' máncuá nna chi tsìa nì'a ná' quí, à'hua ca enne' cojua nna chi rida' çà tsè', ca ciégua nna chi rilá'ni çà. Acca yala bedàliani çà Tata Dios enne' runi ca enne' Israel adorar.

³² Jesús nna gutaÿie ca discípulo qui'áa nna rèe cabi: Yala retúa látsa'a' ca enni'í porqui'ni chi uccua tsunna ubitsa tsè'e çà lani inte' nna labí biÿa té go çà. Labí calátsa'a' ethél·la' ya' çà porqui'ni xiaba igutsi latsi' quí lo néda canchu lãa go tí'ÿá çà primero. ³³ Làniana ca discípulo qui'áa nna ra cabi e: Calegáhua taxi' tu' iÿeni tsè'ni ettaxtíla para úgo ri'u ca enne' ÿétsi'í, porqui'ni tsè'e ri'u ttu lugar idittu' de làti anta' ca yetsi. ³⁴ Jesús nna rèe cabi: Bàl·la cà'a ettaxtíla dèni le. Becàbi cabi nna ra cabi e: Gàtsi teruba, à'hua tuchùppa bél·la to' nna. ³⁵ Làniana gunènie ca enne' ÿétsi'á qui'ni xúani çà loyu. ³⁶ Guÿi' tìe gàtsi ca ettaxtílaá lani ca bél·la tú'a nna, be' tìe gracia lani Tata Dios. Làniana gùl·le'ée çà nna bì'e ca discípulo qui'áa. Ca discípulúá nna gutìthia cabi lani ca enne' ÿétsi'á. ³⁷ Iyaba çà guto çà ti'íÿa bá uccuani qui' quí. Làniana betuppa tè cabi ca pedazo nu hexa, gàtsi tsummi tsá'ti'ni. ³⁸ Entre ca enne' gutó lània nna uccua chua' vuelta gayua' ca nubeyu', bíttua cuenta re' ca niula nna

ca huatsa nna. ³⁹ Làniana bechu tìtse'e ca enne' ÿétsi'á nna gutà'a tìe le' bárcuá nna déyyeé para lado región lą Magdala.

16

¹ Làniana ca fariséua nna ca saducéua nna bitsina' cą ru'a lo Jesús gunàba tēni cą ne qui'ni gunie ttu prueba nu rulue' qui'ni la'huacca qui'e nna dá'a de ÿiabara'. Anía beni cą para eyila cą néda ti'iyalá modo cu'ée ttu falta. ² Becàbinie cą nna rēe: De chi rayi bía de diál·lalá nna rena le: Yala tsè' porqui'ni rayi bía, acca huètsa'a bá uxé. ³ A'hua can-chu chi reyana' bía de díla nna rena le: Iyya l·lá ccá natsá. Hua ritelí báni le ca seña nu cca ÿiaba, atsi'íni rena le qui'ni làa ritelíni le ca cosa de la'huacca de ÿiabara' nu chi cca lani le annana. Labí líni le. ⁴ Benie seguir nna rēe: Ca enne' máluļ nna chi biyùl·lani cą enne' catsi'ínie cą, chì' rinàba láni cą inte' qui'ni gunia' ttu milagro nu gulue' qui'ni da' la'huacca quia' dèdsaba ÿiabara'. Pero labí biya seña ni ilá'ni cą sino làteruba nu uccua lani Jonás enne' uccua profeta. Beyacca bá rēe cą anía nna bedà' tìe. ⁵ De bitsina' cabi attu lado indatù'a nna bexa latsi' ca discípulo qui'áa qui'ni labí nùà' cabi ettaxtíla. ⁶ Jesús nna rēe cabi: Lihue' cuidado lani levadura qui' ca fariséua' nna ca saducéua' nna. ⁷ Ca discípulo qui'áa nna gudulo cabi gunèni luetsi cabi nna ra cabi: Porqui'ni labí nùà' ri'u ettaxtíla, acca rēe lą'. ⁸ Gutelí taáni Jesús acca rēe cabi: Biecca rulaba latsi' le porqui'ni labí ettaxtíla nùà' le acca nia' nuą' ni'i. Hualigani tito' rúbá fe té qui' le lani inte'. ⁹ Tsí àtsahua labí ritelíni le nihua làa rexa latsi' le de lo gayu' ca ettaxtílaá nna bàl·la cà'a

tsummi ca pedazo betuppa le de chi beyacca gutó gayu' mili' ca enni'a cá. ¹⁰ Tsí nihua làa rexa latsi' le de lo gàtsi ca ettaxtíla entre tappa mili' ca enni'a nna ábal·la cà'a tsummi ca pedazo nu bexa bedi' le cá. ¹¹ Biani cca àtsahua nì' télini le qui'ni álahua por ettaxtila nuą' acca nia' qui'ni hué' le cuidado por levadura qui' ca fariséuą' nna ca saducéuą' nna cá. ¹² Làniana bennia cabi cuenta qui'ni calatsi'e hué' cabi cuidado qui'ni làa thacca'ỹi cabi por ca enseñanza bèỹia qui' ca fariséua nna ca saducéua nna, aláa por attu levadura.

¹³ Deyya tè Jesús para región làti re' yetsi Cesarea de Filipino, làniana gunàba títse'e ca discípulo qui'áa nna rèe cabi: Nubeyu' de Ỹiabara' nna, nuni nua' rena ca enne' qui'ni ná cá. ¹⁴ Becàbi cabi nna ra cabi e: Ttu te cą nna rena cą qui'ni ná cuią'lu' Juan el Bautista; áttu te cą nna rena cą qui'ni ná cuią'lu' Elías; áttu te cą nna rena cą qui'ni ná cuią'lu' Jeremías o nùỹala ttu ca profétaá. ¹⁵ Lèe nna rèe cabi: Lebi'į chúná, biala rulaba latsi' le nu cca quia' ni'i. ¹⁶ Gunne tè Simón Pedrua nna ra bi e: Cuią'bálu' Enni'a Cristo Ỹi'ni Tata Dios enne' bàni tulidàba. ¹⁷ Làniana ra Jesús bi: Yala ica'rubà lu' Simón Ỹi'ni Jonás, porqui'ni chi uccua nui declarar lani lu', aláa por nuỹa enne' ni le' yétsiloyuį sino por Tata quia' enne' dua ỹiabara'. ¹⁸ A'hua nia' lu' qui'ni lu' ná lu' Pedro, quiere decir: piedra. Iqquia cimiéntuą' nna ilítha'a' iglesia quia'. La'huacca de lù'uti nna labí írialanią gunią vencer contra iglesia quia'. ¹⁹ Inte' nna gúnná' lani lu' la'huacca para íthàlia lu' reino qui' Tata Dios para ca enne'. Iyaba nu guni lu' permitir le' yétsiloyu

nna a'hua ccą permitir ÿiabara', pero canchu labí nna, labí. ²⁰ Làniana gunèni Jesús ca discípulo qui'áa qui'ni nú ttu tehuá nuña quixá'ani cabí qui'ni lèe enni'a Cristo.

²¹ Dèsideba lànìa nna gudulo Jesús gutixa'ánie ca discípulo qui'áa qui'ni naduel·la' éyyeé Jerusalén para quée padecer làtsi' ná' canù rigú'ubia' lè' yétsiá, a'hua làtsi' ná' ca sacerdote principal nna ca maestro de la ley qui' ca judíua nna. Gutixà'a huée qui'ni gútti cą ne, pero bitsa tsunna nna eyáthèe de lo lù'uti. ²² Làniana gulèqquia yetsi' tè Pedrua ne nna gudulo bi ritsa' bi e nna ra bi: Señor, bittu ina cuią'lu' a', nìdirubani ttu nu ra cuią'lu' a' làa tté cuią'lu'. ²³ Laniana gùnna' tsè' tè Jesús Pedrua nna rée bi: Becuitta ru'a lua' Satanás porqui'ni estorbo la runi lu' quia', labí rulaba latsi' lu' nu cca qui' Tata Dios sino nu cca qui' ca enne' la. ²⁴ Làniana ra Jesús iyaba ca discípulo qui'áa: Canchu nuña calatsi'ì thá'a lani inte' nna té qui'ni iyùl·lanią la'a labą nna ga'ną dispuesto gúchią curutsi ìdi'i qui'ì nna tanuą inte'. ²⁵ Porqui'ni nuña tediba dua iqquì etúa latsi'ì la'labàni qui'ì nna, pues gunitti lą na. Pero nuña tediba iria latsi'ì la'labàni qui'ì hàstaá canchu caduel·la' gattią porqui'ni denúą inte' nna; pues lą nna ccabàni lą. ²⁶ Biani liecca canchu ttu enne' nna gunią gana itute yétsiloyu, pero bitola nna nitti bą para siempre ni'i. O biani ti'na gute ttu enne' lani Tata Dios para gáyaní nu dacca' la'labàni qui'ì cá. ²⁷ Porqui'ni Nubeyu' de ÿiabara' nna itée lani la'yani' nna la'dàliani qui' Tata qui'áa, a'hua lani ca ángeli qui'e; làniana quíthie qui' ttu tsa ca enne' ti'iyá ná bá nu beni cą. ²⁸ Hualigani nia' le

qui'ni tuchùppa le canu tsè'e nì lani inte' nna labí gatti le hàsta'na ilá'ni le Nubeyu' de Ñiabara' dé'e para quée Rey nna cu'úbi'e.

17

¹ Xuppa ubitsa bitola nna, Jesús nna guleqquie Pedrua nna Jacobua nna lani bettsi' bi Juáan yà'latsi', guchi'e cabi lo ttu i'ya ñeni tsè'. ² Nía nna bettsiání la' rinna' què'e ru'a lo cabi nna uccua tittini lúe tì'a bitsá', a'hua ñúe nna beyacca tsíttsi tùni tì taání ñiani' bitsá'. ³ De repente taá nna gudu Moisés nna Elías nna ru'a lo cabi nna rue' cabi titsa' lani e. ⁴ Gunne tè Pedrua nna ra bi Jesús: Señor, yala tsè' canchu eya'na ri'u nì. Canchu hua calatsi' cuiá'lu' nna guni tu' tsunna yú'u l-la' to', ttu para cuiá'lu' nna, attu para Moisés nna, attu para Elías nna. ⁵ Atsaba rinne Pedrua nna gul-lani ttu bía nu rudàni'raba nna bedibàga'a cabi. Biyeni tè tsi'i ttu enne' gunnie dèsdèba le' bía nna rèe: Là enni' Ñi'nia' yala catsi'í tì' e, yala redacca' te' por nu runie. Liúda naga' le què'e. ⁶ De biyénini ca discípulua ca titsi'í nna gubixi cabi gure'ló taá làti tsè'e cabía de tantua gutsini cabi. ⁷ Làniana gubiga' Jesús beláppe'e cabi nna rèe: Leyátha nna, bittu gátsini le. ⁸ Guchìtha tè lo cabi pero lanuru nuña bilá'ni cabi sino áláteruba Jesús. ⁹ Beyàdi bá cabi lo í'yaá nna gunèni Jesús cabi nna rèe: Nú ttú tehua nuña quixa'áni le nu bilá'ni le sino hàsta'na qui'ni Nubeyu' de Ñiabara' nna eyáthèe de lo lù'uti. ¹⁰ Làniana ca discípulo qui'áa nna gunàba titsa' cabi e nna ra cabi: Biala cca rena ca maestro de la ley qui'ni naduel-la' ita yà'la la Elías cá. ¹¹ Becàbi Jesús

nna rèe cabi: Hualiba yà 'la Elías ìta; làbi nna guni bi arreglar iyábani. ¹² Pues Elías nna chìla bìta bì, pero labí benibia' ca enne' bi sino bethácca' la cą bi iyate nu uccua latsi' quį. A ́hua Nubeyu' de Ỹiabara' nna beyàlò bá ná nu guthacca' cą ne. ¹³ Làniana gutelíni ca discípulua qui'ni qui' Juan el Bautista nuá rèe anía.

¹⁴ De betsina' cabi làti tsè'e ca enne' ỹétsi'á nna bitsina' tè ttu nubeyu' beduỹíbį ru'a lo Jesús nna rą ne: ¹⁵ Señor, betúa latsi' cuią'lu' ỹi'ni yi'į qui'ni yu'ą be' nna yala telá fuerte ridacca'ą; iỹé vuelta chi gubixią lo yi' ą'hua le' inda nna. ¹⁶ Chi tahua' ya' ą ru'a lo ca discípulo qui' cuią'lu'į pero labí uccuani cabi eyuni cabi ą. ¹⁷ Becàbi Jesús nna rèe: Lebi'i canu labí ríalatsi' nna díátia le canu tul'la' nna, atsália cà'a itsá dà te' cuenia' lani le. Atsália cà'a itsá té qui'ni guchia' le cá. Lítahuá' ą nì. ¹⁸ Làniana gutil'la Jesús espíritu malua nna betsè'e taá latsi'į nubeyu' cuíti'a. Dèseba hora lània nna beyacca chi latsi'į. ¹⁹ De chi tsè'e cabi yà'latsi' nna gunàba titsa' ca discípulua Jesús nna ra cabi: Biecca intu' nna bihua uccuani tu' gudal'la tu' ą fuera cá. ²⁰ Jesús nna rèe cabi: Porqui'ni labí rappa le confianza lani Tata Dios. Hualigani te' riquixa'ánia' le qui'ni cáalá fe qui' le ną màsqui'di medida ttu bétsi' cuàna nna huaccani le guni le mandar i'ya duį: Guttè nà'la, entonces hua ttįą. Porqui'ni labí biỹa té nu làa cca posible canchu ríalatsi' le Tata Dios. ²¹ Pero luetsi ca espíritu malua' nna labí ỹá eria bą sino lani oración nna ayuno nna.

²² De tsè'e cabi región qui' Galilea nna ra Jesús cabi: Nubeyu' de Ỹiabara' nna gute cą ne cuenta

làtsi' ná' ca enne' para quée sufrir nna, ²³ a'hua gútti çà ne nna, pero bitsa tsunna nna eyáthèe de lo lù'uti. De biyénini cabi rèe anía nna yala behuiní'ni cabi.

²⁴ De bitsina' cabi Capernaum, làniana canu ruquiÿa chuppa dracma huía çà ru'a lo Pedrua nna ra çà bi: Maestro qui' lía' nna, tsí bihua rute qui' ládi bi chuppa moneda cá. ²⁵ Pedrua nna ra bi çà: Hua rutie ÿa. Gutà'a tè Pedrua le' yú'a, pero yà'lala Jesús bel'luítse'e bi nna rèe: Simón, biani ra lu' de nu cca qui' ca impuesto nna qui' ládi nna nu ruquiÿa ca rey le' yétsiloyu. Nuni ruquiÿa çà, tsí ruquiÿa çà ca ÿi'ni qui, o, tsí canu fuera bá áccá. ²⁶ Becàbi Pedrua nna ra bi e: Canu fuera nna té qui'ni quiÿa çà. Jesús nna ra tie bi: Entonces ca ÿi'ni rey nna tsè'e bá çà libre álá. ²⁷ Pero para qui'ni nú ttu nuÿa gutsa'áni iqquì nna, acca lu' nna huía ru'a indatù'á' para gudaxu' lu' bél·lá. Bél·la nu gudaxu' lu' primero nna ebeqquia lu' á nna ithàlia lu' rú'ì. Porqui'ni nía nna yù'u ttu moneda nu dacca' tappa dracma, thi' lu' á' nna gute lu' á' lani çà para qui'ni quiÿa lu' nu cca quia' nna nu cca qui' lu' nna.

18

¹ Tiempo làniana nna gubiga' ca discípulua ru'a lo Jesús nna ra cabi e: Nuni ná nu adiru re' cuenta le' reino qui' ÿiabara' cá. ² Jesús nna gutaÿi tè ttu huatsa to' nna bedue na lahui' cabi. ³ Làniana rèe: Hualigani te' riquixa'ánia' le, canchu labí guttsiání la' rulábalatsi' qui' le nna tsíalatsi' le tì'a ca huatsa to' nna entonces labí gá'a le le' reino qui' Tata Dios. ⁴ Acca nuÿa diba nà enne' losto' humilde ti'ba huatsa tú'ì nna, lanuá nna nà nu adiru re'

cuenta le' reino qui' Tata Dios. ⁵ A'hua nuña diba guniã recibir ttu huatsa to' luetsi huátsí porqui'ni ríalatsi'í inte' nna, inte' ba nuá runiã recibir.

⁶ A'hua nuña diba guni qui'ni innia le' tul·la' nuña ttu canu xcuichu to' canu ríalatsi' qui' inte' nna, pues enne' gulú'u fálda nna adila tsa' iyìqquia yanì ttu iyya molino nu adiru xeni nna gudal·la tè çà na lahui' indatò'. ⁷ Ica'rútsi'íru yétsiloyu por ca tul·la', porqui'ni tulidàba ril·lani tentación lani à. Pero ica'rútsi'íru nu runi qui'ni richèccu' ca enne' nna runiã qui'ni innia çà le' tul·la'. ⁸ Acca canchu ná' lu' o nì'a lu' runi çà qui'ni runi lu' tul·la' nna, guchu telá çà nna guru'na çà; porqui'ni adila tsa' qui'ni dua ttu teruba nì'a ná' lu' nna gata' la'labàni nu labí ttíã qui' lu' tì'ca'la tsìa chuppa nì'a ná' lu' nna tsía lu' lo yi' nu labí fin qui'í té. ⁹ A'hua canchu ttu lado íyalo lu' runiã qui'ni runi lu' tul·la' nna, gulèqquia telá à nna guru'na à; porqui'ni adila tsa' gata' la'labàni nu labí ttíã qui' lu' lani ttu teruba íyalo lu', tì'ca'la tsìa chuppa íyalo lu' nna tsía lu' lo yi'bél·laá. ¹⁰ Bittu guni le despreciar nuña ttu canu xcuichu tú'í porqui'ni riquíxa'ánia' le qui'ni ca ángel ca enne' rue' cabi cuidado ttu ttu ca huatsa tú'í nna tulidàba tsè'e cabi ru'a lo Tata quia' enne' dua ÿiabara'.

¹¹ Nubeyu' de ÿiabara' nna bitée para gudilèe iyaba canu chi gunitti. ¹² Biala ina le qui' ttu enne' canchu tsè'e gayua' carnero qui'í pero nuña ttu çà nna iyàl·lã, tsí bihua guni segúruã canu noventa y nuévea nna tsíã lo ca i'ya tatilà nu biyál·láa cá. ¹³ Canchu chi betselániã na nna, hualigani qui'ni adila redácca'niã por ttu teruba carneru to' qui' niá

tì'ca'la por iyaba canu noventa y nueve tsè'e ba ca seguro. ¹⁴ A'hua labí ná voluntad qui' Tata Dios qui' lía qui'ni nítí nu'ya ttu ca huátsíj.

¹⁵ Canchu ttu hermano qui' lu' rigú'ą falta contra lu' nna, huía litsi'j nna, nía nna entre chùppa teruba le nna eyìla lu' modo para qui'ni ennią cuenta nu benią. Canchu gudà nagui'j qui' lu' nna entonces chi beyacca tsè' lu' hermano qui' lu' a. ¹⁶ Pero canchu labí gudà nagui'j qui' lu' nna, huía litsi'j attu vuelta nna guche' ttu o chuppa enne' para qui'ni nu ina chuppa o tsunna ca testigua nna tsu'úni iyaba títsa'. ¹⁷ Canchu nihua lani lacą làa iyéninią nna entonces gutixà'a telani itute iglesia. Canchu nihua lani iglesia làa gudà hua nagui'j nna, bèni telá ą tratar ti'atsi ttu nu fuera o ttu nu ruqui'ya xatta qui' impuesto. ¹⁸ Hualigani te' nia' le qui'ni iyaba nu guni le permitir le' yetsiloyu, ą' cca permitir le' ŷiabara', pero canchu labí nna, labí. ¹⁹ Attu vuelta riquixa'ánia' le qui'ni canchu chuppa le tsè'e le de acuerdo le' yétsiloyuj acerca de bi'ya diba cosa nu inàba le lani oración nna, entonces Tata quia' enne' dua ŷiabara' nna gunie na para lebi'j. ²⁰ Porqui'ni ga'ya tediba tsè'e chuppa o tsunna ca enne' retuppa lani nombre quia', nía nna dua' lahui' quj. ²¹ Làniana gubiga' Pedrua ru'a lúe nna ra bi e: Señor, bàl·la vuelta cà'a eyuniyén látsa'a' qui' ttu hermano quia' nu cu'ą falta contra inte' cá. Tsí bedaá' gàtsi tì'a cá. ²² Jesús nna rèe bi: Alàa nia' lu' gàtsi teruba, sino setenta vuelta gàtsi.

²³ Acca por nui nna reino qui' Tata Dios nna ną tì'a ttu rey uccua latsi' bi eyuni bi cuenta lani canu runi tsina qui' bía. ²⁴ Gudulo tè bi ribeqquia bi

cuenta nna biria tè ttu nu dàa qui' bi tsìi mili' ÿa bel·liu nu de oro nna plata nna. ²⁵ Pero lą nna labí té qui'ì quiÿą nu dàa naá, acca enne' uccua rey nna beni bi mandado ca siervo qui' niá qui'ni gutti' cą na por precio lani attu enne' huaya' para gunią tsina lúi, ą'hua qui'ni gutti' huá cą niula qui' niá nna ca ÿi'nñi nna tsá'tsela tehua iyate nu té qui'ì para quiÿanı cą ÿiyya' qui' niá. ²⁶ Làniana beduÿíbi nubeyu'a nna gutta'yúnią rey xana' niá nna rą: Señor, guppa cuią'lu' paciencia quia', hua yíÿá bétsi bá' iyate nu dà'a' qui' cuią'lu'. ²⁷ Rey enne' ná xana' niá nna yala sentir uccua bi qui'ì nna betúa latsi' bi ą nna beyuniÿén latsi' bi itute ÿiyya' nu dàą qui' bíá nna bela' tè bi ą. ²⁸ Beria dibą nna bitsà' tía ttu compa' qui'ì nu rəl·la' huá qui'ì tuchùppa gayua' beÿu teruba nna, pero bedaxu' chią na guduluą rithią yanı nna rą na: Gutiÿa nu rəl·la' lu' quia'. ²⁹ Làniana nubeyu'a nna beduÿíbı ru'a lúi gutta'yúnią na rą na: Gùppa paciencia quia', hua yíÿá bétsi bá' iyate nu dà'a' qui' lu'. ³⁰ Pero lą nna labí uccua latsi'ì, sino qui'ni bedal·la lą na litsi' ÿyà hàsta'na qui'ni quiÿą qui'ì nu rəl·la'ą. ³¹ Bilá' báni adí ca mozua ca cosa mal nu beniá nna yala triste uccuani cą nna huía cą taquixá'ani cą xana' ca niá iyaba nu uccua. ³² Làniana xana' ca niá nna gutaÿi bi ą attu nna ra bi ą: Huenitsina mal, inte' nna beyuniÿén taá látsa'a' iyate nu dàa lu' quia' porqui'ni gutta'yúni lu' inte'. ³³ Lu' chúná, tsí bihua dani lu' etúa huá latsi' lu' qui' luetsi to' lu'ą' tì'a inte' betúa látsa'a' lu' cá. ³⁴ Làniana adí telá bitsá'ani bi nna bete tè bi ą para ccą castigar hàstaá qui'ni éyíÿą iyáÿiate nu rəl·la'ą qui' bi. ³⁵ Anía guni Tata

quia' enne' dua ÿiabara' lani ttu ttu tsa le canchu làa eyuniyén huá latsi' le lani itute latsi' le ca falta qui' ca hermanos qui' le.

19

¹ Beyacca bá gunne Jesús ca tìtsa'a nna bede'e Galilea nna guttìe yò Jordán, làniana betsine'e región qui' Judea. ² Ca enne' ÿétse'ní nna denó cą ne. Nía nna beyunie cą. ³ Làniana bitsina' tè ca fariséua ru'a lúe para eyìla cą néda ti'iyílá modo inne cą canchu xiaba uquìnnia cą ne lani ttu tìtsa', acca gunàba tìtsa' cą ne nna ra cą: Tsí hua ná tsè' qui'ni ttu nubeyu' nna éla'á niula quì'ì para biyá tediba caúsani cá. ⁴ Becàbie nna rèe: Tsí bihua ni' gul·la le lo Escritura qui'ni Tata Dios enne' betsi'e cą yétsiloyu dèsdèba néruá, nubeyu' nna niula nna benie cą. ⁵ Raáruhuéé cą: Por nui nna guthà'na ttu nubeyu' tàta nàna quì'ì nna itsà' tią niula quì'ì, làniana chuppa cą nna chi ná cą ttùba. ⁶ Làniana labiru ná chuppa cą, sino qui'ni ttùba chi ná cą. Acca por nui nna, nu bettsà' Tata Dios luetsi quì nna, labí ná qui'ni nuyá el·la'á cą. ⁷ Làniana ca fariséua nna ra cą ne: Biala cca ra Moisés qui'ni huacca bá ilìtha ttu nubeyu' acta de divorcio nna éla'á tią niula quì'ì cá. ⁸ Bécabinie cą nna rèe: Por la' necio bá qui' le acca benna Moisés permiso qui'ni éla'á le niula qui' le, pero néruá nna labí uccua á'. ⁹ Inte' nna riquixa'ánia' le claru taá qui'ni nuyá diba éla'á niula quì'ì pero álahua porqui'ni gùdualani niula attu nubeyu' huaya' sino porqui'ni calatsi'ì thí'ą attu niula huaya' nna, nui nna chi ná adulterio nu runiá. A'hua nu edi' niula nu béla'á naá nna runi huá adulterar. ¹⁰ Làniana ca discípulo

qui'áa nna ra cabi e: Canchu á'ba ná la'ritè qui' ttu nubeyu' lani niula quì'ì nna entonces bihua cuenta tíą na guttsaní'ì. ¹¹ Làniana rèe cabi: Alahua iyá ca enne' rulaba latsi' qui' á', sino làteruba canu chi nani Tata Dios. ¹² Por ejemplo, tsè'e canu gùlia sin capacidad para guttsaná' qui'. A'hua tsè'e canu ná cą incapaz, porqui'ni á' uccua latsi' ca enne' qui'ni ccá cą. A'hua tsè'e canu dua ttùba cą pero solamente por amor nu té qui' qui' por la' rigú'ubia' qui' Tata Dios. Nui nna ná para canu rulaba latsi' qui' qui'ni nu ra ca tìtsi'ì nna hua ná tsè' para lacą.

¹³ Làniana ca tàta nàna nna tahua' tè cą ca huatsa to' ru'a lo Jesús para qui'ni gutsia né'e iqquia qui' nna gunie oración por lacą. Ca discípulua nna gutil'la la cabi cą. ¹⁴ Pero Jesús nna rèe cabi: Lihue'el'la' ca huatsa tú'ą' ibiga' cą ru'a lua', bittu guthàga' le cą; porqui'ni qui'ba luetsi ca huatsi nna ná iyaba canu rue'èl'la' cą qui'ni Tata Dios nna quée enne' rigú'ubia'nie cą. ¹⁵ De chi betsia né'e iqquia ca huátsáa nna benie cą bendecir nna, bedà' tìe nía.

¹⁶ Làniana bitsina' tè ttu nubeyu' soltero ru'a lo Jesús nna rą ne: Maestro bueno, biani cosa tsè'ni gunia' para la'labàni nu labí ttą quia' cá. ¹⁷ Lèe nna rèe na: Biecca ra lu' inte' enne' bueno ni'ì. Ni ttú lanú té ná completamente tsè' sino tùteruba Tata Dios. Canchu calatsi' lu' gata' la'labàni qui' lu' nna ná qui'ni guni lu' tsè' taá nu ra ca mandamiento. ¹⁸ Lą nna ra tíą ne: Nula cą. Jesús nna rèe na: Bittu gútti lu'. Bittu thúalal lu' nu labí ná tsela lu'. Bittu cuana lu'. Bittu ichètha lu' bela'na qui' ca enne'. ¹⁹ Gùppa respeto tàta nàna qui' lu'. Catsi'ini lu' luetsi enne' lu' ti'atsi la'a lu' bá.

20 Nubéyu'a nna rã ne: Iyaba ca mandamiéntuã' runia' dèsdeba ná' xcuìchuto'. Biaruálá reyatsa te' cá. 21 Jesús nna rèe na: Canchu calatsi' lu' cca lu' enne' tsè' gani nna, beyya nna betti' biyã té qui' lu' nna bete tì ą lani ca enne' rittè là'di', pues yĩabara' la nna gata' riqueza qui' lu'; làniana gutà tè tanó inte'. 22 De biyénini nubeyu' soltérúa nu rèe na, triste tsùba beyeqquiã, porqui'ni yala rico ná. 23 Làniana ra Jesús ca discípulo qui'áa: Hualigani te' riquixa'ánia' le qui'ni yala tàbi ná qui'ni ttu enne' rico nna hue'él·la'ą qui'ni Tata Dios nna quée enne' cu'úbia'nie na. 24 Nia' le qui'ni yánaba gá'a ttu camello le' yeru to' qui' ttu guyã, tì'chula ttu enne' rico gá'ą le' reino qui' Tata Dios. 25 De biyénini ca discípulo qui'áa nui nna yala biquila' latsi' cabi nna ra cabi: Entonces núlá ccani l·lã cá. 26 Gunna' tè Jesús cabi nna rèe: Para ca enne' nna labí ná posible, pero lani Tata Dios nna yánaba iyate ca cosa. 27 Làniana gunne tè Pedrua nna ra bi e: Intu' nna iyáyiate chi bethà'na tu' nna chi denó tu' cuiã'lu'. Biala thi' tu' cá. 28 Becàbi Jesús nna rèe cabi: Hualigani te' riquixa'ánia' le qui'ni gal·la' tsá qui'ni iyate ca cosa nna eyacca çã cubi, làniana Nubeyu' de Yĩabara' nna thí'e adí la' huacca glorioso de yĩabara' nna cué'nie lo xila' tsè'ni qui'e para cú'ubi'e. Làniana lebi'i canu denó le inte' nna xúa huani le lo adí tsì'nu ca xila' tsè'ni para cú'ubia' huáni le iyaba ca descendiente qui' tsì'nu yĩ'ni Israel. 29 Nuỹa tediba guthà'nã ca yú'u quì'į l·le ca bettsi'į l·le ca danį l·le tãta nãna quì'į l·le niula quì'į l·le ca yĩ'nį l·le ca loyu quì'į l·le por inte' nna, pues lã nna thí'ą ágayua' tántula, ą'hua guniã recibir

la'labàni nu labí ttíḡ qui'ḡ. ³⁰ Pero nuḡetse' canu neru annana ccá lá cḡ nu bitote. Aḡhua nuḡetse' canu bitote annana, pues lacḡ nna ccá lá cḡ nu primeru.

20

¹ Reino qui' Tata Dios nna ccḡ comparar tì'a ttu nubeyu' ná bi patrón, huàni' ba nna biria bi huíla mozo para tsía cḡ tsina qui' bi. ² De chi beyà'na lani bi ca mozo qui' bíá qui'ni quiḡa bi cḡ ttu denario ttu tsá nna, guthel·la' tē bi cḡ làti runi bi tsina betsulí'. ³ Tsunna hora tì'gḡa bitola nna biria bi làti cca i'yya nna bilá'ni bi attu te canu cuenta tsè'e bá cḡ. ⁴ Ra tē bi cḡ: Aḡhua lebi'i nna, lítsía huá tsina quia', inte' nna hua yiḡa ba' le tì'a nu ná bá. Lacḡ nna huía tē cḡ. ⁵ Biria tē bi attu ttu tsì'nu hora nna, aḡhua attu vuelta ritìḡ tsunna nna, anía huá beni bi arreglar lani attu te cḡ. ⁶ Ttu ritìḡ gayu' diál·lalá nna bilá' huáni bi adí canu cuenta tsè'e bá cḡ, acca ra bi cḡ: Biecca betuḡia tsá bá tsè'e le nì bihua biḡa runi le ni'i. ⁷ Becàbi cḡ nna ra cḡ bi: Porqui'ni lanú nuḡa runna tsina qui' tu'. Làniana ra tē bi cḡ: Aḡhua lebi'i nna lítsía huá tsina quia' nna, huaḡa bá le tì'a nu ná bá. ⁸ De gùl·la tsá làniana nna, xana' tsinàa nna ra bi nu ná jefe qui' ca mozo qui' bíá: Beyàḡi iyaba ca mozuḡ' nna gutiḡa cḡ qui' natsá, pero thulo lu' quiḡa lu' yà'la canu gutà'a bitótiaḡ làniana canu gutà'a primérua. ⁹ Gubiga' tē canu gutà'a ritìḡ gáyu'a, ttu ttu tsa cḡ nna guḡi' laḡa qui' qui' ttu tsá entero taá. ¹⁰ Làniana gubiga' tehuá canu gutà'a primérua belaba latsi' qui' qui'ni thi' cḡ adí iḡeni, pero lacḡ nna ttu denario huá guḡa cḡ. ¹¹ De guḡi' cḡ bél·liua nna gudulo cḡ rinàba ḡiya' cḡ

lani patrón qui' caniá nna ¹² ra ça: Canu bitotì nna ttu hora rúbá gùtse'e ça tsina, atsi'íni tulappa ná bá laÿa tu' nna, yala guÿàcca' tu' betuÿia tsá lo tsina' nna uccuani tu' ubá nna. ¹³ Becàbi xana' tsinàa nna ra bi ttuà: Amigo, bihua biÿa riguánia' lu'. Tsí álahua beya'na ri'u qui'ni quiÿa' lu' ttu denario cá. ¹⁴ Acca guÿi' bá nu ná laÿa lu' nna beyya tè; inte' nna calátsa'a' gutià' qui' nu bitotì tulappa bá lani lu'. ¹⁵ Tsí bihua derecho té quia' gunia' ti'ÿa bá calátsa'a' lani nu té quia' cá. Tsí rappa lu' la'yélatsi' porqui'ni ná' enne' tsè' áccá. ¹⁶ Anía modo nna canu último nna ccá lá ça nu primero, a'hua canu neru nna ccá ça nu bitote; porqui'ni nuÿetse' ça chi nàÿinie, pero tuchùppa rúbá ça chi rée'.

¹⁷ De yù'u Jesús néda para Jerusalén nna gule-qquie tsì'nu ca discípulo qui'áa yà'latsi' nna rée cabi: ¹⁸ Annana dia ri'u Jerusalén. Nía nna gute ça Nubeyu' de ÿiabara' cuenta làtsi' ná' ca sacerdote principal nna ca maestro de la ley nna; laça nna cueqquia ça sentencia qui'e para gattie. ¹⁹ A'hua gute ça ne cuenta làtsi' ná' canu dittu' rigú'ubia' le' ciudáad para qui'ni guni ça ne burla nna hué' ça ne lani cuarta nna, làniana gutá' ça ne lo curutsi para gattie; pero bitsa tsunna nna eyathèe de lo lù'uti.

²⁰ Làniana gubiga' tè nàna qui' ca ÿi'ni Zebedéua nna beduÿíbì ru'a lo Jesús gunàbanià ne favor. ²¹ Lèe nna rée na: Biani calatsi' lu'. Becàbià nna rã ne: Bèni cuiã'lu' mandado qui'ni xuàni chuppa ca ÿi'ni yì'ì cuitta' cuiã'lu' le' reino qui' cuiã'lu'a, ttuà lado ná' bàni nna áttuà lado ná' yatti nna. ²² Làniana becàbi Jesús nna rée na; Labí ritelíni le biÿa nuã' rinàba le. Tsí ína ri'u qui'ni guchia bá le

tté le iyaba ca sufrimiento nu ná qui'ni ccá' padecer cá. Làcabi nna ra cabi e. Guchia bá tu'. ²³ Lèe nna rée cabi: Hualigani qui'ni cca hua le padecer tì'a inte' ccá' padecer, pero de xuàni le lado ná' bània' nna lado ná' yattia' nna, álahua quia' nã para gunna ya' a, sino Tata quia' chi benie na preparar para gutie na lani canu càba latsi'e. ²⁴ De biyénini á tsii ca discípulua ania nna, yala bitsa'áni cabi canu chuppa bèttsi'a. ²⁵ Làniana gutaÿi tè Jesús cabi ru'a lúe nna rée cabi: Hua yù ba le qui'ni canu rigú'ubia' le' ca nación nna runi taáni qui' qui' itúbani; a'hua adí canu re' cuenta nna yala ruthítsini cã ca enne' qui'ni guni cã tsina lo qui'. ²⁶ Pero entre lebi'ì nna labí ccá á'. Sino qui'ni canchu nuÿa calatsi'ì ccã enne' ÿeni entre lebi'ì nna, pues ná qui'ni ccã ttu nu guniã iyaba le servir. ²⁷ A'hua canchu nuÿa ttu le calatsi'ì ccã nu neru nna, pues caduel-la' qui'ni ccã ttu nu guniã le servir tulidàba. ²⁸ Tì'a Nubeyu' de ÿiabara' nna labí bitée para qui'ni guni ca enne' tsina lúe, sino para guni lée iyaba ca enne' servir, a'hua para íria latsi'e la'labàni qui'e para qui'ni l-lá nuÿetse' ca enne'.

²⁹ Làniana de beria cabi yetsi nu lá Jericó nna, enne' ÿétse'ní denó cã ne. ³⁰ Chuppa ca ciego ÿuàni cã cuitta' nédaá nna, de biyénini cã qui'ni dia Jesús néda nía nna, acca gunne cã iditsa nna ra cã: Cuiã'lu' ÿi'ni David, guppa cuiã'lu' la' retúalatsi' qui' tu'. ³¹ Gutil-la tè ca enne' cã qui'ni guthaya rú'a qui'. Pero lacã nna adila iditsa gunne cã nna ra cã: Cuiã'lu' ÿi'ni David, betúa latsi' cuiã'lu' intu'. ³² Gulèda tè Jesús nna gutàÿie cã nna rée cã: Biani calatsi' le gunia' por lebi'ì. ³³ Lacã nna ra cã ne:

Señor, calatsi' tu' iyàlia ca íyyalo tu'ì. ³⁴ Jesús nna betúa taá latsi'e cą nna beláppe'e iyyalo qui, luegu taá bilá' chìnì cą nna dia tè cą lani e.

21

¹ Exa tegáabá Jerusalén chi deyya cabi nna betsina' cabi ttu lettia láą Betfagé liuítta' i'ya láą Monte de los Olivos. Guthel·la' tè Jesús chuppa ca discípulo qui'áa, ² rèe cabi: Lítsía le' yetsi to' nu re' frente taá tétea nna, hua taxácca' diga le làti ta' ttu burra to' tsa' ýi'nì ethàtsi li ą nna eche' tètstate' le cą nì. ³ Canchu nuña biya gą le nna, lebi'ì nna gá tè li ą qui'ni: Señor qui' tù'a nna riquína'nie cą. Làniana hue'él·la' tabą le eche' le cą. ⁴ Iyaba nui nna uccuą para qui'ni ccá cumplir nu ra ttu enne' uccua profeta:

⁵ Lígatsi ciudad qui' monte Sión: Nì chi da' Rey qui' lù'a, née enne' ýénlatsi'.

Lèe nna tsìe ttu burro to' ýi'ni ttu burra nu rua' yùà'.

⁶ Huía tè ca discípulua nna beni cabi tì'a nu ra Jesús cabía. ⁷ Betsina' tè cabi deche' cabi búrraa lani ýi'ni to' qui' niá nna, guxua tè cabi ca lari' qui' cabi cuè'e qui. Jesús nna gutsia tìe ttuą. ⁸ Iýé mili' tsè'ni ca enne' día tè cą lani e nna gutsila tè cą ca lari' qui' qui lo néda, adí cą nna gutìttsa cą ca l·la' qui' ca yà nna benìta' tè cą cą lo neda para ttíe. ⁹ Ca enne' denérua ą'hua canu denál·la'láa nna iditsa tsè' bedàliani cą ne nna ra cą: La'dàliani para enni'ì porqui'ni née Ýi'ni David para ccá huée Rey qui' ri'u. Bendito enne' da' por mandado qui' Señor Dios. La'dàliani para Tata Dios enne' dua ýiabara'.

¹⁰ De gutà'a Jesús le' ciudad Jerusalén nna, iyáỹiani ca enne' le' ciudáad nna bitùppa cạ para inna' cạ nna ra cạ: Nú gani nui da' nì. ¹¹ Adí ca enne' nna ra cạ: Là enni'ị enni'ạ' Jesús enne' rinne parte Tata Dios, née enne' Nazaret qui' Galilea.

¹² Laniana gutà'a Jesús le' lí'a qui' templua nna bedal·lèe fuera iyaba canu tsè'e nía huetti' nna hui'i nna, berixie ca meỹa qui' canu ritsìla bél·liua nna ạ'hua ca xila' qui' canu rutti' cạ becha nna runi cạ negocio ru'a templua, ¹³ ra tiè cạ: Tata Dios nna rée lo titsa' qui'e: Yú'u quíyi'ị gata' líj yú'u para oración; atsi'ini lebi'i nna bèlia qui' ubàna la chì nani li ạ. ¹⁴ Le' templua bá rì'e nna, bitsina' tè ca ciego nna ca cojo nna ru'a lúe. Lèe nna beyunie cạ. ¹⁵ Pero tsè'e huá ca sacerdote principal ạ'hua ca maestro de la ley nna bilá'ni cạ ca milagro nu runiáa, ạ'hua biyénini cạ qui'ni ca huatsa cùiti' rudàliani cạ ne iditsa tsè' le' templua de ra cạ: La'dàliani para enni'ị porqui'ni née Ỹi'ni David para ccá huée Rey qui' ri'u. Acca yala bitsa'áni ca sacerdótea nna ạ'hua ca maestro nu rulue' nu ra lo ley religiosa qui' caniá nna, ¹⁶ ra cạ ne: Tsí bihua riyénini lu' nu rinne ca nui. Jesús nna rée cạ: Hua riyeni te', pero tsí bihua nì gul·la le làti ra:

Chi nani cuiạ'lu' Señor Dios qui'ni ca huatsa to' ạ'hua canu atsàba rátsi' nna gudàliani cạ cuiạ'lu'.

¹⁷ Làniana Jesús nna bethà'na tiè cạ nna berie le' ciudáad nna betsine'e le' yetsi Betania; níaba beya'née yèlàa.

¹⁸ Attu yu'udílaá nna deyya Jesús para ciudad Jerusalén attu. Néda bá yu'ée nna gutùnìe. ¹⁹ Bilá'

tènie ttu yà exxuhuí du exa tegáabá lo néda nna. Huía tìe làti du naá pero labí té exxuhuí lúj sino puro l·la' bá tsìa, acca rèe na: Dèsideba annana jamás làa cuía teérulá fruta lo lu' cá. Làniana gubitsi chì yà exxuhuía. ²⁰ De bilá'ni ca discípulo qui'áa nui nna yala uccuaýí latsi' cabi nna ra cabi: Tì'ani modo acca gubitsi taá yà exxuhuía' cá. ²¹ Becàbi Jesús nna rèe cabi: Hualigani te' nia' le qui'ni cáalá té tí' fe qui' le nna ą'hua bittu gudu chùppanią le nna, entonces alàarula luetsi nu uccua lani yà exxuhuía' guni le, sino hàstaá i'ya duį canchu guni li ą mandar gá li ą: Becuitta nna guttè lo indatò' la nna, pues huattia. ²² Iyaba nu inàba le lani oración nna, huadi' li ą canchu ríalatsi' le qui'ni ą' ccá según ba nu rinàba le.

²³ Betsina' bée le' templua nna, bitsina' tè ca sacerdote principal lani canu rigú'ubia' le' ciudadad ru'a lúe miéntraste riquixa'ánie ca enne' nna ra çą ne: Nuni por mandado qui'ní acca runi lu' ca cosį. Nuni benna derecho qui' lu' para quixá'a lu' ca enseñanzį cá. ²⁴ Becàbi Jesús nna rèe çą: A'hua inte' nna inàba titsa' huá' le, canchu ecàbini le inte' nna làniala nna equixa'á huánia' le nuýa benna la'huacca quia' acca runia' ca cosį. ²⁵ Gala da' derecho qui' Juan el Bautístaá para guni bi bautizar cá, tsí de ýiabara' la o tsí ca enne' bá bete derecho qui' bi áccá. Làniana gudulo çą be' çą titsa' ti'ýyala ecàbini çą ne nna ra luetsi quį: Canchu ina ri'u qui'ni autoridad qui' Juáan para guni bi bautizar nna dá'ą de ýiabara', entonces gá taą ri'u: Bialacca làa huíalatsi' le qui' bi cá. ²⁶ A'hua canchu ina ri'u qui'ni por mandado qui' ca enne' bá acca beni bi bautizar nna, nìca'chu biýa guthácca' yetsi ri'u;

porqui'ni iyaba ça nna ra ça qui'ni Juáan uccua bi ttu profeta qui' Tata Dios. ²⁷ Acca mejor la becàbini ça Jesús nna ra ça ne: Labí yù tu'. Làniana becàbi tè Jesús nna rée ça: Nihua inte' nna labí quixa'ánia' le nuỹa benna la'huacca quia' acca runia' ca così.

²⁸ Raáruhuá Jesús: Biani rulaba latsi' le acerca de nu iníyì'ì. Ttu nubeyu' nna gutsé'e chuppa ÿi'nì. Huía tìà ru'a lo ÿi'ni nu guláa nna rà na: ÿi'nia', huía tsina qui' ri'u le' loyu làti runi ri'u tsina betsulí'a. ²⁹ Lą nna becàbią nna rà tàta qui' niá: Labí calátsa'a'. Pero bitola nna beyaccą arrepentir nna huía báą. ³⁰ Huía tè nubeyu'a ru'a lo attu ÿi'ni niá nna, aníahua rà na: Becàbią nna rà tàta qui' niá: Ooba Señor, hua ya'aba'. Pero labí huía. ³¹ Nula canu chuppáa beni nu rú'ulatsi' tàta qui' caniá cá. Lacą nna ra ça: Nu nerua. Làniana ra Jesús ça: Hualigani te' riquixa'ánia' le qui'ni canu rutebià' telá ça ruquiỹa ça qui' impuesto, ą'hua ca niula pública nna, pues lacą nna deneru la ça lo le para le' reino qui' Tata Dios. ³² Porqui'ni loti' bítà Juáan nna gutixa'áni bi le lo néda nu ná lí, pero labí huíalatsi' le qui' bi. Pero canu ridi' qui' impuesto nna ą'hua ca niula pública nna huía taá latsi' qui' qui' bi. Lebi'i nna nihuani de bilá'ni le loti' huíalatsi' qui', pero bihua beyacca le arrepentir para tsía hua latsi' le ca titsa' qui' bi.

³³ Liudà naga' le attu comparación. Gùdua ttu enne'yu' nna guda bi planta qui' betsulí' le' loyu qui' bi. Bedeqquia tè bi ą li'ya, ą'hua guleqquia bi ttu pozo làti guxàtta ça iqquia betsulí'a para cueqquia ça inda quì'ì. Ą'hua bedu tè bi ttu torre. Làniana betèsa tè bi lóyúa lani canu guni ça na

tsina. Pero làbi nna guda' tè bi dia bi idittu'. ³⁴ De chi debiga' tiempo edi' cạ fruto qui' betsulí'a nna, guthel·la' bi ca mozo qui' bía làti tsè'e canu runi tsina le' lóyúa para qui'ni edi' cạ fruto nu ná qui'ni thi' bi qui' loyu qui' bía. ³⁵ Pero canu runi tsina le' lóyúa nna bedaxu' la cạ ca enne' guthel·la' bía, yala idí' bè' cạ ttuạ, áttuạ nna bè' cạ na íyya nna bètti telá cạ áttuạ nna. ³⁶ Xana' lóyúa nna bedethèl·la' gáabá bi adírula iyé ca enne' runi tsina qui' bi, pero anía hua bedethácca' cạ cạ. ³⁷ Por último nna guthel·la' bi propio gani ÿi'ni bía nna ra bi: Huappa cà'ba cạ respeto ÿì'ni yì'ì. ³⁸ Pero canu runi tsina lóyúa nna de bilá'ni cạ ÿì'ni bía nna, gulù'u titsa' luetsi qui' nna ra cạ: Lànui nuạ' eyà'nạ ituba loyui. Litsa' gútti ri'u ạ para qui'ni ccá qui' ri'u itute herencia qui' niạ'. ³⁹ Acca bedaxu' chì cạ ÿi'ni bía nna bedal·la cạ bi fuera lóyúa nna bètti tè cạ na. ⁴⁰ Acca lebi'i nna, canchu chi el·lani propio gani xana' lóyúa nna, biani guni bi lani canu betèsa bi lóyúa para guni cạ na tsìnàa cá. ⁴¹ Becàbi cạ nna ra cạ ne: Seguro nna nì tito' làa etúa latsi' bi cạ sino gul·luỹa bi latsi' ca enne' malua, làniana gutèsa tè bi loyu qui' bía lani canu huaya' la canu ná cạ enne' cumplido nna gute cạ fruto qui' bi tiempo de lènà'a. ⁴² Beni ba Jesús seguir nna rèe cạ: Tsí nunca huá nì' gul·la le lo Escritura làti ra:

Iyya nu labí guyú'u latsi' canu rucùaa' yú'a nna, chi nạ íyya principal nu adila tsìttsì naxu'ạ yú'a.

La'a mismu gani Señor Dios chi benie nui, nạ ttu cosa nu dacca' iquila' báni latsi' ri'u.

⁴³ Acca nia' le qui'ni reino qui' Tata Dios nna ituạ lani le nna ccạ para ca enne' huaya' la canu

guni ca na tsina para ttu lenà' tsè' quì'e. ⁴⁴ Nuỹa tediba ibixi lo íyya principal ni nna l·luỹa latsi'ĩ completamente taá; a'hua nuỹa íqquaní innia íyyĩ nna gútsi'ití'níá na. ⁴⁵ De biyénini ca sacerdotea a'hua ca fariséua ca comparación por enseñanza nu gutixè'e, entonces gutelíni ca qui'ni quì'ba qui nua rinnie. ⁴⁶ Acca uccua latsi' qui cu'ú ná' qui Jesús, pero gutsibáni ca biỹa guthácca' ca enne' yétsiá ca, porqui'ni para ca enne' yétsiá nna uccuee ttu profeta qui' Tata Dios.

22

¹ Jesús nna gutixa'ánie ca attu enseñanza por medio de ttu comparación nna rèe: ² Reino qui' Tata Dios nna cca huá comparar ti'a ttu enne' uccua rey beni bi thá'a qui' yĩ'ni bía. ³ Guthel·la' tè bi canu runi tsina qui' bía tanne ca canu chi naỹini bi thá'a. Pero canu naỹia nna labí uccua latsi' qui tsía ca. ⁴ Bedethèl·la gáabá bi attu te canu runi tsina qui' bía nna ra bi ca: Lígatsi canu chi naỹi ti'á' qui'ni chi béttíá' ca gù'na quia' nu adiru riỹeni nna a'hua adí ca animal quia', chi benia' preparar la'go, iyátení chi ná prevenido, líta taá fiésti. ⁵ Pero canu naỹia nna labí caso beni ca. Ttuá nna huía lo tsina qui' bíj, attuá nna huía lá bíyaáru negocio qui'ĩ. ⁶ Adí ca nna bedaxu' la ca ca enne' dia mandádua nna beni la ca cabi maltratar nna betti ca cabi. ⁷ Biyeni báni rey notici' nna yala bitsa'áni bi nna guthel·la' chì bi ca soldado qui' bía nna bel·luỹa ca latsi' ca huetti enni'a nna bedayi ca yetsi qui' caniá. ⁸ Làniana ra bi canu runi tsina qui' bía: Hualigani chì ná preparado thá'a pero canu naỹi tè'a nna labí ná nu dacca' cue'ni lo meỹa lani

inte'. ⁹ Acca lítsía làti retsa' ca neda. Iyabani ca enne' etsà' le nna ligàyi cą ìta cą fiéstj. ¹⁰ Biria chì canu runi tsina qui' bía lo ca néda nna gutàyi cą iyábani ca enne' betsàa' cą, tàntua canu runi mal nna ą'hua canu runi nu ná tsè' nna, hàstaá qui'ni bitsà'ti'ni le' yú'u thá'a ca enne'. ¹¹ Gutà'a tè rey le' yú'a para inna' bi iyaba ca enne' chi bitùppa, bilá' tēni bi ttu nubeyu' ri'ą nía labí naccu'ą lári' nu bete bi para thá'a. ¹² Làniana ra bi ą: Amigo, ti'ani modo acca re' lu' nì nna làa naccu' lu' nu benna' para fiéstj. Lą nna tsidi rúbá ri'ą. ¹³ Làniana ra rey canu runi tsina lo meýa: Líthi' ą nna, liuýìqquia ca nì'a ní'j nna, líchú'na ą fuera la; nía nna ccą sufrir nna cuetsiá nna góya'atsùni layi'j. ¹⁴ Porqui'ni nuýetse' cą chi nàyinie, pero tuchùppa rúbá cą rée'.

¹⁵ Bedà' tè ca fariséua nna gunne lettia cą ti'iyála modo guquñnia cą Jesús lani ttu titsa'. ¹⁶ Guthel·la' tè cą ru'a lúe ca discípulo qui' caniá lani canu gulaní partido qui' Herodes nna ra cą ne: Mae-stro, hua yù ba tu' qui'ni labí runi latsi' cuią'lu', sino riquixá'a cuią'lu' lo néda lígani qui' Tata Dios, labí rátsini cuią'lu' nu rena ca enne', nihua labí rucué'ní cuią'lu' ca enne' según la' rinna' qui' qui, sino ttu rú'ataá caní cuią'lu' cą. ¹⁷ Acca calatsi' tu' qui'ni quixá'ani cuią'lu' intu' biýa opinion ni té qui' cuią'lu'. Tsí hua ná tsè' quiýa ri'u nu ruthítsini gobierno qui' Cesar ri'u, o tsí bihua áccá. ¹⁸ Pero Jesús nna gutelí taánie la' rulábalatsi' mal qui' qui contra lèe, acca rée cą: Biecca calatsi' le guni le inte' prueba ti'iyála modo uquñnia le inte' lani ttu titsa' ni'i, atsi'íni ya'lo ba yala enne' tsè' rulue' le nna, ¹⁹ líúlue' tsannanì inte' bel·liu nu ridi' gob-

iernu nna. Làcã nna betsia tè cã ttu denario ru'a lúe. ²⁰ Làniana gunàba titsa' tìe cã nna rèe: Nuni retrato qui'ní nui dua lo monedi, a'hua nuni láaní nui dua nì. ²¹ Becàbi cã nna ra cã ne: Qui' Cesar enne' rigú'ubia'. Làniana ra tìe cã: Entonces líúte ba qui' Cesar nu ná qui' Cesar, a'hua líúte ba qui' Tata Dios nu ná para lèe nna. ²² Biyeni díbáni cã ti'íyã becàbinie cã nna yala biquila' ba latsi' qui'. Làniana betse'e latsi' qui' ne nna bedà' cã.

²³ La'a tsá làniateá nna bitsina' huá ca enne' judio canu gulátsi' religiún láã saduceo ru'a lo Jesús. Làcã nna rena cã qui'ni labí posible té eyatha canu yatti nna eyacca bàni cã attu. Gunàba titsa' tè cã ne nna ²⁴ ra cã: Maestro, chi bìl·la tu' qui'ni Moisés nna ra bi lo Escritura qui'ni canchu nuỹa ttu enne' ni gattiã pero lanu ÿi'nì uccua nna, entonces bettsi' niá nna ná qui'ni guttsa taá ní'ì lani niula qui' niá para qui'ni elithã descendencia qui' bettsi'ì nu gúttía. ²⁵ Pues intu' nna benibia' tu' gàtsi bettsi' ca enne'. Bettsa tè ná' nu nerua nna, pero gùtti bá nna lanu ÿi'nì uccua, acca beyà'na ba niula qui' niá lani bettsi' niá. ²⁶ Anía tehuá uccua lani nu cca chùppáa nna nu cca tsunnáa nna hàstaá nu cca gàtsía. ²⁷ Bitote nna gùtti huá niúláa. ²⁸ Canchu chi gal·la' tsá eyatha canu yatti nna, nula canu gàtsi bettsi'a ccá qui'ì niúláa ca, yàqui'ni iyaba gàtsi cã nna bettsaná' qui' lani a. ²⁹ Becàbi Jesús nna rèe cã: Ridacca'ỹí ba le porqui'ni labí ritelíni le nu ra lo Escritura, nihua la'huacca qui' Tata Dios labí nabia'ni li a. ³⁰ Porqui'ni canchu chi gal·la' tsá eyatha ca enne' yatti nna, lanuru nuỹa guttsaná' porqui'ni iyaba cã nna ccá cã tì'a ná ca ángel qui'

Tata Dios le' ÿiabara'. ³¹ Pero acerca de canu yatti qui'ni ná qui'ni eyatha ça de lo lù'uti nna, tsí bihua nì' gul·la le nu gunne Tata Dios para lebi'ì loti' rèe Moisés enne' gùdua tiempo antigua: ³² Inte' ná' Dios qui' lu' à'hua qui' ca ta' enne' gùla qui' lu' Abraham nna Isaac nna Jacob nna.

Nì nna ritelíní qui'ni à'hua ca enne' chi gùtti nna pues bàni bá ça nna runi bá ça Tata Dios adorar. ³³ De biyénini ça enseñanza qui'áa nna biquila' yà'aba latsi' qui'.

³⁴ Biyeni báni ca fariséua qui'ni bethia bée rú'a ca saducéua, acca betuppa iyaba ça. ³⁵ Làniana ttu maestro qui' qui' nu yala tsè' rethàtsilà'nà nu ra lo ley qui' ca judíua nna gunàba titsa'à Jesús para eyilà néda ti'iyà la modo cu'éé ttu falta, acca rà ne: ³⁶ Maestro, biani mandamiento ní nu ra lo ley dàcca'à adiru cá. ³⁷ Becàbi tè Jesús nna rèe na: Catsi'íni lu' Señor Dios qui' lu' lani itute losto' lu', lani itute latsi' lu', à'hua lani la' rulábalatsi' qui' lu'. ³⁸ Nui nna ná primero mandamiento à'hua nu adiru dacca'. ³⁹ A' tegáhuá ná mandamiento nu cca chùppáa: Catsi'í huáni lu' iyaba ca luetsi enne' lu' ti'atsi la'a lu' ba. ⁴⁰ Lo chuppa ca mandamiéntuì nna naxu' ituba nu ra lo ley nu bethà'na Moisés lani ri'u à'hua nu bedia ca enne' uccua profeta nna.

⁴¹ De tsè'e iyaba ca fariséua nna gunàba titsa' tè Jesús ça, ⁴² rèe: Biani rulaba latsi' le nu cca qui' Cristua. Nuni ÿi'ni ní née. Becàbi ça nna ra ça ne: Née ÿi'ni David. ⁴³ Jesús nna ra tiè ça: Entonces ti'ala modo acca por la'huacca qui' Espíritu Santo nna ra David qui'ni Cristua nna née SEÑOR, loti' ra bi ìj:

44 Señor Dios nna gunènie Señor quiya'a nna rèe:
 Gùduani cuittá'a' lado bàni,
 Hasta qui'ni gúnna' làtsi' ná' lu' iyaba canu làa cca
 guyu ça lu',

Para qui'ni gúl·liani lu' iqquia qui.

45 Acca por ca tìtsa'a nna yù ri'u qui'ni la'a mísmuba
 David nna reya bi Cristua SEÑOR. Entonces ti'ala
 modo acca née descendiente qui' David cá. 46 De
 gutixà'a Jesús nuà' nna, ni ttu ça nna labiru bet-
 seláni ça biya tìtsa' ni ecàbini ça ne. Acca dèseba
 tsá lània nna lanuru beyáyani inàba tìtsa'ạ ne adí.

23

1 Làniana gunèni Jesús ca enni'a ạ'hua ca discípulo
 qui'áa nna rèe: 2 Ca judíua nna chi bete ça poder
 qui' ca fariséua' nna ca maestro qui' qui' nna para
 ethàtsilà'na ça nu ra lo ley nu bethà'na Moisés lani
 ca ta' tàta qui' rí'ua. 3 Acca iyaba nu ina ça acerca
 de nu ra lo ley nna liudà ba naga' le nna lígúni
 ạ nna. Pero bittu guni le ti'ba runi ça, porqui'ni
 puro huenne ba runi ça, pero hecho qui' qui' nna
 labí rului'ạ na. 4 Ruỹìqquia ça yùà' ìdi'i nna tàbi
 nna rutsia tè ça na iqquia ca enne' para guni ça
 na, pero làcạ nna nidi' ti'to' làa runi ça nu rena
 ça. 5 Antesla runi ça iyábani para ilá'ni ca enne'
 ça. Rudilàga'áru ça ca listón làti rudia ça ca tìtsa'
 nu ra lo Escritura nna rugàl·la' ná' qui' ça ạ'hua
 lo yígá qui. Ạ'hua ruditùniíru ça ca lári' nu raccu'
 ça adiru ti'chu adí ca enne'. 6 Ral·la' ça asiento
 íquiará' tè canchu chi ral·la' fiesta qui' qui, ạ'hua
 ral·la' ça ca primero asiento le' ca sinagoga làti
 retùppa ça. 7 Yala rú'ulatsi' qui' gappa ca enne'
 yètse' ça tìtsa' làti cca i'yya, ạ'hua qui'ni gá tè ca

enne' cã nombre nu dacca' tì'a maestro. ⁸ Pero lebi'ì nna hué' le cuidado qui'ni làa gudàliani ca enne' le ti'atsi ná le enne' re' cuenta, porqui'ni ttu teruba enne' dua ná Maestro qui' le, es decir Cristua; pero iyaba le nna hermano ba gá luetsi le. ⁹ Nu ttu nuỹa gá le tàta le' yétsiloyuì ti'atsi runi li ą adorar, porqui'ni ttu teruba Dios Padre enne' dua ÿiabara' née Tata qui' le. ¹⁰ Nihua bittu gulaba latsi' le qui'ni gá ca enne' le qui'ni ná le nu neru qui' qui, porqui'ni làteruba Cristua nna née Xana' iyate le. ¹¹ Acca nuỹa enne' nu runia iyaba le servir, là enni'a nua' adiru enne' ÿeni entre lebi'ì. ¹² Nu cani qui'ni yala dàliania nna, pues i'yu tsá qui'ni egà'na menos lą; pero nu rulaba latsi'ì qui'ni lanu nuỹa ná rùą nna, pues i'yu tsá qui'ni cca lą enne' ÿeni. ¹³ Pero lebi'ì ca maestro de la ley nna ca fariseo nna, ica'rútsi'íru le porqui'ni yala enne' tsè' rulue' le, pero álahua hualini le. Ruthàya le reino qui' Tata Dios para ca enne', nihua lebi'ì làa rà'a le, ą'hua nihua làa rue'él'la' huá le canu calatsi' gá'a. ¹⁴ Ica'rútsi'íru lebi'ì ca fariseo nna ca maestro de la ley nna porqui'ni yala enne' tsè' rulue' le, pero álahua hualini le. Rigua le biỹa té qui' ca niula viuda nna, runi tè le oración tùni tse' para gulue' le ti'atsi yala enne' lí ná le. Acca adila fuerte ná castigo thí' le. ¹⁵ Ica'rútsi'íru lebi'ì ca maestro de la ley nna ca fariseo nna porqui'ni yala enne' tsè' rulue' le, pero álahua hualini le. Ribèni le hàstaá lo indatò' nna yúbitsi nna hueyila ttu enne' para tanuą ca cosa nu runi le. De chi ną enne' qui' le nna, runi le qui'ni ccą merecer achùppa tántola tsía lo yi'bél'laá ti'chula lebi'ì por mal nu rulue'ni

li a. ¹⁶ Ica'rútsi'íru lebi'ì porqui'ni labí la'yani' qui' Tata Dios té lo losto' le, pero catè latsi' le iche' le ca enne' nna rena le: Nuña diba guniã jurar nna gúduã templo qui' Jerusalén por testigo nna, bihua biña ccani. Pero rena huá le qui'ni nuña diba gúduã oro qui' templua por testigo nna pues chi ná obligado para guniã nu chi beniã ofrecer. ¹⁷ Lebi'ì canu làa rulaba tsè' latsi', yala chul·la re' la' riyeni qui' le. Rena huá le qui'ni canchu bel·liu qui' le nna làa yù'ã le templuã' nna entonces labí ná le'ya para Tata Dios. Biala dacca' adiru para gúdu le por testigo, tsí oruã' o tsí templo nu runi qui'ni cca oruã' le'ya áccá. ¹⁸ A'hua rena le: Nuña diba gúduã altar por testigo nna, bihua biña ccani, a'hua nuña diba gúduã por testigo ofrenda nu tsia lo altar nna pues chi ná obligado para guniã nu chi beniã ofrecer. ¹⁹ Necio ba ná le a'hua yala chul·la re' la' ritelini qui' le. Biala dacca' adiru para gúdu li a por testigo, tsí ofrendã' o tsí altar nu runi qui'ni cca le'ya ofrendã' áccá. ²⁰ Inte' nna nia' le qui'ni nuña diba runi jurar nna ruduã altar por testigo, pues rudu huá por testigo itute ofrenda nu tsia lúi. ²¹ A'hua nuña diba runi jurar nna ruduã templuã' por testigo, pues rudu huá Tata Dios por testigo porqui'ni templuã' nna ná para lèe. ²² A'hua nuña diba runi jurar nna ruduã ÿiabara' por testigo, pues rudu huá por testigo trono qui' ÿiabara' tsa'tsela tehuá Tata Dios enne' duani lo trono qui'áa. ²³ Ica'rútsi'íru lebi'ì ca fariseo nna ca maestro de la ley nna porqui'ni yala enne' tsè' rulue' le, pero álahua hualini le. Ribequia le para diezmo hàstaá ca semilla lathi to' ti'na menta nna anís nna comino nna, pero labila runi le ca cosa

nu adiru dacca' nu da' lo ley qui' Tata Dios ti'na lu'uxticia tsè' nna la' retúalatsi' nna fe nna. Ca nua' la náduel·la' guni le, pero nihua làa guxùl·la latsi' le gute le qui' diezmo. ²⁴ Nìdiruani titó' labí ritelíni le, pero càte latsi' le iche' le ca enne'. Ca mandamiento xcuìchuto' nna yala ribeqquia latsi' le guni le cã cumplir, pero ca mandamiento nu dacca' adiru nna nìdiruba làa rulaba latsi' le guni le cã. Te ttu dicho nu rena le: Lani cuidado ba ruttèni le vino nu ri'ya le para qui'ni làa gabi le ttu bé'ya to', atsi'íni ràbi la le ttu camello xeni tsè'. ²⁵ Airu lebi'ì ca maestro de la ley nna ca fariseo nna porqui'ni yala enne' tsè' rulue' le, pero álahua hualini le. Reyì le tsua' teruba fuera qui' ttu taza nna plato nna, pero liú'u la nna tsa'ti'ni le la'ubàna nna la'hueni lu'uxticia mal nna. ²⁶ Lu' fariseo, labí la'yani' té qui' le, porqui'ni priméruya ná qui'ni quíi le le' tazã' nna platuã' nna, làniana ccá huá nàrì lado fuérala. ²⁷ Airu lebi'i ca maestro de la ley nna ca fariseo nna porqui'ni yala enne' tsè' rulue' le, pero álahua hualini le. Yala latsitte rilá'ló ca bà tsíttsi canu beyú'u ì'yu, pero liú'u lá nna yala cuttsi ril·là' cã porqui'ni tsa'ti'ni cã tsítta yatti. ²⁸ A'hua lebi'i nna lo ra' teruba yala enne' lí rulue' le lani ca enne', pero liú'u lá losto' le nna tsa'ti'ni le la' huethacca'ỹí a'hua adí ca tul·la'. ²⁹ Ica'rútsi'íru lebi'ì ca maestro de la ley nna ca fariseo nna porqui'ni yala enne' tsè' rulue' le, pero álahua hualini le. Rilitha le monumento lo bà qui' ca profeta nna, a'hua yala iyyà latsitte rutsia le lo bà qui' adí ca enne' beni tsè' ru'a lo Tata Dios, ³⁰ rena tè le: Cálá chí tsè'e ri'u loti' gutsé'e ca ta' tàta qui' rí'ua nna labí uccua ri'u cabi tulappa enne' mal para gutti ri'u

ca enne' uccua profeta. ³¹ Inte' nna nia' le qui'ni por ca tìtsa'a nna ribèqquia le sentencìa contra la'a lebi'i ba de qui'ni runi le sostener qui'ni ná le descendiente qui' canu betti ca ca profétaá. ³² Acca lígúni telá cumplir maldad nu beyàtsani ca ta' tàta qui' lía guni ca, porqui'ni chi rulaba latsi' le guni lí a. ³³ Yala mañoso ná le tì'a ca bèl·là. Ti'áruálá modo guni le para làa cca le condenar tsía le lo yi'bél·laá cá. ³⁴ Acca rithél·la'a' lani le ca profeta nna a'hua canu ritelí tsè'nì nna ca maestro tsè' nna, pero lebi'i nna gútti la le cabi nna gutá' le cabi lo yà curutsi nna, attu te cabi nna hué' le cabi le' ca sinagoga làti retuppa le, a'hua gutsia latsi' le cabi le' ttu ttu ca yetsi nna. ³⁵ Anía modo ccá huá le responsable por lù'uti qui' ca enne' labí falta té qui' cabi, dèdsaba lù'uti qui' Abel enne' beni nu rú'ulatsi' Tata Dios, hàstaá lù'uti qui' Zacarías yì'ni Berequías enne' bètti le loti' dùa le' lí'a qui' templua èxaba làti du altar fuera. ³⁶ Hualigani te' riquixa'ánia' le qui'ni iyate nuá' nna tátsia iqquia iyaba lebi'ì canu tsè'e anna. ³⁷ Lebi'i canu tsè'e le' ciudad Jerusalén rútti le ca profeta nna rudua huá le íyya iqquia ca mensajero rithel·la' Tata Dios lani le. Iyé vuelta tsè' uccua látsa'a' gutùppa' le tì'a ttu yiti rutùppa ca yì'ni to' qui'ì liú'u xilì, pero labí uccua latsi' le. ³⁸ Acca nia'le qui'ni templo qui' lía' nna chi dua tàttsi bá, ³⁹ porqui'ni dèdsaba annana labiru ilá'ni le inte' hàstaá qui'ni i'yu tsá inne le tsè' nu cca quia' nna ina le: La' dàliani para cuiá'lu' porqui'ni da' cuiá'lu' por nombre qui' Señor dios.

24

¹ De beria Jesús le' templua chía déyeé nna,

gubiga' tè ca discípulo qui'áa para gulue'ni cabi e adí ca edificio qui' templua. ² Jesús nna rèe cabi: Anna teruba rila'ni le iyaba ca nui. Pero hualigani te' riquixa'ánia' le qui'ni i'yu tsá qui'ni labiru eyà'na iqquia luetsi ca íyya xeni nu cua'ni templuḡ, porqui'ni hual·lani canu da' idittu' nna guthìnnia gutàppa'ní cą iyáyiate cą.

³ Huappi tìe guri'e lo i'ya láą Monte de los Olivos, bitsina' tè ca discípulo qui'áa ru'a lúe nna gunàba titsa' cabi e yà'ba latsi' nna ra cabi e: Calatsi' tu quixá'ani cuią'lu' intu' cuaḡa ccá ca cosḡ. Biani señal ní ccá canchu chi íl·lani cuią'lu' attu, ą'hua canchu chi íl·lani fin qui' yétsiloyu cá. ⁴ Becàbi Jesús nna rèe cabi: Lihue' cuidado qui'ni nú ttu nuḡa guthácca'ḡíą le. ⁵ Porqui'ni nuḡetse' íl·lani lani nombre quia' nna ina cą qui'ni làcą nua Cristua. Anía modo nna ca enne' ḡetse' guthácca'ḡí cą. ⁶ Hua iyeni báni le ina cą qui'ni da' guerra o qui'ni chi cca guerra. Pero bittu gátsini le, porqui'ni náduel·la' cca iyaba ca cosḡ, pero ñihuani labí chi gùl·la' tè fin. ⁷ Porqui'ni ttu nación nna til·lą contra attu nación, ą'hua ttu gobierno contra attu gobierno nna. A'hua íl·lani itsahue' nna ubina' nna la' riḡú' fuérteni gaḡa tediba lugar nna. ⁸ Iyaba ca cosḡ nna ccá cą nu chì' thulo rubáni ca dolor. ⁹ Làniana gute cą le cuenta para ccá le sufrir hàstaá qui'ni gútti cą le. A'hua iyábani ca enne' nna guyudí' cą le porqui'ni ná le enne' ríalatsi' quia'. ¹⁰ Làniana nuḡetse' cą edúl·la'a latsi' quḡ nna gute cuenta luetsi quḡ ą'hua guyudí' luetsi quḡ nna. ¹¹ A'hua iḡetse' ca enne' íl·lani nna ina ca qui'ni rinne cą parte Tata Dios, pero labí líni cą. Enne' ḡetse' guthácca'ḡí cą. ¹² Por

causa de qui'ni hua dia la ràni tul·la' nna, acca la' tsì'ilatsi' qui' iyetse' ca enne' nna étu bą. ¹³ Pero nu thu ba tsìttsi' lani inte' hàstaá fin nna, lànua nna l·lą. ¹⁴ Náduel·la' ccá predicar evangelio nu cca qui' reino qui' Tata Dios le' itúyiani yetsiloyu para qui'ni ccá saber iyábani ca nación. Làniana íl·lani fin. ¹⁵ Acca canchu chi ilá'ni le nu guniạ nu ccábá latsi'ị le' lugar nu ná para Tata Dios, tì'a chi gutixà'a profeta Daniel (nu rul·la nna ná qui'ni hue'él·la' latsi'ị téliniạ), ¹⁶ làniana canu tsè'e le' región qui' Judea nna ná qui'ni ucuitta taá cạ tsía cạ lo ca ló'ya lá. ¹⁷ Nuỹa tediba duạ iqquia azotea qui' yú'u qui'ị nna, ná qui'ni eyadiạ nna ucuitta tabạ, bittu eya'ạ le' yú'u para thí'ạ biỹa te qui'ị. ¹⁸ A'hua nu reni fuera lo tsina qui'ị nna, bittu eyeqquiạ litsi'ị para gutùppạ ca yúi, sino ná qui'ni ucuitta tabạ. ¹⁹ Pero canchu chi gal·la' tsá nna ica'rútsi'íru ca niula nùà' huatsa to', ạ'hua canu rugatsi' yí'ni qui'. ²⁰ Acca línabani Tata Dios lani oración qui'ni canchu chi gal·la' tsá ucuitta le nna bittu ccá tiempo idil·la' nihua tsá redi' latsi' ri'u. ²¹ Porqui'ni íl·lani ca sufrimiento fuértene nu labí chi uccạ dèdeba gure' yétsiloyu hàstaá tiempo tsè'e rí'ui, nihua làa ccáruhuạ bitola nna. ²² Canchu labí eto' ca tsá tiempo qui' ca sufrimiéntua nna entonces lanú nuỹa l·lą. Pero por la' retúalatsi' qui' Señor lani canu chi becuí'e nna, acca labí itsa ca sufrimiéntua. ²³ Làniana canchu nuỹa gạ le: Línna' tsáruhuá, nì du Cristua, o línna' tsáruhuá nà' taá dùe, bittu tsíalatsi' le. ²⁴ Porqui'ni huàl·lani làti tsè'e le canu ina qui'ni làcạ nuá Cristua. Hua ría huá canu ina cạ qui'ni rinne cạ parte Tata Dios pero labí líni

ca. Làca nna guni ca iye ca milagro nna a'hua adí ca cosa de la'huacca nu ccáyíni latsi' ca enne' para qui'ni gurèxaèl·la' ca ca xiaba hàstaá canu chi rée'ní Tata Dios. ²⁵ Ca nui riquixa'ánia' le con tiémpuba. ²⁶ Así es qui'ni canchu gá ca le: Línna' tsáruhuá, fuera yétsia' taá dùe, bittu iria le. O canchu gá ca le: Le' ttu cuarto to' qui' templua' taá rì'e, bittu tsíalatsi' le. ²⁷ Porqui'ni tì'a rappi étha nna rudàni' rabánia' dèsdeba làti ril·lani bitsa hàstaá làti renia', a'hua ilá'ni iyáyiata ca enne' Nubeyu' de Ýiabara' canchu chi itée attu de repéntetaá. ²⁸ Porqui'ni gaýa tediba té ttu nu yatti nna, pues níahuá itùppa ca bechettu.

²⁹ Cuantu taání tté sufrimiento qui' ca tsá lània nna, entonces bitsa' nna echùl·la', a'hua biuá'a' nna labiru gudàni'a. Ca bélia nna ìnnia ca de ýiaba, a'hua iyaba canu tsia ýiaba nna tatittini ca. ³⁰ Làniana ilá'ni qui'ni dua Nubeyu' de Ýiabara'. Iyaba ca raza qui' yétsiloyu nna yala ehui'ni ca ilá'ni ca ne canchu chi íl·lanie lo bía lani la'huacca ýeni qui'e nna la'yani' de ýiabara' nna. ³¹ Lèe nna ithèl·la' teée ca ángel qui'e para ucuetsi cabi trompeta nna gutùppa cabi ca enne' rée'ní Tata Dios itúbani yétsiloyu, dèsdeba làti ril·lani bitsa hàstaba làti renia'. ³² Litelíni comparación qui' yexxuhuíá: Canchu chi rerè'ne lúj nna rebia ca l·la' qui'i nna, anía modo cca ri'u saber qui'ni chi' taáduq íl·lani tiempo verano. ³³ A'hua lebi'i nna, canchu chi ilá'ni le qui'ni cca iyaba ca cosa nu chi gutixa'ánia' le nna, á' modo nna ccá le saber qui'ni exatáa ru'a puerta chi debíga' fin. ³⁴ Nia' le qui'ni làniana, aláa antes, hual·lani fin qui' tiempo tse'e ri'uj. ³⁵ Ýiaba nna

yétsiloyu lani iyaba ca indatò' nna l·luya bá latsi' qui, pero ca titsa' quíyi'ì nna labí tté çà sino té qui'ni iyate çà nna ccá çà cumplir. ³⁶ Pero lanú nuÿa yù biÿa tsá ní nihua biÿa hora ní, sino làteruba Tata quíya'a nna yùe; nìdirubani Ñi'nie nna labí yù bi, nihua ca ángel tsè'e ÿiabara' nna labí yù cabi. ³⁷ Ti'a uccua loti' gùdua Noé, a'hua ccá canchu Nubeyu' de Ñiabara' nna chì íl·lanie. ³⁸ Porqui'ni ántesca ccá juicio indaá nna puro gu'ya go bá nna huettaná' bá nna beni ca enne' hàstaá qui'ni bi'yu tsá gutà'a Noéa le' bárcuá. ³⁹ Labí bennia çà cuenta hàstaá qui'ni uccua iyya juíciua nna biluÿa latsi' qui. Aníahuá ccá canchu chi íl·lani Nubeyu' de Ñiabara' de repentetaá. ⁴⁰ A'hua canchu chuppa ca nubeyu' tsè'e çà tsina, ttuá nna édi'e, attuá nna eyà'na bá. ⁴¹ A'hua canchu chuppa ca niula yù'u çà huettu, ttuá nna édi'e, attuá nna eyà'na bá. ⁴² Acca lítsé'e al tanto, porqui'ni labí yù le biÿa hora él·lani Señor qui' lía. ⁴³ Litelíni nui: qui'ni ttu tãta nna, cáalá yùá biÿa hora íl·lani ubàna nna, pues labí gá'athia porqui'ni calatsi'ì thuá al tanto para labí hue'él·la'á nuÿa cuana biÿa té le' yú'u qui'ì. ⁴⁴ Acca lebi'i nna, litse'e al tanto, porqui'ni Nubeyu' de Ñiabara' nna là' íl·lani taánié canchu chi nìdirubani làa rulaba latsi' le qui'ni íl·lanie.

⁴⁵ Nuni enne' ní ná ttu siervo fiel nna té la' riyeni tsè' qui'ì, acca bethà'na xana' niá na le' yú'u qui' bía para huí'á na cuidado nna gutiá nu go ca enne' tsè'e tsina hora ná qui'ni gó çà cá. ⁴⁶ Ica'rubà enni'a canchu chi etsina' xana' niá nna ilá'ni bíá qui'ni runiá voluntad qui' bi. ⁴⁷ Hualigani te' riquixa'ánia' le qui'ni gute bi làtsi' ní'ì iyate nu té

qui' bi para cu'úbi'ą. ⁴⁸ Pero ttu siervo nu labí runi tsè' nna gulaba lá latsi'į nna caniá: álahua annatè él·lani xana' ya'a, ⁴⁹ lániana thulo chią huí'ą adí canu runi tsìnàa, ą'hua í'ya gúą lani ca borracho. ⁵⁰ Níyalatsi' enni'a nna él·lani xana' niá tsá nu nìdi làa ribèdą bi, hora nu labí yùą qui'ni él·lani bi nna. ⁵¹ Xana' niá nna idí'ni guni bi ą castigar, lániana gudàl·la tè bi ą lani adí canu beỹia. Nía nna yala ccą sufrir nna cuetsiá nna goyà'atsùni layi'į.

25

¹ Canchu chi i'yu tsá nna, entonces reino qui' Tata Dios nna ccą comparar tì'a tsìi ca niula cuiti', guỹi' cą ca lámpara qui' qui' nna biria tè cą tal·lèda cą ènne'yu' gúttsaná'a para guni cą bi acompañar yú'u thá'a. ² Gayu' ca niúláa nna uccua cą nu té la' riyeni tsè' qui' qui', pero ágayu' cą nna labí la' rulabalatsi' tsè' té qui' qui'. ³ Canu bihua rulaba latsi' tsì'a nna guỹi' gáláa cą ca lámpara qui' caniá, pero labí guỹi' cą aceite para cà'a cą le' ca lámpara. ⁴ Canu té la' riyeni tsè' qui' caniá nna gutà'a bá cą aceite le' ca lámpara qui' caniá. ⁵ Pero rìtsa bá ènne'yu' gúttsaná'a nna, gul·lani chía betsiàlà qui' qui' nna gutá'athi cą. ⁶ Merua riluèla yèlà nna biyeni tsì'i ttu nu gunne iditsa nna ra: Nì chi da' ènne'yu' gúttsaná'a, líria tatsà' le bi. ⁷ Iyaba ca niula cuiti'a nna huatha chì cą nna begàl·la' cą ca lámpara qui' caniá. ⁸ Lániana gayu' canu bihua rulaba latsi' tsì'a nna ra cą canu té la' riyeni tsè' qui' caniá: Lígúnna xiarú bání titó' aceite qui' líą' qui' tu', porqui'ni chi reyòla ca lámpara qui' tu'į. ⁹ Becàbi gayu' canu té la' riyeni tsè' qui' caniá nna ra cą: Para qui'ni làa eyàtsa qui' tu' nihua lebi'i nna,

adila tsa' lítsía xìa làti rutti' cạ aceite nna lígó'o para lebi'i. ¹⁰ Pero miéntraste dia cạ huì'i aceite nna gul·lani ènne'yu' gúttsaná'a. Canu tsè'e prevenídua nna gutà'a cạ lani bi làti cca thá'a. Làniana beyaya tè puértaá. ¹¹ Bitola nna betsina' ca niula nu labí rulaba latsi' tsì'a nna bel·làbi cạ ru'a puértaá nna ra cạ: Señor, señor, guthàlia cuiạ'lu' gá'a tu'. ¹² Pero becàbi enne' rúttšaná'a nna ra bi cạ: Hualigani labí nabia' te' le. ¹³ Làniana ra huá Jesús cạ: Por nui nna acca lebi'i nna lítsé'e al tanto porqui'ni labí yù le biyã tsá nihua biyã hora qui'ni Nubeyu' de Ȳiabara' nna ná qui'ni él·lanie.

¹⁴ Reino qui' Tata Dios nna cca huá comparar tì'a ttu ènne'yu' nu rida' bi dia bi idittu' nna, acca gutâyì tè bi canu runi tsina qui' bía nna bethà'na bi lani cạ ca interés qui' bía. ¹⁵ Ttuạ nna bete bi gayu' bolsa to' nu yù'u oro lani ạ, attuạ nna bete bi chuppa bolsa to' nu yù'u oro lani ạ, attuạ nna bè' bi ạ ttu bolsa to' nu yù'u oro lani ạ. Bete bi según ti'iỹa té bá capacidad qui' ttu ttu qui. Làniana guda' té bi dia bi idittu'. ¹⁶ Nu guỹi' gayu' bolsa bél·liuá nna huia taạ nna bethà'ạ bél·liuá nna beni tịạ gana ágayu' tanto. ¹⁷ Anía tehuá nu guỹi' chuppa bolsa bél·liuá nna beni huá gana áchúppa tanto. ¹⁸ Pero nu guỹi' ttùba bólsaá nna huịạ nna gutàniạ liú'u yú nna becattsi' tịạ bel·liu qui' xana' niá. ¹⁹ Guttè diba tsá nna bel·lani xana' ca siérvuá nna beyuni bi cuenta lani cạ. ²⁰ Bitsina' tè nu guỹi' gayu' bólsaá nna nùà' tịạ ágayu' bolsa nna rạ: Señor, gayu' bolsa betsia cuiạ'lu' làtsi' nàya' nna, nìba tè ágayu' bolsa nu chi benia' gana iqqụ. ²¹ Acca ra xana' niá na: Tsè'ba ná nu beni lu' siervo tsè' nna cumplido nna; lani

ti'to' rúba uccua lu' fiel, acca adírula iŷeni gúnná' làtsi' ná' lu'; por nui nna yala redacca' látsa'a', a'hua lu' nna edacca' huáni lu'. ²² Bitsina' tehuá nu guŷi' chuppa bólsaá nna ra: Señor, chuppa bolsa betsia cuiã'lu' làtsi' nàya' nna, nìba tè áchúppa bolsa nu chi benia' gana iqquj. ²³ Xana' niá nna ra bi a: tsè'ba ná nu beni lu' siervo tsè' nna cumplido nna; lani ti'to' rúbá uccua lu' fiel, acca adírula iŷeni gúnná' làtsi' ná' lu'; por nui nna yala redacca' látsa'a', a'hua lu' nna edacca' huáni lu'. ²⁴ Làniana bitsina' tè nu guŷi' ttu bólsaá nna ra: Señor, inte' nna yúa' qui'ni ná cuiã'lu' ttu enne' duro, pues redi' cuiã'lu' làti labí gùda cuiã'lu', a'hua rutùppa cuiã'lu' làti labí bedál·la cuiã'lu'. ²⁵ Por nui nna gutsi te' nna becattsi' bá' bolsa bel·liu qui' cuiã'lu'í liú'u yú, acca nìba tè nu benna cuiã'lu' lani inte'. ²⁶ Becàbi tè xana' niá nna ra bi a: Siervo malo nu labí riŷu', hua yù bá lu' qui'ni redi'a' làti labí guda' a'hua rutuppa' làti labí bedál·la'a' nna. ²⁷ Biecca labí gulú'u lu' bel·liu quíyi'í banco para qui'ni canchu chi el·lania' nna edi' ya' a lani ŷi'ní. ²⁸ Acca lebi'í nna lícua bolsã' lo ní'í nna líúte tì a lani nu té tsii bolsa qui' niã' la. ²⁹ Porqui'ni nuŷa diba té qui'í nna, la nna thí' lá adí nna gata'níã adí iŷeni. Pero nu labí té qui'í nna, pues hàstaá ti'to' nu té qui'í nna ítua telã. ³⁰ Acca lithi' tè siervo nu làa riŷu'a nna, líúdal·la a fuera lá le' chul·la, nía nna ccã sufrir nna cuetsiã nna góya'atsùni layi'í.

³¹ Canchu chi íl·lani Nubeyu' de ŷiabara' le' la'yani' qui'e lani iyaba ca santo ángel, làniana cué'níe lo xila' tsè'ni qui'e para gucuí'e entre ca enne'. ³² Por ejemplo: ttu pastor nna rèl·la'a bá

luetsi ca carneru to' lani ca chivo. A'hua Nubeyu' de Ȳiabara' nna etùppa itúyiate ca enne' qui' iyaba ca nación ru'a lúe. ³³ Ca enne' gutsì'e lado ná' b̄anie nna ccá c̄a comparar lani ca carnero to' qui' ttu pastor. Pero ca enne' gutsì'e lado ná' yattie nna ccá c̄a comparar lani ca chivo qui' ttu pastor. ³⁴ Lèe nna née Rey enne' rigú'ubia' lo iyate acca gá t̄ie ca enne' tsè'e lado ná' b̄anie: Lità canu chi beni Tata qui'a bendecir, léya'a le' reino nu chi ná preparado para lebi'ì d̄èsdeba uccua yétsiloyu. ³⁵ Porqui'ni gutùnia' nna benna le gùtua'; gubìtsia' nna benna le inda gu'ya'; guréni ttùba' nna bedi' le inte' litsi' le; ³⁶ casi xpela' bá gurénia' nna benna le nu gucuá'a'; huì' te' nna tanàba titsa' le inte'; gùttá'a' litsi' iyya nna b̄ita le tanèl-le' le inte'. ³⁷ Làniana ca enne' beni tsè'a nna ecàbini cabi e nna ina cabi: Señor, cuani gutùni cuiã'lu' nna benna tu' gutó cuiã'lu' cá. Cuani gubitsi cuiã'lu' nna benna tu' inda gu'ya cuiã'lu' cá. ³⁸ A'hua cuani bilá'ni tu' gureni ttùba cuiã'lu' nna bedi' tu' cuiã'lu' litsi' tu' cá. Cuani bilá'ni tu' gurèni cuiã'lu' casi xpela' bá nna benna tu' nu guccu' cuiã'lu' cá. ³⁹ A'hua cuani huì'ni cuiã'lu' nna tanàba titsa' tu' cuiã'lu' cá. A'hua cuani gùtta' cuiã'lu' litsi' ìyyà nna tanèl-le' tu' cuiã'lu' cá. ⁴⁰ Ecàbinie c̄a nna inéé: Hualigani te' nia' le qui'ni loti' beni li ã lani nuŷa ttu ca hermanos quíyi'ì m̄asqui'ba n̄a nu adiru xcuìchuto' nna, pues t̄i'atsi para inte' bá beni li ã. ⁴¹ Làniana gá huée canu tsè'e lado ná' yattie: Liucùtta ru'a lua' porqui'ni maldito bá ná le, tsía le lo yí' nu chi n̄a preparado para numalua lani ca ángel qui'ì, làti cca c̄a sufrir tulidàni. ⁴² Porqui'ni gutùnia' nna labí benna le gúá'; gubìtsia' nna labí benna le inda í'yá'; ⁴³ uccua'a' ttu enne' dittu' lani

le nna pero labí benna le ttu lugar to' làti eyà'na'; casi xpela' bá gurénia' nna pero labí benna le ttu lári' to' gaccu'a'; huì' te' nna ą'hua guttá'a' litsi' ìyyà nna, pero labí tanàba titsa' le inte'. ⁴⁴ Làniana ecàbi huáni cą ne nna ina cą: Señor, cuani gutùni cuią'lu' nna gubitsi cuią'lu' nna gurèni ttùba cuią'lu' cá. Cuani gurèni cuią'lu' casi xpela' bá nna huì'ni cuią'lu' nna gutta' cuią'lu' litsi' ìyyà nna labí beni tu' cuią'lu' atender cá. ⁴⁵ Làniana ecàbinie cą nna ínéé: Hualigani te' nia' le qui'ni lebi'ì nna labí beni li ą lani nuña ttu canu adiru xcuichu tú'ì, acca nihua lani inte' labí beni li ą. ⁴⁶ Acca ca nui nna tsía bá cą para ccá cą sufrir tulidàba ttu castigo nu labí fin qui'ì té, pero ca enne' biria tsè' ru'a lúe nna edacca' latsi' qui' tulidàni lani la'labàni nu labiru ttíą qui' qui'.

26

¹ Beyacca ba gutixà'a Jesús iyaba ca titsa'a, làniana rée ca discípulo qui'áa: ² Chi yù le qui'ni áchúppa ubitsa teruba reyatsa para gal·la' tsá fiesta nu reya ri'u Pascua, làniana gute cą inte' Nubeyu' de Ÿiabara' cuenta para gutá' cą inte' lo yà curutsi.

³ Làniana iyaba ca sacerdote principal nna ca maestro de la ley ą'hua canu rigú'ubia' entre ca enne' judíua nna betùppa cą le' lí'a qui' Caifás nu ná huexána' qui' ca sacerdotéa. ⁴ Làcą nna gulu'u titsa' luetsi qui' ti'íyala guni cą para gudaxu' cą Jesús lani máñaba para gútti cą ne. ⁵ Ra cą: Alàa tsá gani fiéstą' gudaxu' ri'u ą preso, para qui'ni làa etùppa ca enne' ýetse' nna chatha alboroto le' ciudíj.

⁶ Làniana re' Jesús le' yetsi láa Betania litsi' Simón enne' huì'ni yetsu' yùtsu'a. ⁷ Bitsina' tè ttu niula ru'a lúe nù'á ttu frasco tsíttsi to' tá'a lì'ì perfume nu dacca' yaÿi tsè' beduá perfúmea iqquia Jesús de rì'e lo méyáá. ⁸ De bilá'ni ca discípulua nui nna bitsa'áni cabi nna ra cabi: Biecca catittia nui ni'i, ⁹ porqui'ni cáalá bètti' la ri'u perfúmea' nna, iÿeni tsè' quiÿa cã na guni ri'u cualani ca enne' ritè la'di'. ¹⁰ De gutelíni Jesús nu rulaba latsi' ca discípulua nna rée cabi: Biani cca ritsa' le niulí ni'ì. Pues lã nna chi beniã ttu obra tsè' lani inte'. ¹¹ Ca enne' pobre nna tulidàba tsè'e cã lani le, pero inte' nna álahua tulidà renia' lani le. ¹² Porqui'ni de beduá perfúmì iqquia' nna beniã inte' preparar para canchu chi igáttsi'a'. ¹³ Hualigani te' nia' le qui'ni gaÿa tediba ccá predicar evangéliuì le' itúbani yétsiloyu nna, guna huá ca enne' nu beni niulí.

¹⁴ Làniana ttu canu tsì'nua láa Judas Iscariote nna huíã ru'a lo ca sacerdote principal nna, ¹⁵ rã cã: Biani gúnnání le quia' para gútiã' cuenta Jesús lani le. Làcã nna beni cã acordar lani ã qui'ni gute cã tsìi érua' moneda nu de plata quì'ì. ¹⁶ Desdeba lânia nna beyìla latsi' Judas ti'iyala modo gutiã ne cuenta.

¹⁷ Primero tsá fiesta qui' Pascua loti' chi ro cã ettaxtíla sin levadura nna, bitsina' ca discípulo qui' Jesús ru'a lúe nna ra cabi e: Gani calatsi' cuiã'lu' guni ri'u fiéstì para qui'ni guni tu' preparar go se' cuiã'lu'. ¹⁸ Lèe nna rée cabi: Lítsía le' ciudã' le' litsi' ttu nubeyu' nna ga li ã: Maéstrua nna guthèl'le'e intu' nna rée: Chi debiga' hora quia', acca le' litsi' lu' nna gunia' celebrar páscuì lani ca discípulo quíyi'ì. ¹⁹ Ca discípulua nna beni cabi tì'taba ra

Jesús cabi nna beni cabi preparar para guni cabi celebrar Pascua. ²⁰ De gùl·là tsá lània nna gurè'nie lo méyaá lani tsì'nu ca discípulua. ²¹ Miéntraste ro cabi nna gunne Jesús nna rée: Hualigani te' riquixa'ánia' le qui'ni ttu le nna gutiã inte' cuenta làtsi' ná' canu labí cca guyu çã inte'. ²² Làcabi nna yala triste uccuani cabi. Gudulo ttu ttu tsa cabi nna ra cabi e: Tsí inte' Señor. ²³ Becàbie nna rée: Nu ruga'a ní'ĩ le' plato lani inte' nna, là nua gutiã inte' cuenta. ²⁴ Nubeyu' de Ȳiabara' nna hualigani ccá bá cumplir lani e iyate nu ga'na escrito nu cca qui'e, pero ica'rútsi'íru nu gutiã ne cuenta; pues para là nna adila tsa' cáalá bittu telá gùliã. ²⁵ Làniana Judas nu guniã ne traicionar nna rã: Tsí inte', Maestro. Becàbi Jesús nna rée na: Lu' bá chi ra ã'. ²⁶ De chi ro cabi ttu te la'góa nna, guỹi' Jesús ettaxtílaá nna gunàbèe bendición lani Tata Dios enne' ná Tata qui'áa nna gùl·le'ée ettaxtílaá nna bì'e ca discípulo qui'áa nna rée: Líthi' nna ligo nna, nui nna nã cuerpo quia'. ²⁷ Làniana guỹi' tìe vása. De chi bì'e gracia Tata qui'áa nna betie lani cabi nna rée: Líthi' nna lí'ya iyate le; ²⁸ porqui'ni nui nna nã reni quia' para qui'ni ccá seguro promesa cubi nu runia' nna ilàliã para qui'ni gata' la' runittiló por ca tul·la' qui' iỹetse' ca enne'. ²⁹ A'hua riquixa'ánia' le qui'ni dèsdèba annana labiru i'ya' inda qui' betsulí' hàstaá qui'ni i'yu tsá i'ya ya' ã' attu lani le le' reino qui' Tata Dios.

³⁰ De beyacca bìl·la cabi hímnua nna huía cabi lo i'ya láã Monte de Olivos. ³¹ Làniana Jesús nna rée cabi: Iyaba le nna gutsè'e latsi' le inte' nèle, porqui'ni ra Tata Dios lo Escritura: inte' nna gútía'

permiso para gútti cã enne' ná Pastor, làniana ca carnero qui' bía nna gathilàlia cã. ³² Pero riquixa'ánia' le qui'ni bitola de eyátha'a' de lo lù'uti nna, nérua' lo le para etsa' ri'u Galilea attu vuelta. ³³ Làniana gunne Pedrua nna ra bi e: Màsqui'ba iyaba cã gutschè'e latsi' quì cuiã'lu', pero inte' nna nunca labí gutschè'e látsa'a' cuiã'lu'. ³⁴ Jesús nna rèe bi: Hualigani te' nia' lu' qui'ni nèlà nna tsunna vuelta labí thí'ché' lu' qui'ni nabia'ni lu' inte', làniana cuetsi xcurúdia. ³⁵ Pedrua nna ra bi e: Màsqui'ba canchu caduel·la' gatti huá' lani cuiã'lu', pero labí ínniá' qui'ni làa nabia' te' cuiã'lu'. Anía tehuá ra iyaba ca discípulua.

³⁶ Làniana bitsina' Jesús lani cabi ttu lettia láã Getsemaní nna rèe ca discípulo qui'áa: Niba líxuani miéntraste tsa'á' gunia' oración. ³⁷ Jesús nna guche' tìe Pedrua a'hua chuppa ca ÿi'ni Zebedéua nna. Làniana gudulo uccuaní triste latsi'e nna tsì'irúbani uccuanie nna ³⁸ rèe cabi: Yala triste caní latsi' lóstu'a' ti'atsi chì' taání rattia'. Niba licuèda inte' nna bittu ga'athi le. ³⁹ Guda' tìe áti'to' tè anía lá nna, beduyíbie nna benie oración nna rèe: Tata ÿitsi' quia', canchu ná posible qui'ni bittu ttí'a' ca sufrimiéntuj, pero aláa tì' ccá bá látsa'a' sino ccá bá según voluntad qui' cuiã'lu'. ⁴⁰ Làniana beyéqqie làti tsè'e ca discípulo qui'áa nna tì'èthi bá cabi, acca rèe Pedrua: Tsí labí ccani le gúchia le bétsiala ttu hora rúbá para guni le inte' acompañar cá. ⁴¹ Lítsé'e al tanto, lígúni oración para qui'ni làa innia le le' tentación. Hualígáláa yala dispuesto ná le ccá le enne' fiel lani inte', pero labí fuerza té qui' le. ⁴² Huía tìe attu nna benie oración nu cca chuppa vuelta nna rèe: Tata ÿitsi', canchu labí

posible té para qui'ni làa ttí'a' ca sufrimiéntuį, pues ccá bá según voluntad qui' cuią'lu'. ⁴³ De betsine'e attu nna dedeti'áthi hua cabi, porqui'ni tsa'ti'bání bétsiala lo cabi. ⁴⁴ Bethà'na bée cabi nna huíe attu benie oración nu cca tsunna vuelta nna gunnie la'a mísmuba ca títsa'a. ⁴⁵ Làniana betsine'e attu làti tsé'e ca discípulo qui'áa nna rée cabi. Tsí átsabá ti'éthi le. Chí gùl·la' hora qui'ni inte' Nubeyu' de Ỹiabara' nna ttí'a' làtsì' ná' canu tul·la'. ⁴⁶ Léyátha nna léya', nì chi da' nu gutią inte' cuenta.

⁴⁷ Atsabá rinne Jesús nna, gul·lani chì Judas ttu canu tsi'nua. A'hua iỹétse'ni ca enne' da' lani ą yù'u ná' qui' espada l·le yà l·le. Làçą nna da' çą por orden qui' ca sacerdote principal ą'hua por canu rigú'bia' le' yétsiá. ⁴⁸ Judas nu gutią ne cuéntaá nna gutixà'ą ti'iỹa ná seña nu gunią, nna rą: Nu gutsa'lo ya'a nna, lą nua, gudaxu' tabá li ą. ⁴⁹ Gubiga' taą ru'a lo Jesús nna benią ne saludar nna rą ne: Maestro. Làniana betsa' tè lų ne. ⁵⁰ Jesús nna rée na: Amigo, bianicca da' lu'. Làniana gubiga' çą làti du Jesús nna bedaxu' chì çą ne preso. ⁵¹ Pero ttu enne' entre canu tsé'e lani Jesús nna gulèqquia bi espada qui' bía nna becàa ná' bi nna bè' bi ttu huenítsina qui' huexána' qui' ca sacerdotéa nna guchu bi yéti nagui'į. ⁵² Jesús nna ra tìe bi: Begú'u espada qui' lu'ą' lugar qui'į, porqui'ni iyaba canu ribèqquia çą espada nna, pues lani espada hua il·lųyaní latsi' qui'. ⁵³ Tsí ina ri'u cani lu' qui'ni inte' nna bihua cca te' inábania' Tata qui'a, lèe nna ithèl·le'e téelá tsì'nu ejército de ca ángel para edi' cabi inte' cá. ⁵⁴ Pero cáalá ná qui'ni cca lą', ti'ala modo ccá cumplir nu ra lo ca Escritura làti riquixa'a qui'ni náduel·la' ccá' padecer ni'i. ⁵⁵ Làniateá nna ra Jesús canu ỹétse'á:

Tì'a canu dia gudaxu' ttu ubàna, a' da' le yù'u ná' le espada nna yà nna para gudaxu' le inte' preso. Ttu ttu tsá bá gùri'a' le' templua nna gutixa' ánia' iyaba le nu cca qui' Tata Dios, atsi'íni bihua bedaxu' le inte' nna. ⁵⁶ Pero iyaba canui cca para qui'ni ccá cumplir nu bedia ca profétaá acerca de inte'. Làniana iyaba ca discípulua nna betse'e latsi' cabi e nna becuitta cabi.

⁵⁷ Canu bedaxu' ca Jesús preso nna guche' ca ne ru'a lo Caifás nu ná huexána' qui' ca sacerdotéa, làti tuppa ca maestro de la ley a'hua canu rigú'ubia' entre ca enne' judíua. ⁵⁸ Pedrua nna idittu' bá deno bi e hàstaá le' lí'a ru'a yú'u qui' huexána' qui' ca sacerdotéa. Gutà'a tè bi nna gurè'ni bi lani ca policia para inna' bi biya guthácca' ca Jesús. ⁵⁹ Làniana ca sacerdote principal a'hua canu rigú'ubia' le' yétsiá nna lani iyaba canu retùppa Junta Suprema qui' ca enne' judíua nna reyila ca ttu causa contra Jesús, para qui'ni gappa ca néda gute ca ne cuenta para gattie. ⁶⁰ Pero labí biya caúsani betseláni ca contra lèe màsqui'ba iytse' ca gulìtha ca bela'na qui'e. Bitòyìlani nna gubíga' áchúppa testíguá nna beni latsi' qui' nna ⁶¹ ra ca: Nui nna ra qui'ni huaccaniá gutàppa'a templo qui' Tata Dios, pero le' tsunna ubitsa teruba nna echìthà na attu. ⁶² Guduli tè huexána' qui' ca sacerdotéa nna ra ne: Tsi bihua biya ecàbi tí' lu'. Biani nuq' ra canui contra lu' cá. ⁶³ Pero Jesús nna labí becàbie. Làniana huexána' qui' ca sacerdotéa nna gunniá attu nna ra ne: En nombre de Dios, pues lèe nna bànie tulidàba, rinàbania' lu' qui'ni quíxá'a lu' canchu hualí ná lu' Cristo Ýi'ni Tata Dios. ⁶⁴ Jesús nna rèe na:

Lù'ba chi ra á'. A'hua nna nia' le qui'ni dèsdeba annana ilá'ni le Nubeyu' de Ȳiabara' duánie lado ná' bàni de la'huacca qui' Tata Dios nna íl-lanie lo bía ȳiabara'. ⁶⁵ Làniana huexána' qui' ca sacerdotéa nna guchèda'ní ȳúi para gulue' qui'ni yala bitsa'ániã nna rã: Labí respeto té qui'ì lani Tata Dios. Biáruálá testíguni riquína'ni ri'u cá. Chi biyéni le gunniã ca titsa' nu ná qui'ni làteruba Tata Dios ínnie á'. ⁶⁶ Annana biani ína le ccá qui'ì. Becàbi tabá cã nna ra cã: Ccá bã merecer gattiã. ⁶⁷ Làniana betùtu chì xèni' qui' lúe nna bè' cã ne puñete. Adí cã nna gutìni ná' qui' lúe nna ⁶⁸ ra cã ne: Canchu ná lu' Cristo nna guna tsanna nuỹa nua' bí'ã lù'na.

⁶⁹ Pedrua nna re' ba bi le' lí'a. Làniana gubiga' ttu criada làti re' bía nna rã bi: A'hua lu' nna gurèni huá lu' lani Jesús nu Galiléã'. ⁷⁰ Pedrua nna labí guỹí'ché' bi nna ra bi ru'a lo iyaba qui': Labí yua' biỹa nuã' ra lu'. ⁷¹ De beria bi ru'a puértaá nna bilá' tènì attuã bi nna rã canu tsè'e nía: A'hua nui nna gurèni huá lani Jesús Nazarénuã'. ⁷² Labí guỹí'ché' Pedrua attu vuelta nna beni bi jurar nna ra bi: Labí nabia' te' nubéyu'ã'. ⁷³ Ti'tó' taá bitola nna gubiga' canu tsè'e nía nna ra cã bi: A'hua lu' nna hualigani ná lu' enne' qui' qui' porqui'ni hàstaá la' rinne qui' lu' nna redacca' rabání. ⁷⁴ Beni chi Pedrua jurar nna ra bi: Nitti ba' canchu labí lí te' de nia' qui'ni labí nabia' te' nubéyu'ã'. Làniana guretsi chì xcurúdia. ⁷⁵ Bexa tè latsi' Pedrua ca titsa' gunne Jesús loti' rèe bi qui'ni: Labí cuetsi xcurúdia ántesca ccá tsunna vuelta guni lu' inte' negar. Làniana yala behuiní'ni bi nna beria bi

fuera nna biditsuní bi guretsi bi.

27

¹ De chi da' ràni'a nna iyaba ca sacerdote principal a'hua canu rigú'ubia' entre ca judíua nna gunne lettia ca ti'iyá modo guni ca contra Jesús para gútti ca ne. ² Beýìqquia ca né'e nna bete tè ca ne cuenta lani gobernador Poncio Pilátuá.

³ Làniana Judas nu benia Jesús traicionar nna, de bilá'niá qui'ni nu ýeni chi ruthácca' ca ne nna, acca beleníniá nna uccua latsi'ì ótiá tsìi érua' moneda nu de plátaá lani ca sacerdote principal nna canu rigú'ubia' entre ca enne' judíua nna, ⁴ acca ra: Inte' chi benia' tul·la', betí'a' cuenta ttu enne' inocente para gattie. Lacá nna ra ca na: Biáruá dacca' guni tu' ni'i. Nà'ba beyu ti'iyá guni lu'. ⁵ Judas nna guru'na tiá bél·liuá le' templua nna beria tiá nna huíá guthi yániá nna gúttiá. ⁶ Ca sacerdote principal nna de bedi' ca bél·liuá nna ra luetsi quí: Labí ná qui'ni cu'ú ri'u bél·liuá làti yù'u ofrenda qui' templuá porqui'ni ná nu dàcca'ní réni qui' ttu enne'. ⁷ Guléqquia lettia diba ca nna huí'i ca lani bél·liuá ttu pedazo loyu qui' ttu nubeyu' nu runi traste, para ccá panteón qui' canu dittu'. ⁸ Dèseba lánia nna gutìxa tè ca lá lóyúa: Loyu por precio de réni. A'ba té líj hàstaba natsá. ⁹ Ania modo uccua cumplir nu ra Jeremías enne' uccua profeta qui' Tata Dios tiempo antigua nna ra bi:

Guýi' ca tsìi érua' pieza plata, precio nu bedu ca ýi'ni Israel nu dàcca'ní ttu enne' lánia.

¹⁰ Lani bél·liuá nna huí'i ca loyu qui' nu runi trásteá, ti'a beni Señor inte' mandado.

¹¹ Jesús nna de gùdue ru'a lo gobernador Pilatua, lã nna gunàba tìtsa'ã ne nna rã: Tsí ná lu' rey qui' ca judíuã cá. Jesús nna rèe na: Lù'ba chi ra á'. ¹² Ca sacerdote principal ă'hua canu rigú'ubia' entre ca enne' judíua nna betsia cã queja contra Jesús. Pero lèe nna labí becàbie. ¹³ Làniana Pilatua nna rã ne: Tsí bihua riyénini lu' bícca'áya rinne cã contra lu'. ¹⁴ Jesús nna nidi ttu tìtsa' labí becàbie hàstaá qui'ni gobernador nna yala uccuaýí latsi'ì.

¹⁵ Tsá gani fiéstaá nna té costumbre qui' gobernador gúla'ã ttu preso, nuýa tediba inàba yétsiá. ¹⁶ Merua lànìa nna té ttuã litsi' ìyyà láã Barrabás, hua dàa gá tìtsa' qui'ì runiã mal qui' ca enne'. ¹⁷ De betùppa iyaba ca enne' judíua nna ra Pilatua cã: Núlá calatsi' le gúlá'a', tsí Barrabás o tsí Jesús enne' lá Cristo áccá. ¹⁸ Anía ra Pilatua porqui'ni hua yù bã qui'ni por la' yélatsi' bá bete cã Jesús cuenta lani ă. ¹⁹ De re' Pilatua le' juzgádua nna bitsina' ttu razón nu guthèl'la' niula qui' Pilatua nna rã: Bittu tehuá gúlatsi' qui' lu' nu cca qui' nubeyu' inocénteã', porqui'ni yèlã tabíní gunne te' bitsiàla por causa qui'ì. ²⁰ Pero ca sacerdote principal nna ă'hua canu rigú'ubia' entre ca enne' judíua nna gulù'u yì' cã latsi' yétsiá qui'ni innàbani cã Pilatua qui'ni gudilã Barrabás lá pero Jesús nna gatti bée. ²¹ Gobernador nna gunàba tìtsa'ã cã nna rã: Núlá canu chuppí calatsi' le gúdilá'a'. Becàbi taá cã nna ra cã: Barrabás. ²² Pilatua nna rã cã: Biala gunia' lani Jesús enne' lá Cristuì ni'ì. Becàbi iyaba cã nna ra cã: Tá' bã lo curutsi. ²³ Làniana ra Pilatua cã: Pues biani mal ni chi benia' ni'ì. Pero làcã nna adila guretsiyà'a cã nna ra cã: Tá'

bá lo curutsi. ²⁴ Beyùba Pilatua qui'ni labí cca tsi qui' qui, ántesla adila escándalo runi cą, acca guỹi'ą inda nna guti ní'ı ru'a lo canu yétsiá nna rą: Por nui nna cca le saber qui'ni labí ccá' responsable por lù'uti qui' ènne'yu' tsè' du nì. Lebi'i ba ibàga' lı ą. ²⁵ Làniana ituba yétsiá nna rą: Intu' ba lani ca ỹi'ni tu' nna ibàga' tu' réni quì'ı. ²⁶ Pilatua nna bela' tią Barrabás. Pero benią mandado iyàa' la Jesús, làniana betią ne cuenta para té'e lo curutsi. ²⁷ Ca soldado qui' gobernador Pilatua nna guche' cą Jesús le' lí'a qui' paláciua nna betùppa iyábani cą ita'lùbani e. ²⁸ Gulèqquia tè cą ỹúe nna begàccu' cą ne ttu lári' de color morado. ²⁹ Gulù'u tè cą iqquie ttu corona tíanią yèttse'. Gulù'u tè cą ttu vara le' né'e lado bàni, bedu tè ỹibi qui' ru'a lúe nna beỹitsi tènì cą ne nna ra cą: Viva, Rey qui' ca judío. ³⁰ Làniana betutu xèni' qui' ne nna guỹi' tè cą vara nu dèniáa nna bè' cą iqquie. ³¹ Bitola de beni cą ne burla nna, bebèqquia cą lári' nu naccu'éa nna begàccu' cą ne ca ỹúeá attu. Làniana guche' cą ne para gutá' cą ne lo curutsi.

³² Merua riria cą lani e nna bettsà' cą ttu nubeyu' Cirenéo láą Simón, behuà'ni duel·la' cą na curutsi qui' Jesús. ³³ Bitsina' cą lugar láą Gólgota, titsa' qui' ri'u nna rą: Iqquia Bega' Yatti. ³⁴ Bete cą vinagre chixiá nu ná il·la' para í'yèe. Benixi díbéé vinágreá nna pero labí gú'yèe na. ³⁵ Betaá' diba cą ne lo curútsia nna làniana bedàl·la' cą rifa nuỹa la cą gal·la' ca ỹúeá. Anía modo nna uccua cumplir nu bedia ttu profeta gunne bi nu cca quì'e nnà ra bi: Gùl·la'ání cą ca ỹó ya'a nna bedàl·la' cą rifa lo qui. ³⁶ Guỹua tení cą nna gunna' cą ne. ³⁷ Betaá' tè cą ttu

letrero iqquia curutsi làti téaa biỹa cca té'e nía nna ra: NUI NUAꞒ JESUS REY QUI' CA JUDIO. ³⁸ Betaá' huá cã lo curutsi ttu ttu lado luítte'é chuppa ca ubàna, ttuã lado ná' bânìe, attuã lado ná' yattie. ³⁹ Canu guttè nía nna beduadí' cã ne nna bettáa iqquia quì para guni cã ne despreciar nna ⁴⁰ ra cã: Lu' nu rena qui'ni gutàppa' lu' templua nna le' tsunna ubitsa teruba echìtha lu' a, pues bedilà la'a lù'ba nna beyàdi tsanna lo curútsiã' canchu hualigani ná lu' Ýi'ni Tata Dios. ⁴¹ Anía tehuá beni ca sacerdote principal ne burla, lani ca maestro de la ley nna ca fariséua nna a'hua iyaba canu rigú'ubia' le' yétsiá nna ra cã: ⁴² Canu huaya' nna bedilà bã atsi'íni la'a làbã nna labí ccaniã gudilàã; Annana eyàdiã lo curútsiã' canchu hualigani nã Rey qui' yetsi Ísrael, lànialá nna hueyya latsi' ri'u quì'ì. ⁴³ Lã nna gùppa bã confianza Tata Dios, pues gudilà bée na anna canchu hua catsi'ínie na; porqui'ni la'a làbã nna ra: Inte' ná' Ýi'ni Tata Dios. ⁴⁴ Anía tehuá beduadí' ca ubàna tá' lo ca curútsia ne.

⁴⁵ Ttu tsì'nu hora ti'gá nna bechul·la le' itúbani yétsiloyu hàstaá ritìj tsunna. ⁴⁶ Chi' taáduã gal·la' ritìj tsúnaá nna gunne Jesús idítsani nna rée: Elí, Elí, lama sabactani. Ca tìtsa'a nna quiere decir: Tata Dios quia', Tata Dios quia', biecca betse'e latsi' cuiã'lu' inte'. ⁴⁷ Tuchùppa canu tsè'e nía nna de biyénini cã rée anía, accana ra cã: Elías bá rul·luítsa'a. ⁴⁸ Làniataá nna bigàa ttuã guỹi'ã ttu esponja nna bedibìthã na lani vinagre, bedua tiã na lo ttu yí nna bì'ã ne í'yèe. ⁴⁹ Pero adí cã nna ra cã: Bittu, sino inna' ri'u canchu ìta Elías gudilà

bi a. ⁵⁰ Làniana iditsa tsè' guretsi ya'a Jesús nna betie espíritu qui'e làtsi' ná' Tata Dios. ⁵¹ Làniateá nna lári' rriani nu dàa para guniã dividir le' templua nna bireda'a uccua chuppa l-la'áni biyàlia dèdèba íqqiara' hàstaba yàrèe' por la'huacca qui' Tata Dios. A'hua gùyù' yétsiloyu nna, a'hua ca íyya èl-la nna biya' ca. ⁵² A'hua ca yerubà nna biyàlia ca, nuyetse' ca enne' qui' Tata Dios canu chi gùtti nna beyátha cabi. ⁵³ Beria cabi le' yerubà bitola de beyátha Jesús de lo lù'uti nna, huía tè cabi le' Jerusalén ciudad nu ná para Tata Dios; enne' yetse' nna bilá'ni ca cabi. ⁵⁴ Làniana ttu capitán lani adí canu tsè'e guardia làti tá' Jesús lo curútsia nna, de gutebé'ni ca qui'ni gùyù' nna a'hua bilá'ni ca iyaba ca cosa nu uccua nna, yala gutsini ca nna ra ca: Hualigani qui'ni la nna ná Yí'ni Tata Dios. ⁵⁵ Idittu' tí'bá de nía nna tsè'e iyé ca niula huenna'. Làca nna tanó ca Jesús dèdèba Galilea nna beni ca ne servir. ⁵⁶ Entre ca niuláa nna látsi' huá María Magdalena, a'hua María nàna qui' Jacóbua nna Joséa nna, a'hua nàna qui' ca yí'ni Zebedéua nna.

⁵⁷ Mérutaá da' ral-la lània nna bitsina' ttu enne'yu' rico nu Arimatea lá bá José. A'hua làbi nna uccua bi ttu enne' huíalatsi' qui' Jesús. ⁵⁸ Joséa nna huía bi ru'alo Pilatua gunàba bi cuerpo qui' Jesús. Pilatua nna beniã orden gute ca cuerpo qui' Jesús lani bi. ⁵⁹ Joséa nna bedi' bi cuérpuá nna betùbi tè bi e ttu sávana cubi. ⁶⁰ Gutixa tè bi cuerpo qui'áa le' ttu bà cubi nu chì' beni ba bi le' ttu íyyatò'. Betsíga' tè bi ttu íyya yénitsè' ru'a bàa nna bedà' tè bi. ⁶¹ Nía nna du María Magdalena a'hua attu María nna, guýuaní cabi ru'a bàa.

⁶² Attu yu'utsá nna guttè diba beni cą preparar para tsá redi' latsi' quı̄ nna, betùppa ca sacerdote principal ą'hua ca fariséua ru'a lo Pilatua nna, ⁶³ ra cą: Señor, intu' nna rexa latsi' tu' titsa' nu gunne bë̃yiaá loti' bàniru naá, qui'ni bitola de tsunna ubitsa nna eyáthą de lo lù'uti. ⁶⁴ Acca guthel·la' cuią'lu' guardia para qui'ni hué' cą cuidado lo bàa hàstaá bitsa ccá tsunna, para qui'ni làa tsía ca discípulo qui' niá de réla nna cuana cą cuérpuá nna gá tè cą ca enne' qui'ni chi beyaccabànią, entonces adí teerulá peor ccá la' bẽyij̄ tì'chula nerua. ⁶⁵ Pilatua nna rą cą: Nà'ba tsè'e ca soldado qui' le. Lítsía nna lígúni ą seguro tì'a ná bá la' rulábalatsi' qui' le. ⁶⁶ Làcą nna huía cą beni seguro cą bàa, berèni tè cą sello lati íyyaá nna betsè'e cą guardia.

28

¹ Guttè diba tsá sábaduá para tsáni' díla primero tsá qui' semánaá, huía María enne' Magdálaá lani attu María huanèl·le' lo bà qui' Jesús. ² Guttè tè ttu la' rìyü' fuerte gani, porqui'ni ttu ángel enne' guthel·la' Señor nna huàdi bi de ÿiabara' nna gutua bi íyya nu re' ru'a bàa nna gùdua tení bi iqquı̄. ³ La' rinna' qui' ángeliá nna uccua tì'a la'yani' qui' éthá. Ÿo bi nna uccuą tsíttsi tùni tì' taání beyi'. ⁴ Canu tsè'e guardia nna de tántuani gutsini cą nna, biỹitti'ní cą nna gubixi cą nna gùtti tsaléttia taání cą. ⁵ Gunne ángeliá nna ra bi ca niuláa: Bittu gátsini le, hua yúbá' qui'ni reyila le Jesús enne' betti cą lo curútsia. ⁶ Lanúrué té nì pues chi beyathèe de lo lù'uti tì'ba chi rèe. Litaáruhuá inna' le làti gutìxa cą néa, ⁷ lítsía quetha taá ligàtsi ca discípulo qui'áa qui'ni chi beyathèe de lo lù'uti. Lèe nna tsíe

Galilea, níabá ettsà' li e. A' ná qui'ni equixa'ánia' le. ⁸ Ca niuláa nna yala biquila' latsi' cabi a'hua yala bedácca'ni cabi nna, beyya ch̀i cabi quethani para equixá'ani cabi ca discípulua. Ca niuláa nna merua deyya cabi taquixá'ani cabi ca discípulua, ⁹ tiémputaá nna tàttsa' Jesús ca niuláa nna benie cabi saludar. Làcabi nna gubiga' cabi ru'a lúe nna gunita' cabi ca ni'e nna beni cabi e adorar. ¹⁰ Jesús nna ra t̀ie cabi: Bittu gátsini le, lítsía líúte notici' lani iyaba ca bettsi' ya'a para qui'ni tsia c̄a Galilea nna, nía ba ettsà' tu'.

¹¹ Dàca'te deyya ca niuláa nna, tuchùppa canu tsè'e guardia nna beyya huá c̄a le' ciudáad nna gutixa'áni c̄a ca sacerdote principal iyaba ca cosa nu uccua. ¹² Betùppa tè c̄a lani canu rigú'ubia' entre ca enne' judíua nna, gunne lettia c̄a nna bete c̄a iỹénitse' bel·liu qui' ca soldadua nna, ¹³ ra c̄a: Lebi'ĩ nna ínne le qui'ni ca discípulo qui' niá bita c̄a de réla lá nna gutua gattsì' ba c̄a cuerpo qui' niá miéntraste ti'áthi ri'u. ¹⁴ Canchu gúna gobernador asúntuj nna, entonces intu' ba ccálaní tu' a arreglar, bihua cuidado tsé'e le. ¹⁵ Làc̄a nna guỹi' c̄a bél·liuá nna beni c̄a t̀i'a nu chi gulù'u títsa' ca judíua c̄a. Ij modo nna riquixa'a ca enne' Judea nu uccua, hàstaá anna.

¹⁶ Huía taá tsinia ca discípulua Galilea lo i'ya làti chi ra Jesús cabía. ¹⁷ De bilá'ni cabi e nna beni cabi e adorar, pero tuchùppa cabi nna labí huía tè latsi' cabi canchu làganie enni'a. ¹⁸ Làniana gubiga' Jesús gúnnie lani iyaba cabi nna r̀ee: Itute poder chi benna Tata Dios látsi' nàya' para cu'úbi'a' ŷiabara' a'hua yétsiloyu nna. ¹⁹ Acca lítsía nna liquixá'ani iyáỹiate ca enne' le' iyábani ca nación anta' yétsiloyu

qui'ni tsíalatsi' qui' inte' nna ccá huá çą ca discípulo
quia'. Guni tè le çą bautizar lani nombre qui'
Tàtáa nna, qui' Yí'niáa nna, qui' Espíritu Santo nna.
²⁰ Liulue'ni çą iyate nu ná qui'ni guni çą tì'a chi
pá'a' le. Inte' nna du bá' lani le para gunia' le
cualani ttu ttu tsáaní hàstaá l·luỹa latsi' yétsiloyũ.
AꞤ' uccua.

Ca titsa' de la'labani para iyate ca enne'
New Testament in Zapotec, Sierra de Juárez
(MX:zaa:Zapotec, Sierra de Juárez)

copyright © 1970 Wycliffe Bible Translators, Inc.

Language: Zapotec, Sierra de Juárez

Translation by: Wycliffe Bible Translators, Inc.

Zapoteco, Sierra de Juárez [zaa], Mexico

Copyright Information

© 1970, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Sierra de Juárez

© 1970, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

70388afd-12a8-5021-a72b-e063675664f5